

## 2 KING (2 Kings – 2 King)

### *Elaitaava Ahasiarara tu uvara*

<sup>1</sup> Isareri King Ahaapiva qutu vumanta viraqaa-hai Moapi vika kia Isareri King „Ahaapira maaqu Ahasiara„ vevaaraini vaireka, auti vaura. (3:4-27)

<sup>2</sup> Vi entara King Ahasiava Sameria vatukaini nai avuhainaara naavu veraraqaa *rumu* voqi vaharo „*uintuaqaa* muntuviro vauvaro„ katari taurini taurini *uintuaqaa* arutova kinta vuvaro viva vataini hiqintiro nai vaata qoraiqama kero.

Vira vaatavano qoraiqama vuvaro viva tiharo, Mpo, ti tivaata koqemae vuanarove, kiae ko-qema vuanarove? tivakeharo vaiinti vonavu „Pirisia vata„ Ekaroni vatukaini una variqa Baali-Sebupira oru ireha tavaate tiro, vinavuka nititama komanta vura.

<sup>3</sup> Vinavuka aaraini vuvaro Noravano Kotiva atito *enseliva* Tisibehainaa paropeti vaiinti Elaitaarara tiharo,

Are oru King Ahasiava nititai vaiintika aaraini ani variakara mintima tiane: Ne nantihae Ekaroni vatukaihainaa variqa Baali-Sebupira irareka mini vi variavo? Isarerini kia Variqavano vaivo tivakehae ne „Pirisia vataini„ vi variavo?

<sup>4</sup> Ne „anirante“ maa uvara ayuhainaara vaiinti vuru tiva amiate: Are mintianara kaarama Noravano Kotiva ariara mintima tivo:

Are nena vaite variana taintaraqaahaira kia ho qaiqaa qaqi himpiraitira, qutuma vinarave tivo, tiate, tiro.

<sup>5</sup> Minti tuvaro Elaitaava viva tunte iro <sup>6</sup>oru avuhainaa vaiintivano nititoka rantakero vuru tiva nimumanta, vika anirante avuhainaava vau-naini oruntovaro avuhainaava vika irero tiharo, Ne nantihae qaqrake orurante aniamo? tiro.

<sup>6</sup> Tumanta vika nai tiva ami tiha, Aaraini vai-inti vovano tinavu rantakero tinavuara tiharo, Ne anirante vuru avuhainaa vaiinti ni nititaira mintima tiva amiate: Noravano Kotiva ariara mintima tiyo: Are nantiharae Ekaroni vatukai-hainaa variqa Baali-Sebupira ireha tavaate tira, vaiinti vonavu nititama kaaro? Isarerini kia Variqavano vaivo tivakeharae <sup>7</sup>Pirisia vataini, vika nititama kaaro? Are mintianara kaarama are nena vaite variana taintaraqaahaira kia ho qaiqaa qaqi himpiraitira, are qutuma vinarave tivo. Vi vaiintiva Noravano Kotiva mintima tivo tirave, ti.

<sup>7</sup> Vika minti tuvaro avuhainaa vaiinti viva vika irero tiharo, Vi vaiintiva nana viri vaata vataavae vaivo? tumanta <sup>8</sup> vika tiha, Viva kauhiqohai aututaa utavaaqara nonkutero retivata tavaarana rumpataivave, tuvaro avuhainaava tiharo, Oho, viva Tisibehainaa vaiinti Elaitaavave, tiro. <sup>9</sup> Minti tivakero Elaitaara vita vare aniate tiro, Ahasiava iqoka vaiintiqaa raqikuravata iqoka vaiinti 50navuvata nititomanta vura.

Vika oru tavovaro Elaitaava inaara ainqina no-raqaa oquvi vauvaro iqoka vaiintiqaa raqikuva oruntero virara tiharo, Kotira kaiqa vaiinti taruo, avuhainaava ariara tuvu ti tavaane tivo, tiro.

**10** Minti tuvaro Elaitaava tiharo, Te quqaa Kotira kaiqa vaiinti taruka variarera, te tiariraro naaruvaihairo ihavano tuvu aivata ai iqoka vaiinti 50navuvata tatoqa kaarire, tuvaro naaruvaihairo ihavano tuvu viravata vira iqoka vaiintinavuvata tatoqa aqukora.

**11** Ho vira naantiara avuhainaa vaiinti viva iqoka vaiintiqaa raqikura vovata, iqoka vaiinti 50navuvata Elaitaava vaunaini qaiqaa nititama komanta vura. Iqoka vaiintiqaa raqikuva Elaitaarara tiharo, Kotira kaiqa vaiinti taruo, avuhainaa vaiinti viva ariara vaaka tuvu ti tavaane tivo, tiro.

**12** Minti tuvaro Elaitaava tiharo, Te quqaa Kotira kaiqa vaiinti taruka variarera, te tiariraro naaruvaihairo ihavano tuvu aivata ai iqoka vaiinti 50navuvata tatoqa kaarire, tuvaro naaruvaihairo ihavano tuvu viravata iqoka vaiintinavuvata tatoqa aqukora.

**13** Ho vira naantiara avuhainaa vaiinti viva qaiqaavata iqoka vaiintiqaa raqikura vovata, iqoka vaiinti 50navuvata Elaitaava vaunaini nititama komanta vura. Iqoka vaiintiqaa raqikuva Elaitaava vaunaini oruntero vira avuqaa tori kauru araviro tiharo, Mpo, Kotira kaiqa vaiinti taruo, tivata ti iqoka vaiintinavuvata kia aru karaitira, tinavu qaqi vehakuma timitaane.

**14** Ihavano naaruvaihairo iqoka vaiintiqaa raqikitantavata vitanta iqoka vaiintinavuvata tatoqa aqukaivo. Mpo, ti qaqi aaqurihamta timitaane, tuvaro **15** Noravano Kotiva atito *enseliva* Elaitaarara tiharo, Ho are kia qetaraitira, vi vaiintikantira

otu vuane, tuvaro Elaitaava himpiro vikantiro avuhainaava vaunaini vura.

<sup>16</sup> Elaitaava otuntero virara tiharo, Noravano Kotiva ariara mintima tivo: Are Isareri vataini kia Variqavano vaivo tivakerae vaiinti vonavu Ekaroni vatukaini una variqa Baali-Sebupira ireha tavaate tira, are vika mini nititama kaaro? Are mintianara kaara nena vaite variana taintaraqaahaira kia ho qaqi himpiraitira, qutuma vinarave tivo, tiro.

<sup>17</sup> Ho Elaitaara noqihairo Noravano Kotiva uva tuntema kero, Ahasiava qutu vura. Ahasiara maaqu kia vauvarora tiro, vira qata Joraamuva vira vatuka varero avuhainaava vaiintiqama vura.

King Jehosafaatira maaqu Jehoraamuva taara ihilara Iuttaaqaa raqiki vau entara, Joraamuva avuhainaava vaiintiqama viro Isareriqaa raqiki vaura.

<sup>18</sup> Ho Ahasiava ekaa vo kaiqa vo kaiqa varo uvvara vuku vo, *Isareri Avuhainaaka Uva Okarave tu vukuraqi qara ntuvatora.*

## 2

### *Kotiva Elaitaara vita varovaro naaruvalni vura*

<sup>1</sup> Noravano Kotiva vetoraqohairo Elaitaara vita varero naaruvalni vuarira entava aumaiqumanta Elaitaaka Elisaaka Giligaali vatuka ke aaraini vura.

<sup>2</sup> Elaitaava Elisaarara tiharo, Noravano Kotiva tiriara Betelini vuane timanta, te mini vuarirara are mainima variane, tuvaro Elisaava aqao tiro, Noravano Kotiva qaqi variqiro vi vaira autuqaavata, ai autuqaavata te quqaama turo: Te ai

hampata vairerave, tiro. Elisaava minti tiva kero Elaitaakantiro Betelini vura.

<sup>3</sup> Vitanta Betelini oruntomanta paropeti vaiinti mini vauka ani Elisaara ireha tiha, Vatema Noravano Kotiva ai nora vaiinti vita varairara „are nenaraa vainarave“. Are virara irianarave, kiae irianarave? tuvaro Elisaava vika nai tiva nimiro tiharo, Te virara irunarave. Ne kiama qaiqaavata vi haikarara tiate, tiro.

<sup>4</sup> Minti tivakero vauvaro Elaitaava Elisaarara tiharo, Noravano Kotiva tiriara Ierikoni vuane timanta te mini vuarirara are mainima variane, tuvaro Elisaava aqao tiro, Noravano Kotiva ekaa enta qaqi variqiro vi vaira autuqaavata, ai autuqaavata te quqaama turo: Te ai hampata vairerave, tiva kero Elaitaakantiro Ierikoni vura.

<sup>5</sup> Vitanta Ierikoni oruntomanta paropeti vaiinti mini vauka ani Elisaara ireha tiha, Vatema Noravano Kotiva ai nora vaiinti vita varairara are nenaraa vainarave. „Are virara irianarave, kiae irianarave? tuvaro Elisaava vika nai tiva nimiro tiharo, Te virara irunarave. Ne kiama qaiqaavata vi haikarara tiate, tiro.

<sup>6</sup> Minti tivakero vauvaro Elaitaava Elisaarara tiharo, Noravano Kotiva tiriara Iotani Namari vainaini vuane timanta te mini vuarirara are mainima variane, tiro.

Elaitaava minti tuvaro Elisaava aqao tiro, Noravano Kotiva qaqi variqiro vi vaira autuqaavata, ai autuqaavata te quqaama turo: Te ai hampata vairerave, tivakero Elaitaakantiro Iotani Namari vaunaini vura.

<sup>7</sup> Vitanta aaraini vi vaumanta paropeti vaiinti 50navuvata Elaitaaka Elisaaka avata vare vumanta vitanta vivi, Iotani Namari vaunaini

otunte mini vaumanta paropeti vikavata vutuni himpite vaiha vitanta aituti vaura.

**8** Ho Elaitaava nai vukai tavunauta aqutora ravaqaa kero ququrama kero viraqohairo namari ruqutu kovaro namarivano rairaviro hini hini vaumanta vitanta tavaaraqaa vatavano aaharaiqama vuraqaa taqa vare hini mantaraini vura.

**9** Vitanta mini orunte, Elaitaava Elisaarara tiharo, Aumakaama Noravano Kotiva ti tivita varairaqe te ai maini kararave. Ho te nana haikae naane ai autu amite vuare? tiro.

Minti tuvaro Elisaava nai tiva amiro tiharo, Mpo, nai qova nai maaqu hoqarenaara airaira voqavata amintema kera, are Kotiva ai ami kempukara vira voqavata ti timiraqe te ai vatuka vare, ai aanante paropeti kaiqa varaare, tiro.

**10** Elisaava minti tuvaro Elaitaava tiharo, Ike, vi haikarara are ti iraanara, te kiama ho qihaaqamake ai amirarave. Ho Noravano Kotiva ti tivita varero vuainara are vaihara tavairera, are homa vi kempukara varenarave. Are vaihara kia tavairera, are kia ho vi kempukara varenarave, tiro.

**11** Minti tivakero vitanta aaraini viha uva tivaqi vi vauvaro vaakama iha auru voqaava qovarama vuvaro viraqi ohinavuvano iqoka *kaari* raraau vare vitanta tavaaranan aninte raira kovaro, viraqaahairo nora vetoravano utiharo Elaitaara vita varovaro viva naaruvaini vura.

**12** Vetoravano Elaitaara vita varovaro naaruvaini vuvaro Elisaava tavero naveraitiharo, Mpo, ti qo, ti qo, iqoka *kaarivata* iqoka vaiintivata

viraqi vaiha Isareri kahaqiantema kera, are kem-pukavano Isareri kahaqiaravave, tiro. Minti tivakero viva kia Elaitaara qaiqaavata tavora.

Ho Elaitaava naaruvaini vuvaro Elisaara muntukavano qoraiquvaro viva mpo ike tiharo nai tavunauta aqutora qaqlini varakero tavaaraqaa qunahi kero,<sup>13</sup> Elaitaara tavunautavano vataini hiqintura utu varero anirantero Iotani Namari auvahini oru himpiro vaura.

<sup>14</sup> Ho Elisaava tavuna virauta varero otu namari vira ruqutukero tiharo, Mpo, Noravano Kotiva Elaitaara hampata vaintema kero, viva ti hampatavata varianarove? tivakero viva namari ruqutu kovaro vaakama namarivano rairaviro hini hini vauvaro tavaaraqaa aahara vata vauvaro viva taqa varero hini mantaraini vura.

<sup>15</sup> Mintumanta paropeti vaiinti Ierikohai ani tave vauka tiha, Ho tavaate. Kotiva Elaitaara ami kempukava Elisaaraqaavata vaivo, tivake vika viva vaunaini oru tori kauru aravi nái qiata vatainiqamake tiha,

<sup>16</sup> Ho tavaane. Tenavu kempuka vaiinti 50navuma vauro. Ho are qaqlini kairage tenavu ai nora vaiinti ranteha tavaare. Nora Kotira Maraqravano vira vita varero vuruvi aiqinainie kaivo uqitainie kaivo? tuvaro Elisaava aqao tiro, Kia vuate, tiro.

<sup>17</sup> Elisaava minti tumantavata, vika kempukaiqamake Elisaara iramaqi vuvaro vira popohovaro tiharo, Hove. Ne vira rantareka vu-ate, tumanta vika 50navu taaramo entanavuara Elaitaara rantaqai vi, kia ranta kora.<sup>18</sup> Vika orurante Elisaava Ierikoni vaunaini anintovaro

Elisaava vi vaiintikara tiharo, Te niara kia vuate turamantavata, ne kia ti uva iriavo, tura.

*Elisaava nora kaiqa, vo kaiqa vo kaiqa varora*

<sup>19</sup> Elisaava Ierikoni vaumanta Ierikohainaa vaiinti vika aninte Elisaarara tiha, Nora vaiintio, are tavaane. Maa vatukava koqe vataini vaivarovata, namarivano kia koqe ivaro karavanovata kia koqemakero qampiqe vaivo, ti.

<sup>20</sup> Vika minti tuvaro Elisaava tiharo, Ne oru qaraaka tanuqi hore qihiake vare viri ti timiate, tumanta ho vika Elisaava tuntemake, vare vira vuru amura.

<sup>21</sup> Vira amuvaro Elisaava ruvu namari tuvunaini hore vira namariqi aqukero tiharo, Noramano Kotiva mintima tivo:

Te maa namarira koqema kauraro koqema vivo.

Namarivano kia qaiqaavata qoraiqama viro vainti naati arukaanarove.

Mintiraro karavanovata koqemakero qampiqaanarove tivo, tiro.

<sup>22</sup> Ho Elisaava tuntema kero, namarivano koqema viro variqiro aniro, vate maa entaravata mintima kero vairo.

<sup>23</sup> Ho Elisaava Ieriko kero Betelini vura. Viva aaraini vi vaumanta vi vatukaraqihai qaraaka vaiinti airitahaa vira tave, vira naaraihama amiteha vira uva virera tiva amiteha tiha, Ae, qivoriha ntugiravave, maihaira vuane. Qivoriha ntugiravave, maihaira vuane, ti vaura.

<sup>24</sup> Vika minti ti vauvaro Elisaava tuqantaa viro kempuka viri aratero vika taveharo Nora Kotira autuqaa naveraitiharo, Kaivaro viva ni qoraiqama kaira ne vaaquqama vuate, tumanta

*bea taaraqantavano nantaqihai tuvunte, qaraaka vaiinti 42navu aruke ruqeqaama kora.*

<sup>25</sup> Ho Elisaava Kaameli Aiqinaini oru viro, vi-raqaahairo anirantero Sameriaini vura.

### 3

#### *Isareri vika Moapi hampata raqura*

<sup>1</sup> Jehosafaativa 18 ihiara Iuttaaqaa raqiki vau entara, Ahaapira maaqu Joraamuva Isareri avuhainaa vaiintiqama viro, 12 ihiara Sameria vatukaqi vaharo Isareriqaa raqikiqiro vi vaura.

<sup>2</sup> Joraamuva Nora Kotira avuqaa qora kaiqa vare vaura. Mintiharovata, viva kia nai noka qoka anomake qora kaiqa autuntema kero, qora kaiqa auti vaura. Haaru Joraamura qova una variqa Baalira *maraqura/varaha* vara qaqlira kora.

<sup>3</sup> Viva mintiharovata, Nebaatira maaqu Jeroboamuva qora okara autuntema kero, Joraamu-vavata qora okara auti vaura.

Haaru Nebaatira maaqu Jeroboamuva qora okara autiharo una variqanavu *maraqura/varaha* quahama nimitero. Isareri vikavata kuntama virivi komanta vikavata qora okara autura. Joraamuva qora okara autura kia qaqlira karaitiro, qaqlira auti vaura.

<sup>4</sup> Moapihainaa King Mesaava airi sipisipi vato vaiintiva vaharo Isareri avuhainaa vai-inti vevaaraini vaharo viva ekaa ihiara *takisi aquntema* keharo sipisipi naati 100,000 Isareri avuhainaara amiro, sipisipi qora 100,000qaahairo vika kauhivata toqa kero vira amite vaura.

<sup>5</sup> Ho Isareri King Ahaapiva qutu vuvaro Mesaava kia Isareri King Joraamura, vevaaraini vaireva autiharo, „viva kia vira qaiqaa takisi amura.„

<sup>6</sup> Mintuvaro vaakama King Joraamuva Sameria kero nai iqoka vaiinti Isareri ekaa *untu/nutu* ruvaaquma kero <sup>7</sup> Iutaa King Jehosafaatiraini uva varakero tiharo, Moapi avuhaina a vaiintivano kia ti vevaaraini vaireva auti vaimanta te oru Moapi hampata raqirerave. Are hoe tintira aninarave, kiae aninarave? tiro.

Joraamuva minti tuvaro King Jehosafaativa natiiva amiro tiharo, Te homa ainti vuainarave. Tentavata, ti iqoka vaiintive, ohive, ai kahaqiari-raukama vauro. <sup>8</sup> Ho tenavu ta aararaqaae Moapini vuainarave? tuvaro Joraamuva vira tiva amiro tiharo, Aniqenavu Idomuni Aahara Vataini vi varia aararaqaa vuare, tiro.

<sup>9</sup> Manti tivakero King Joraamuva vo, Iutaa avuhainaava vo, Idomu avuhainaava vo, nái iqoka vaiinti ntita vare vura. Vi aarava vukai aara vaumanta vika <sup>7</sup> entara aaraqaa vi vauvaro namari taiqa vuvaro vaiintive ohive donkive namari neva kia vaura.

<sup>10</sup> Kia vauvaro King Joraamuva oho tiro, Noravano Kotiva tinavu taaramonavu Moapi avuhainaara kauquqi vatareva auti vaivo, tiro.

<sup>11</sup> Manti tuvaro King Jehosafaativa Joraamura irero tiharo, Nora Kotira paropeti vovano vairove, kiae vaivo? Viva vairera, tenavu nana nana haika autuainara vira tiva amiariraro viva Nora Kotira ireharo tavaarire, tiro.

Manti tuvaro Joraamura iqoka vaiintiqa raqikuva vovano vira tiva amiro tiharo, Safatira

maaqu Elisaava vaivo. Haaru viva Elaitaara paanaa vaiintivano vaurave, tiro.

<sup>12</sup> Manti tuvaro King Jehosafaativa tiharo, Quqaama Elisaava Nora Kotira uva ti vai vaiintiva vaivo, tivake avuhainaaka taaramonavu Elisaava vaunaini oru vura.

<sup>13</sup> Mini vuvaro Elisaava Isareri avuhaina vaiintiara aqao tiro, Nantivarae are te unanaini aniaro? Ai noka qoka paropeti vaiinti ire variaka, arevata oru vika irehara tavaane, tuvaro Isareri avuhainaava tiharo, Kiave. Noravano Kotiva tinavu avuhainaaka taaramonavu Moapi kauquqi vatareva auti vaira kaara tenavu ai tavarera anuro, tiro.

<sup>14</sup> Manti tuvaro Elisaava tiharo, Oho, Noravano Kotiva ekaa kempuka vatero qaqi variqiro vi vaiva vaimanta te vira kaiqa vaiintivano ariara mintima turo: Jehosafaativa kia ai hampata antirio, te kia ai tavaraiti, kia ai hampata uva tireravema turaitirio. Jehosafaatirara koqe vaiintive tunarara ti, te ai uva irirerave, tiro.

<sup>15</sup> Manti tivakero viva tiharo, *Musiki* ruquti vai vaiintira vo vita vare aniate, tumanta vira vita vare anuvaro vi vaiintiva *musiki* ruquti vauvaro Nora Kotira kempukavano Elisaaraqaa tuvu vauvaro <sup>16</sup> Elisaava tiharo, Noravano Kotiva mintima tivo:

Ne uqita maa kanta vo ora vo ora quvike vataivaro airi oravano variarire.

<sup>17</sup> Ne tavaivaro kia uvaivano utiraro kia aaquvata ntiraro, namarivano uqita maa kanta mpiqaviro vairamanta nevata, ni purumakauvata, donkivata ho nevarave tivo. Noravano Kotiva mintima tivo.

**18** Noravano Kotiva qihaaqama keroma vi haikara autukero, Moapi vatanaaka ni kauquqi vataanarove.

**19** Ne iqoka raqihama vaantaavura ututaa vatukarave, nora vatukave, ekaa vi vatukara vi vatukara varevarave. Ne vika katari koqe tava ire vaira, vo katari vo katari tuqu kevarave. Ne vika ruvu namarivata, ekaa tinta kevarave. Ne vika kara utuke ne vataraqaa ori ntava taivarokia ho koqe vata variarire, tiro.

**20** Elisaava minti tuvaro vira qararaa toqaqi Kotira *ofaa* autu amite vau kuari avuraqaa namarivano Idomu vataihairo tuviharo ekaa vi vataro mpiqa kora.

**21** Ho Moapi vika vaiha irumanta avuhainaaka taaramonavu vika hampata raqireka anumanta vika ekaa qaraaka vaiintive, naampaive, auvihevaa ho vareka naaromanta vika Moapi vata auvahianta oru vaura.

**22** Moapi vika vaaka toqaqi himpi tavovaro kuarivano namariqaa ite vauvaro namarivano naare voqaara vaura.

**23** Naare voqaara vaumanta Moapi vika tiha, Ho tavaate. Vutura naarema vaivo. Ike, avuhainaaka taaramonavu iqoka vaiinti nai ari nai ari i kaavarovika naarevano vataqaa vaivo. Ho varaiqenavu oru vika airaira, vo haika vo haika varaare, ti.

**24** Vika minti tivake Isareris *seri* naavu maaqa kaqatonaini oruntomanta Isareris vika himpi Moapi hampata iqoka raquqi vumanta Moapi vika qetake rugemake vumanta Isareris vika aru ntataqi vivi, Moapi vataini vi aniha vika aruqi vura.

**25** Vika Moapi vatuka, vo vatuka vo vatuka qoraiqamake, vohaiqa vohaiqvano ori utu vare vuru naahoqi aqukovaro orivano vi vataraqi mpiqa vura. Vika ruvu namari, vo namari vo namari tintake, koqe tava ire vau katariravata ekaa teqa taaqama kora. Vika ekaa vatuka qoraiqama kovaro nora vatuka Kiri-Heresi vatukaqai qaqi vaura.

Ho nora *kataperiqohai iqoka raqi* vau vaiintika vi vatukara ututumate, vatuka avutaqi ori ari vaura.

**26** Ho Moapi avuhainaava tavovaro vira navuttaaka vira aatara kareka auti vauvaro, viva iqoka paipeqohai raqu vaiintika 700 ntita varero vatukaqihairo ruqemakero Idomu avuhainaava vaunaini vuare tiro, tavovarovata vika vi aarava kia ho vaura.

**27** Mintuvaro Moapi avuhainaa vaiintivano nai maaqu hoqarenaava nai vira vatuka varero avuhainaava variaina vaiintira vita varero, vaantaavura qiataqaa vi vaiintira arukero nai una variqara iriharo *ofaa* iha quara amitora.

Viva nai maaqu mintimakero arukora kaara Isarerि vika voqamake aatu itomanta qaqirake nái maaqaini vura.

## 4

### *Elisaava tentoqa nahenti vo kahaqura*

**1** Paropeti vaiintinavu vauraqihairo vo paropeti vira naatavano Elisaava unaini oruntero tiharo, Mpo, ti vaativano qutuma vivo. Viva qaqi vai entara Nora Kotira aatu qeteharo koqema kero ni vaira arevata iri tavaanarave. Ho

viva monu vo vaiintiqi viqataira kia vira amira kaara vi vaiintiva anintero tiriara tiharo, Are kia vi monura vaaka ti timirera, te ai maaqutanta rumpa vare vuru kaari vitanta ti paanaa kaiqa vaiintitanta vaivarave, tiro.

<sup>2</sup> Minti tuvaro Elisaava vi uvara iriro nahenti virara tiharo, Te nantiabee ai kahaqirarave? Nana haikae ai naavuqi vaivo? tuvaro nahenti viva tiharo, Mpo, te inaara taquqi *orivi* vhahvera nonku taurava vivaqaima naavuqi vaivo. Kia vo haikavata vaivo, tiro.

<sup>3</sup> Minti tuvaro Elisaava nahenti virara tiharo, Ho oru nena naavu tataaqa variaka irairamanta vika qumina vai taqura, ai amivara varaae. Airi taqu varera <sup>4</sup> nena naavuqi oriqetera qenti tinta tera viraqi vahhara are nena maaqutanta ham-pata *orivi* vhahvera taqu vinavuraqi qihiiaraane. Vo taquqi mpiqa kera vatera, vo taquqi mpiqakeraa vatera, mintiaqira vira, ekaa taqunavu mpiqa kaane, tiro.

<sup>5</sup> Minti tuvaro nahenti viva Elisaava tun-temakero, airi taqu varero nai naavuqi oriqetero qenti tinta tero viraqi vaumanta vira maaqutanta vo taqu vo taqu vare viri nai nora amuvaro, viva nai *orivi* taqu vatoraqihairo taqu voqi voqi qihiarora.

<sup>6</sup> Qihiaqiro viharo viva ekaa taqu mpiqa kero nai maaqu vorara tiharo, Taqu vo vare aniane, tuvaro viva tiharo, Kia taqu voqavata maini vaivo, tuvaro vi nahentiva tavovaro nai taquqihairo vhahvera qaiqaa qihiiaraarirava kia vaura.

<sup>7</sup> Ho mintimakero nahentivano vuru Elisaara tiva amuvaro viva tiharo, Vahhvera vira vo vai-inti vo vaiinti nimihara monu varera, nena vaa-

tivano viqataira taiqa kaane. Hini monu qaqi vainaraqohaira karave vo airairave koqaama kera varera nena maaqtanta hampata variqira vuane, tura.

*Sunemi      vatukaihainaa      nahentivano  
Elisaaraqaa raqikura*

<sup>8</sup> Vo enta Elisaava Sunemi vatukaini oru vauvaro vihainaa nahenti vovano, airi monu vatovala Elisaarara ani ti naavuqi kara naane tuvaro Elisaava vira naavuqi oru kara nora. Ho Elisaava Sunemini oru vau entara viva vi nahentira naavuqiqai kara ne vaura.

<sup>9</sup> Mintiaqiro vi vauvaro vi nahentiva nai vaatiara tiharo, Ike, ti aatovano kenko timanta iruro. Vo enta vo enta tinavu hampata kara ne vai vaiintiva, viva Kotira kaiqa vaiinti taruvave. <sup>10</sup> Ho kaiqetanta naavu qiataqaa viva variaina *rumura* vo autu amite, viraqi vaitaaina taintarave, kara taintave, oquvuaina taintarave, *raamuve*, viraqi vataare. Mintimake amitaariraro vi vaiintiva anina entara viraqi ani vaitaarire, tiro. „Mintitivate vitanta vi *rumura* Elisaara autu amitora.“

<sup>11</sup> Ho vo enta Elisaava Sunemini qaiqaa oruntero vi *rumuraqi* nai vaitaaina taintaraqaa auraara vaiharo vaura.

<sup>12</sup> Viva nai kaiqa vaiinti Gehaasirara tiharo, Are nahenti vira aarairaro maini uruarire, tuvaro viva vira aarovaro uruntero vahaaqaini himpi vauvaro <sup>13</sup> Elisaava Gehaasirara tiharo, Are vi nahentira irehara tiane: Are titanta koqema kera maa *rumura* autu timitaanarara ti, tetanta virara iriha nana haikae ai amirarave? Ai antuqavano nanarae vaivo? Tetanta oru avuhainaa vaiintie, *aami* nora vaiintie, iraari vitanta ai vo haikae

autu amitevarave? tuvaro Gehaasiva otu nahenti vira irovaro viva aqao tiro, Te tenta navunaaka hampata vaiha kiama vo haikara aavoquro, tiro.

<sup>14</sup> Manti tuvaro Gehaasiva nahenti viva tu uvvara Elisaara tiva amuvaro Elisaava vira irero tiharo, Ho tetanta nana kaiqae vira vara amitararave? tuvaro Gehaasiva tiharo, Vira maaquvano kia vaivaro vira vaativano naampaiqama vivo, tiro.

<sup>15</sup> Manti tuvaro Elisaava tiharo, Vi nahentira aaraane, tuvaro vira aarovaro uru qentiana himpite vauvaro <sup>16</sup> Elisaava virara tiharo, Are hora ihi maa toraraqaa nena maaqu ravuku tenarave, tuvaro nahenti viva tiharo, Mpo, nora vaiintio, are Kotira kaiqa vaiinti taruvama variaro. Kia ti una tiane, tura.

<sup>17</sup> Ho nahenti viva variqiro viro vainti taiqamaviro, vi ihira vi toraraqaa Elisaava tuntema kero, qorainti vainti vata tora.

<sup>18</sup> Vira maaquvano vo ihinavu varakero vo enta toqaqi nai qora tavareva vura. Vi entara *uiti* teqe vau entava vauvaro vira qova nai kaiqa vaiinti hampata *uiti* naahoqi vauvaro <sup>19</sup> vaintiruvano oru nai qora vataakero vaura. Ho vate virave tiro aiha vuvaro nai qora aarerero tiharo, Mpo qaa, ti qiatave. Ti qiatu aiho vivo, tuvaro vira qova nai kaiqa vaiinti vorara tiharo, Ho vainti virauru ravuku varera nai nova inaini vuru kaane, tuvaro <sup>20</sup> vira kaiqa vaiintivano vainti virauru ravuku varero vuru nai nova unaini kovaro viva nai nora auvoqi variqiro vuvaro kuarivano qiataga uruntovaro qutu vura.

<sup>21</sup> Qutu vuvaro vira nova vainti vira varero vuru veraraqaa Elisaava vaito taintaraqaa vatero

vevantero qenti tinta tero <sup>22</sup> nai vaati aarovaro anuvaro virara tiharo, Are oru nena kaiqa vaiinti vo tiraro donki varero viri ti timiarire. Te Kotira kaiqa vaiinti tarura kante oru tave, qaiqaa orurante anirerave, tiro.

<sup>23</sup> Tuvaro vira vaativano aqao tiro, Nanarae are vate vaiinti vira tavareva iaro? Vate kia Maara Entave, kia qaraaka torara ovata ne entavama vaivo. Vi entava anintainaraqaa vira oru tavaane, tuvaro nahenti viva kempukaiqama kero tiharo, Ho are kia virara noraiqaakera iriane. Te virerave, tiro.

<sup>24</sup> Manti tivakero viva nai oquvuaina tanura donkiqaa rumpatero nai kaiqa vaiintiara tiharo, Ho are donki vihi vaahi tiraro kantero vuarire. Te kia vo uva tiarerera, kia qakoma kera vuane, tivakero <sup>25</sup> viva nai kaiqa vaiintintiro Kaameli Aiqinaqaa Kotira kaiqa vaiinti taruva vaunaini vura.

Vitanta aaraini vi vauvaro Elisaava vaiharo vutu tavovaro vitanta ani vauvaro viva nai kaiqa vaiinti Gehaasirara tiharo, Vutuni vutu tavaane. Sunemi nahentivano anivo. <sup>26</sup> Are kantera oru vira irehara tavaane. Viva nai vaati vainti ham-pata hoe variavo, kiae ho variavo? tuvaro ho Gehaasiva oru nahenti vira irovoro nahenti viva tiharo, Tenavu homa vauro, tiro.

<sup>27</sup> Ho nahenti viva minti tivakero viva aiqinaqaa Elisaava unaini oruntero vira aiqutaraini kankakaaviro Elisaara aiqu ataa tote vauvaro Gehaasiva tavero, vira niaranto venta vuruvi kaare tuvaro Elisaava aqao tiro, Kia mintiane. Vira qaqi kaane. Te tavauraro vira muntukavano voqama kero qoraiqivo. Mintivaro Noravano

Kotiva vira muntukavano qoraiqirara kiama ti tiva timivo, tiro.

<sup>28</sup> Manti tuvaro nahenti viva tiharo, Nora vai-intio, ike mpo, ai uvaqaa Kotiva vainti vira ti timirave. Mpo, vi entara te ariara kia ti una tiane tunarave, tiro.

<sup>29</sup> Manti tuvaro Elisaava Gehaa-sirara tiharo, Te quruqi nuna kaurura varera, nena utavaaqa iquqamakera rumpa varera, kantera Sunemini vuane. Viharama kia vo vaiinti uva mantaraitira, qaqi viraro vo vaiintivano ai aarairara kia vo tiraitira oruntera, ti kaura vi vaintirura viriqaan vataane, tiro.

<sup>30</sup> Manti tuvaro vainti vira nova tavovaro Elisaava kia nai vireva iharo nai kaiqa vaiintiqai atitareva auti vaavararo viva aqao tiro, Noravano Kotiva qaqi vaira autuqaavata, ai autuqaavata, te kempukaiqamake turo: Are kia virera, tevata kia viraiti, maini vairerave, tuvaro Elisaava nahenti vikantiro Sunemini vura.

<sup>31</sup> Ho Gehaa-siva naane avuni vuva kauru vuru vi vaintira viriqaan vatovaro kia viva himpura. Kia himpuvaro Gehaa-siva anirantero aaraini vi-haro Elisaara rantakero tiharo, Mpo, vaintiruvano kiama himpivo, tuvaro <sup>32</sup> Elisaava naavuni oruntovaro nai *rumuqi* oruntero qentiqaahairo tavovaro qutuvi vaintiruva taintaqaa vauvaro <sup>33</sup> viva oriqetero qenti tinta tero Nora Kotira aarora.

<sup>34</sup> Nora Kotira aarama kero taintaqaa oruntero vaintiru vaataqaa ropapaaviro, viva nai no avu kauqu vi vaintirura no avu kauquqaa vatero tavovaro vi vaintirura vaatavano totoqireva auti vaura.

**35** Ho totoqi vauvaro Elisaava himpiro *rumuqi* vi anima kero, oruntero qaiqaa vi vaintiruraqaaropapaivuvaro vanti virauruvano 7 tataa ahira ntuvakero nai avu rampai kora.

**36** Avu rampai kovaro Elisaava tavero, Gehaasira aarama kero tiharo, Vira nora aarairaro uruarire, tuvaro nahenti viva uruvaro Elisaava tiharo, Ho nena maaqu vitaane, tiro.

**37** Manti tuvaro „nahenti vira muntukaqihairo voqamakero quahovaro,“ viva Elisaara aiqutraini kankakaama viro varikero, nai vanti vira vita kero otu vura.

### *Kara qoraiqura Elisaava koqema nimitora*

**38** Vo enta Isarerini karara aavoqu entava an-intora. Vi entara Elisaava anirantero Giligaali vatukaini oru vaura. Vi entara paropeti vaiintivokuka ani ruvaaqumavi vaiha Elisaava uva tura iri vauvaro viva nai kaiqa vaiintiara tiharo, Orutave nora varera viraqi maa vaiintika kara unta nimitaane, tiro.

**39** Manti tuvaro paropeti vaiinti vovano naahara rantareva vuva oru qaakau mantau tavero koqe karave tiva kero, airitahaq hiqi kero nai tavunaqi apuqama kero varero viri teqekero, taveqi aratora. Vikaqihairo kia vovanovata qaakau mantau okarara irura.

**40** Aratovaro ita vuvaro mpaqi kero tanuqiraaqu kero paropeti vaiinti nimumanta vika neha tave tiha, Oho, Kotira kaiqa vaiinti taruo, uhima kara maaqi vaivo. Hauri tenavu namake qutuvuarorave, ti.

**41** Vika minti tuvaro Elisaava tiharo, *Porisi/Vorusi* vonavu vare aniate, tumanta vare anuvavarro Elisaava *porisi* vira taveqi aqukero tiharo, Ho kara raaquke nimiramanta naate, tumanta raaquke nimumanta vika neha tavovaro karanavo ho vaura.

### *Elisaava vaiinti 100 navu kara nimura*

**42** Uitivata *baalivata* mpeqaiqu entara, vaiinti vovano *baaliqohairo* mpareti 20navu untakero ntuva varero, qaraaka *baalivata* ntuva varero, nai vatuka Baali-Salisa kero Elisaava vaunaini anintero „vira amuvaro“ Elisaava nai kaiqa vaiintiara tiharo, Vi karara paropeti vika nimiane, tiro.

**43** Ho minti tuvaro vira kaiqa vaiintivano aqao tiro, Paropeti vaiinti 100 variavaro maa karava kia ho vikaqji varianarove, tuvaro Elisaava tiharo, Ho qaqi nimira naate. Noravano Kotiva mintima tivo: *Vika kara ho naivaro hini karavano qaqlima varianarove*, tivo, tiro.

**44** Elisaava minti tuvaro vira kaiqa vaiintivano vi karara paropeti vika nimumanta nora. Noravano Kotiva tunttemake, vika ho novaro hini kara qaqi vaura.

## 5

### *Nemaanirara tura*

**1** Vaiinti vo Nemaaniva ekaa Siria iqoka vaiintiqaa raqiki vauva vaura. Noravano Kotiva vira kahaquvaro viva Siria vika navutaaka naatarake vauvarora tiro, Siria avuhainaava virara nora

vaiintive tivakeharo virara quahe vaura. Nemaaniva iqoka vaiinti taruva vauvarovata, qora numuaravano vira vaata ne vauvaro vaura.

<sup>2</sup> Ho vo enta Siria Isarereri vataini orunte iqoka raqiha Isarereri nahenti vainti vo ravaaqavu vare vuru Nemaanira naata amuvaro viva vira paanaa kaiqa vare vaura.

<sup>3</sup> Vira kaiqa vareharo vo enta viva Nemaanira naatara tiharo, Mpo, ti nora vaiintivano Sameraini vai paropetira oru tavaitirio, paropeti viva vira numuara homa taiqa kaitirio. Viva mini viraqe te koqeve tiataarave, tiro.

<sup>4</sup> Manti tuvaro vira naatavano nai vaati Nemaanira tiva amuvaro, viva Siria avuhainaa vaiinti nai kaiqa nahentivano tu uvara vuru tiva amuvaro <sup>5</sup> avuhainaava Nemaanirara tiharo, Te qara vo ai amiarirara are vira varera vuru Isarereri avuhainaava vaiinti amiane, tivakero avuhainaava qara ntuva kero Nemaanira amuvaro viva Isarerini vireva iharo 300,000 silvaa monu viravata varero, *kori* ori vira maara 60 kilo vaura viravata varero, koqe utavaaqa 10navuvata varero Sameriaini vura.

<sup>6</sup> Mini oruntero Isarereri avuhainaa vaiinti qara amuvaro qara viraqi uvavano mintima tiro:

Maa ti iqoka vaiinti Nemaanirave. Are vira kahaqiraro vira numuara tavanta viro taiqa vuarire, tiro.

<sup>7</sup> Ho Isarereri avuhainaava vi uvara kaara ntuva kero, nai utavaaqa qunahi qaannahima kero tiharo, Oho, Siria avuhainaa vaiintivano nantivaroe tiriara minti tivo? Te Kotika vaihae vaiinti aruke viraqaaahai qaiqaa qaqi vara himpima

kararave? Oho, viva ti hampata iqoka raquaina aarara rante vaivo, tiro.

<sup>8</sup> Minti tuvaro vi uvava vi ani uvapo Kotira kaiqa vaiinti taruva Elisaavavata vi uvava iriro viva Isarereri avuhainaa vaiintini uva varakero mintima tiro: Nana kaarae nena utavaaqaa qunahi qaannahima kaaro? Vi vaiintira atitairaro te unanaini anirage te vira umiqaariraro viva quqaama paropeti vaiintivano Isarerini vaivo tiarire, tiro.

<sup>9</sup> Elisaava minti tuvaro Nemaaniva nai iqoka *kaarinavuvata* ohivata varero Elisaara naavu gentiana oruntora.

<sup>10</sup> Oruntovaro Elisaava nai kaiqa vaiinti atitero tiharo, Are vevantero virara mintima tiane: Are Iotani Namariqi otuntera 7 tataama namari tuntuane. Are mintiraro ai numuaravano ekaa taiqa viraro ai vaatavano koqema vuarire, tiane, tiro.

<sup>11</sup> Minti tuvaro muntu tiva amuvaro, Nemaaniva vi uvava iruvaro vira arara itovaro naavu kero viharo tiharo, Oho, paropeti vaiintivano vahaaqaini veva ntero ti numuaravano taiqaarire tiro, nai Variqa Nora Kotira aareharo nai kauqu ti numuaraga vutuni maini iraro taiqaarire, turaroma viva kia mintiraitiro, viva qaqi naavuqi vaharo tiriara Iotani Namariqi otu tuntuane tivo.

<sup>12</sup> Ike, ti maaqa Damasikusini Apaanaa Namari-vata, Paripari Namari-vata, koqe namaritanta vaiha ekaa Isarerini vai namariravata aatara kaarave. Namari-vano numuara kahaqeharo taiqa kaitirio, te homa tenta maaqaini vaiha namaritantaqai tunturaro ti numuaravano taiqa vitirio, tiro.

**13** Minti tivakero viva tuqantaaviro nai maaqaini vuare tumanta, Nemaanira kaiqa vaiintinavu vira aaqanto orunte virara tiha, Mpo, nora vaiintio, paropetivano ariara vukaari uti kaiqara varaane titirio, are vaakama varaaraitirio. Viva kia minti tiraitiro, ariara namariqai tuntiraro ai numuaravano taiqa vuarire tivo. Homa, are viva tinantema kera mintiane, ti.

**14** Vinavuka minti tuvaro Elisaava tuntema kero, Nemaaniva otu Iotani Namariqi 7 tataa tuntukero tavovaro vira numuaravano taiqa vuvaro vira vaatavano qaraakaiqama viro, vainti naati vaata voqaara väura.

**15** Vira vaata koqema vuvaro viva nai kaiqa vaiintinavu hampata tuvurantero Elisaava vaunaini oruntero tiharo, Ho vate te kankomake iri tavauaramanta kia maa vataraqaa vo variqa vo variqa variavo. Isareriqaa raqikiva Kotiva, vivaqaima Variqavano vaivo. Mpo, kaiqe te ariara quaheha vo haika ai amiare, tiro.

**16** Minti tuvaro Elisaava aqao tiro, Noravano Kotiva qaqi vaimanta te vira kaiqa vaiintima vauro. Vira autuqaa te ququaama turo, Kia te ariqihai vo haikavata vararerave, tuvaro Nemaaniva kempukaiqama kero tuvarovata, Elisaava kia vo haikavata viraqihairo varora.

**17** Ho Nemaaniva tiharo, Te kia vo haika ai amiarera, are ti qaqi kairaqe te Isarerit vata quvike, donki taaraqantaqaa vaari vataari vitanta vare vuru maaqaini timitaate. Minti te homa tenta maaqaini vi vataraqaa vaiha kia vo variqara

iriraiti, Nora Kotiraraqai iriha *ofaa* vira iha quara amitaare, tiro.

**18** Manti tivakero Nemaaniva qaiqaa tiharo, Te vo haikara ai tiva amiariraro Noravano Kotiva vi uvvara nunka timitaarire. Ti avuhainaava una variqa Rimonira autu tuahera kareva Rimonira naavuqi viharo viva ti kauqu tuma varero vi naavuraqi vi vairave. Ho vo enta vo enta ti avuhainaava Rimonira naavuqi oriqetero vira avuqaa kankakaama viro, ti kauqu tuate vairara ti, tevata una variqa avuqaa kankakaamavi vau-narave. Te naantiaravata minti minti iarera, hoe Noravano Kotiva vi uvaravata nunka timitaa-narove? tiro.

**19** Nemaaniva minti tuvaro Elisaava tiharo, Ai muntukavano paru irara vuane, tuvaro Nemaaniva Elisaara mini kero vura.

**20** Vira kero aaraini inaaraiqa vuvaro Elisaara kaiqa vaiinti Gehaasiva nai aatoqi irikero tiharo, Ike, ti nora vaiintivano Nemaaniva vira amireva i haikara varaataara vaivaro viva Nemaanira qaqi kaivaro vivo. Noravano Kotiva qaqi vaira autuqaa te quqaama turo: Te kante vi, oru vi vaiintiraqaahai vo haika vararerave, tiro.

**21** Gehaasiva mintima kero iriro, viva vaaka Nemaanira avataqiro vuvaro Nemaaniva vira tavero nai ohi ravaaqavu kero iqoka *kaariqihairo* viavintero Gehaasira vitakero tiharo, Nana haikavanoe qovaraiqivo? Netanta hoe variavo? tiro.

**22** Manti tuvaro Gehaasiva tiharo, Tetanta homa vauro. Ti nora vaiintivano ti tititeharo ari-ara mintima tiva amiane tivo: Paropetinavu Efaraimu aiqinaini varianaihai taaraqantavano

tuvuntaavo. Are hoe *silvaa* monu uta vohaiqvata, utavaaqa taaraqantavata, ti kaiqa vaiinti amiraro viri vitanta nimiarire? tivo, tiro.

**23** Gehaaativa minti tuvaro Nemaaniva tiharo, Hove. Kia *silvaa* monu uta vohaiqa vararaitira, taara uta varaane, tivakero viva 6,000 *silvaa* monu taara uta mpiqakero uta vitantavata, vaiinti taaraqantara iriharo utavaaqavata, Gehaaasira amiro, nai kaiqa vaiinti taaraqanta nititomanta vitanta Gehaaasira kahaqama vare vira avuni vi, vuru amitora.

**24** Vitanta Elisaara naavu vururaqaa vaunaini oruntovaro Gehaaativa vitantaqaahairo monu utavata vo haikavata varero vuru naavuqi vatero, Nemaanira kaiqa vaiintitanta nititomanta anirante vura.

**25** Vitanta vuvaro Gehaaativa nai nora vaiintivano vaunaini vuvaro Elisaava virara tiharo, Gehaasio, taini vuaravave aniaro? tuvaro viva tiharo, Nora vaiintio, kia te vonaini vuraukavauve anuro, tiro.

**26** Minti tuvaro Elisaava aqao tiro, Ti maraquravano vaiharo tavaivarо vi vaiintiva nai iqoka *kaariqihairo* vaavintero ai vita kairave. Gehaaasio, are kia vi monura varaataarave. Are tihara, Te vi monura aqukeha utavaaqave, *orivi* naahove, *uaini* naahove, sipisipive, purumakauve, kaiqa vaiintive, kaiqa nahentive, ho varaainarave tivakera Nemaanira monu varaaro.

**27** Are mintianara kaara Nemaanira arina numuarava aivata, are kuvuarama teraukavata, ekaa enta aruqiro vuanarove, tiro.

Elisaava minti tuvaro Gehaaativa vira mini kero tavovaro vaata ne vau numuarava viraqaa qo-

varama vuvaro vira vaatavano anomā kero han-taiqiro vaura.

## 6

*Rori qiatavano namariqihairo kumpetaqi urura*

<sup>1</sup> Vo enta paropeti vaiinti vika Elisaarara tiha, Ho tavaane. Tinavu naavu maa inaarauruma vaivo. <sup>2</sup> Kairaqe tenavu otu Iotani Namari au-vahihai katari teqake, nora naavu kaqake viraqi variare, tuvaro viva ho mintiate tiro.

<sup>3</sup> Manti tuvaro paropeti vaiinti vovano vira irero tiharo, Mpo, nora vaiintio, arevata tinavu hampata aniane, tuvaro Elisaava hove tivakero <sup>4</sup> vika hampata vumanta vika Iotani Namari vau-naini otunte katari hoqaramake teqe vaura.

<sup>5</sup> Teqe vauvaro vikaqihairo vaiinti vovano tuato roriva rahunkiro namariqi aqu vuvaro viva Elisaarara tiharo, Mpo nora vaiintio, te vo vaiinti rori vare anurava ruhunkiro namariqi aqu vivo, tiro.

<sup>6</sup> Manti tuvaro Elisaava vira irero, Tanae aqu vivo? tuvaro vaiinti viva rori viva aqu vina Elisaara umiqovaro Elisaava katari kaara inaaraiqa teqakero kaara vira viavi namariqi aqu kovaro rorivano namariqihairo kumpetero qaqlini uru ntora.

<sup>7</sup> Uru ntovaro ho Elisaava vaiinti virara tiharo, Ho nena rori varaaane, tuvaro viva namariqihairo viavi nai rori varora.

*Elisaava Siria iqoka vaiinti naatara kora*

**8** Vo enta Siria avuhainaava Isareri hampata raqireva iharo nai iqoka vaiinti taruka hampata *seri* naavu maaqa kaqaaina uvvara tivakero vo vatuka kaama tero vi vataraqaa *seri* naavu maaqa kaqareva vura.

**9** Vika vi vataraqaa nái *seri* naavu maaqa kaqatovaro, Elisaava Isareri avuhainaaraini uva varakero tiharo, Are raurihara variane. Siria vika vi vataraqaa variavo. Hauri Isareri mini vivorave, tiro.

**10** Elisaava vi uvvara vara kovaro Isareri avuhainaava iriro, vaiinti vonavu nititomanta vinavuka ampeqamake tavovaro Elisaara uvavano quqaa vaumanta Isareri kia Siria *seri* naavu maaqa kaqatonaini vura. Qaiqaa qaiqaavata Siria voqi voqi vaara autute vauvaro Elisaava virara Isareri avuhainaara tiva ami vaura.

**11** Mintiaqiro vi vauvaro Siria avuhainaava vaiinti arara itovaro nai iqoka vaiinti taruka naarama kero tiharo, Niqihairo ta vaiintivae Isareri avuhainaara mantaraini vaivo? tuvaro **12** vikaqihairo vovano aqao tiro, Nora vaiintio, kiama tinavuqihairo vovano mintivo. Paropeti vaiinti Elisaava Isarerini vaiva, vivama ekaa haika tenavu autirera unara Isareri avuhainaara tiva ami vaivo. Are nena vaitaanana *rumuraqi* vaihara uva tianara, vi uvaravata viva Isareri avuhainaara tiva ami vaivo, tiro.

**13** Manti tuvaro Siria avuhainaava vikara tiharo, Ne oru Elisaava variainara rantake tave, viri ti tiva timiqe te iqoka vaiinti nititaari oru vira ravaaqavu vare aniate, tivakero vika nititama kora.

Ho vovano uva varakero tiharo, Viva Dotaani vatukainima vaivo, tuvaro <sup>14</sup> Siria avuhainaava iqoka vaiintive, ohive, iqoka *kaarive*, vara komanta vika entaqi oru Dotaani vatuka ututuma tora.

<sup>15</sup> Mintimate vauvaro vira qararaa toqaqi Elisaara kaiqa vaiinti viva vahaaqaini vevantero tavovaro Siria iqoka vaiintive ohive iqoka *kaarive* vi vatukara ekaa ututuma tovaro viva oru Elisaarara tiharo, Oho, nora vaiintio, tetanta nantie irarave? tiro.

<sup>16</sup> Viva minti tuvaro Elisaava vira tiva amiro tiharo, Kia qetaane. Ququaama vika airi iqoka vaiinti variavarovata, titanta kahaqi variaka nái airitahaama variavo, tiro.

<sup>17</sup> Manti tivakero Elisaava Nora Kotira aarero tiharo, Noravauvo, are maa vaiintira avu rampai kairaro viva ti kahaqi variakara tunara tavaarire, tuvaro Noravano Kotiva vira kaiqa vaiinti avu rampai kovaro viva tavovaro Elisaava vau aiqnaraqaa ohive iqoka *kaari* iha itokave airitahaampiqavi Elisaara ututumate vaura.

<sup>18</sup> Ho Siria vika Elisaara ani ravaaqavu kareka uvaro Elisaava Nora Kotira aarero tiharo, Are Siria vaiinti maaka avu konkraigama kairamanta vika kia ho tavaate, tuvaro Noravano Kotiva vika avu konkraigama kora.

<sup>19</sup> Vika avu konkraigama kovaro Elisaava vika unaini oruntero vikara tiharo, Ne hampi aaraqaa aninte vo vatukaqima anintaavo. Ho ne ti avataqi aniqe te ni ntitavare ne rante varia vaiintiva vainaini vuare, tumanta vika Elisaara avata vare vuvaro viva vika ntita varero Sameria vatukaini vuru kora.

**20** Ho vika Sameria vatukaqi oriqetovaro Elisaava Nora Kotirara tiharo, Noravauvo, are vika avu rampai kaira qaiqaa koqemake tavaate, tuvaro Noravano Kotiva vika avu rampai komanta vika nái Sameria vatukaqi vaura kankomake tavora.

**21** Siria vika Sameria vatukaqi vauvaro Isareri avuhainaava Elisaara irero tiharo, Nora vaiintio, te vika arukarerave? tiro.

**22** Minti tuvaro Elisaava aqao tiro, Kia vika arukaane. Are raqihara nena navutaaka ravaaqavu taana vaiintika kia arukaantema kera, are maaka kia arukaraitira, karavata namarivata nimiramanta namake anirante nai avuhainaava vainaini vuate, tiro.

**23** Minti tuvaro viva nora karakaqa autukero Siria vika nimumanta nora. Nama kovaro viva vika nititama komanta anirante Siria avuhainaava vaunaini vura. Vi entaraqaahai Siria vika kia qaiqaavata Isareri vataini ani vika hampata iqoka raqura.

### *Siria vika Sameria vatuka ututuma tora*

**24** Vo ihinavu aitarovaro Siria King Beni-Hadaativa „Isareri hampata“ raqireva ekaa nai iqoka vaiinti nutu ruvaaquma varero oru Sameria vatuka ututuma tora.

**25** Vika vukai enta ututumate vaumanta Sameria vatukaqi vauka karara aavoqura. Mintuvaro kara koqaavano uritarero vauvaro donki qiata koqaa vaireva, 80 silvaa monu vauvaro, qaakau qaniqani vira maaravano  $\frac{1}{4}$  kiloqai vauvaro vira koqaa silvaa monu 5navu vaura.

**26** Vo enta Isareri avuhainaava vatuka vaantaavura qiataqaa ni vauvaro nahenti vovano vira

aarero tiharo, Mpo, nora vaiinti ti avuhainaao, are ti kahaqiane, tiro.

<sup>27</sup> Manti tuvaro avuhainaava nai tiva amiro tiharo, Noravano Kotiva kia ai kahaqirera, te nantiakee ai kahaqirarave? Te *uitivata uainivata* kia vatauro, tiro.

<sup>28</sup> Manti tivakero vira irero tiharo, Ho nena uva tiraqe iriare, tuvaro nahenti viva vira tiva amiro tiharo, Viti nahentiva tiriara tiharo, Kaiqetanta vate ai vainti naane namake, huratanta tenta vainti naare, timanta <sup>29</sup> te eo tivake tenta vainti naane aruke vikanti unta namakema, ho vira qararaa vi nahentira vainti aruke untake narare turaro viva nai vainti kukeqa taivo, tiro.

<sup>30</sup> Manti tuvaro avuhainaava nahentivano tu uvvara iriro, ike mpo tiharo nai utavaaqa qunahi qaanaahima kero, vaantaavura qiataqaa ni vau-manta vainti nahenti tavovaro viva nai utavaaqa qunahitora vira vetanto vaataqaa nonkutova ko-vaara utavaaqa vaura.

<sup>31</sup> Avuhainaai vaiinti viva tiharo, Oho, Elisaara okaraqaama maa maarava qovaraiqivo. Vate vira qiatavano nai kururuqaa qaqi vairera, Kotiva homa ti arukaanarove, tivakero <sup>32</sup> viva Elisaara aunta teqa kaarire tiro, vo vaiinti atitovaro vura.

Ho Elisaava nai naavuqi Sameria nora vaiinti vokuka hampata oquvi vauvaro avuhainaava atito vaiintiva aaraini qaqi ani vauvaro Elisaava nora vaiinti vika tiva nimiro tiharo, Voqama kero vaiinti aruke vaiva, viva vatema ti aunta teqa kaaina vaiintira vo atitaivarano ani vaivo. Ho vi vaiintiva maini aniramanta ne kempukaiqamake genti tinta taivaro viva kia naavuqi uriqetaarire.

Vi vaiintiva anintairaro avuhainaava naivatama  
vira avata varero anintaanarove, tiro.

<sup>33</sup> Elisaava uva ti vauvaro vira arukaarira  
vaiintiva oruntovaro avuhainaava naivata vira  
naantiara oruntora. Avuhainaava Elissaarara ti-  
haro, Oho, Noravano Kotiva tivar qora enta  
maava tinavuqi qovarama vivo. Te qumina viva  
tinavu kahaqiainara veka variarorave. „Te ai  
arukarerave,“ tiro.

## 7

<sup>1</sup> Minti tuvaro Elisaava tiharo, Are Noravano  
Kotiva ti uvara iriane. Viva mintima tivo:

Hura maa kuari avuraqaa vaiinti nahenti  
maa vatukara qenti vainaini orunte, vika porisi  
vira maara 3 kilo vainarave, baali vira maara 6  
kilo vainarave, vika 1 kinaaqai aqukeha vare-  
varave, tivo, tiro.

<sup>2</sup> Elisaava minti tuvaro iqoka vaiinti vovano  
avuhainaara kauqu tuateharo ni vauva tiharo,  
Eqane. Noravano Kotiva vate nora aaqu vara  
kairaro ntirarovata, hura kiama vi karava vari-  
narove, tiro.

Minti tuvaro Elisaava nai vira tiva amiro ti-  
haro, Te quqaama turo. Are vi haikava qovaraiqi-  
nara taveravata, kiama vi karara nенараве, тура.

### *Siria iqoka vaiinti qetake vura*

<sup>3</sup> Vi entara vaiinti 4navu vaata ne vau numuar-  
ava vikaqaa vauka Sameria vatuka qenti aaqaini  
vaura.

Vinavuka nai tiva ami nai tiva ami tiha,  
Qumina tenavu maini vaiha qutuainara veka  
variatorave? <sup>4</sup> Tenavu vatukaqji vuarera, tenavu  
karara narara variqi vi, qutuma virarave.  
Tenavu maini aaqaini variarera, tenavu qutuma

virarave. Ho kaiqenavu Siria *seri* naavu maaqa kaqataanaini vuare. Vika tinavu vehakuma timitaivera, tenavu qaqi variare. Vika tinavu haru kaivera, tenavu qutu vuare, ti.

<sup>5</sup> Manti ti vauvaro enta ireva umanta vinavuka himpi Siria vika vaunaini orunte tavovaro kia vovanovata mini vaura. <sup>6</sup> Eronaini Noravano Kotiva uva *nontanta/otata* qovarama komanta Siria vika tiha, Navutaaka iqoka vaiinti nora haikavano nai ohive, iqoka *kaarive*, vare aniavarao auvantaivo. Oho, Isareri vika Hiti avuhainaaravata Isipi avuhainaaravata koqaama kaamanta vitanta nái iqoka vaiinti ntita vare tinavu ham-pata raqireka aniavo, ti.

<sup>7</sup> Enta ireva umanta Siria vika minti tivake nái *seri* naavuve, nái ohive, donkive, qaqira mini ke, qetake aiqu autute vinura. Navutaaka harivorave ti, kia vo haikavata vararaiti, vika qaqi vinura.

<sup>8</sup> Ho vika vumanta vaiinti 4navu mini orunte vatuka viraqi oriqete *seri* naavu voqi tavo-varo karavanovata namarivanovata viraqi vau-manta vinavuka vira varake ne vaura. Namake vika Siria u haikara *kori* orive, *silvaa* orive, utavaaqave, vare muntu vahaqaini voqi vauvu tora. Vinavuka qaiqaa uru vo *seri* naavuqihai vo airairavata vare muntu voqi vauvu tora.

<sup>9</sup> Mintimake vinavuka nai tiva ami nai tiva ami tiha, Tenavu kiama koqe okara auturo. Vate tenavu tavaura haikava koqe vakaakama vaivo. Hauri tenavu vi uvvara kia voravata tiva amiraiti, aatitainara veka variariraro tinavuqaa uva variantorave. Varaiqenavu vaaka vuru avuhainaara qiata vaiintinavu tiva nimiare, ti.

**10** Ho vinavuka minti tivake entaqiraara anirante Sameriaini orunte qentiqaa maimaraara raqikuka naaramake tiha, Tenavu Siria *seri* naavyu maaqa kaqataaraqi orunte tavauramanta kia vaiinti voqavanovata viraqi variavaro kia vaiinti uvavata vaivo. „Siria vika qetake ruqemake vuavaro vika ia haikava vatuka viraqi qaqi vaivo.“ Vika kiama nái ohivata donkivata kantaruma taara qantu karaiti, kia nái *seri* naavyu kaqataara rampai karaiti, vika vi haikara vi haikara qaqi kema vuavo, ti.

**11** Minti tumanta qentiqaa maimaraara raqikuka vi uvvara iri, naveraiti vaumanta, vokuka vi uvvara vare avuhainaara vuru tiva amura.

**12** Avuhainaava entaqi vi uvvara iriro himpiro nai qiata vaiintinavuara tiharo, Te Siria vika avu aatoqi vaira irima kauro. Tenavu karara aavoqunara tavema, vika nái vatuka ke, otu ahikaqi vaara autute variavo. Vika tinavuara vatuka ke aaqaini vevantaiqe vika ravaaqavuke vika vatuka varaare ti, mintiavo, tiro.

**13** Minti tuvaro qiata vaiinti vovano tiharo, Kaiqenavu vaiinti vonavu vara kaari vinavuka oru vatukaqi Siria ampeqiha tavaate. Vika vinavuka arukaivera, vira hove. Tenavu ekaa Isarerri maini vauraukavata qutuma virarave. Vinavuka mini qutirave, tinavu hampata maini vaiha qutirave, tenavu virara hovema turo. Kaiqe ohi 5navu qaqi vainara nimiari vare vuate, tiro.

**14** Minti tumanta vika vaiinti vokuka kaamate iqoka *kaari* taaraqantavata, ohinavuvata, vi vai-

intika nimuvaro avuhainaava vinavuka nititero tiharo, Nenavu oru ampeqamake tavaate, tiro.

**15** Tumanta vaiinti vinavuka aaraini viha tavavar Siria qaqrako utavaaqarave, auvihehavaarave, vi haikara vi haikara aara voqaa voqaa vau-manta vinavuka tavamaqi vivi, Iotani Namarini otunte, viraqaaahai oturante vi haikara vi haikara tavora avuhainaara vuru tiva amura.

**16** Vuru tiva amumanta vaiinti nahentivata vi uvvara iri, vika kante Siria naavu maaqa kaqatoinaini orunte, ekaa haika vika kora, karave vo haikave varora. Vi entara Noravano Kotiva tintemake, vaiinti nahenti *porisi 3 kilo* maara vaurave, *baali 6 kilo* maara vaurave, varareka 1 kinaa aqukeha vare vaura.

**17** Ho avuhainaara kauqu tuateharo vira ham-pata ni vau vaiintiva vauvaro avuhainaava virara oru vatuka qentiqaa raqikiiane tuvaro viva mini oru himpi vaumanta vaiinti nahenti Siria naavu maaqainiara kante viha vira venta kovaro hiqintumanta vika viha vi vaiintira rakavu kovaro qutu vura. Avuhainaava Elisaara naavuni oruntovaro Elisaava vira tiva amuntemakero, vi vaiintiva qutu vura.

**18** Elisaava avuhainaara tiva amiro tiharo, Hura maa kuari avuraqaa vaiinti nahenti Same-ria qenti vainaini orunte, *porisi* vira maara 3 *kilo* vainarave, *baali* vira maara 6 *kilo* vainarave, 1 kinaa aqukeha varevarave, tuvaro **19** iqoka vaiinti qutu vuva Elisaarara tiharo, Eqaane. Noravano Kotiva vate nora aaqu vara kairaro ntirarovata, hura kiama vi karava varianarove, tuvaro Elisaava nai vira tiva amiro tiharo, Te

quaama turo. Are vi haikava qovaraiqinara taveravata, kiama vi karara nenanrave, tura.

<sup>20</sup> Ho Elisaava tunte iro vi haikava qovaraiqura. Iqoka vaiinti viva vatuka qentiana himpi vau-manta vaiinti nahenti kante viha vira ventake rakavu kovaro qutu vura.

## 8

### *Sunemihainaava nahentivano Isarerini qaiqaa anura*

<sup>1</sup> Vira maaqu qutuvura Elisaava vira qaqi vara himpimako nahentiva Sunemihainaava vauvaro Elisaava vira tiva amiro tiharo, Noravano Kotiva mintima tivo: Karara aavoqi entava tinavu vataini qovarama viro 7 ihiara variqiro vuainarara tira, are himpira nena vaintivara ntita varera oru vo vataini vairaro qora enta viva taiqa vuarire, tuvaro <sup>2</sup> nahenti viva Elisaava tunte iro, nai vaintiaravata himpiro Pirisia vataini 7 ihiara oru vaura.

<sup>3</sup> Ho 7 ihi aitarovaro viva Pirisia mini kero nai vaintiaravata orurantero Isarerini nai naavuvata nai vatavata qaiqaa nai amiarire tiro, avuhainaara tavareva vura.

<sup>4</sup> Vira tavareva vuvaro avuhainaava Elisaara kaiqa vaiinti Gehaasikantiro uva tivaqiro viharo virara tiharo, Are Elisaava nora kaiqa varaira virara ti tiva timiqe te iriare, tiro.

<sup>5</sup> Manti tuvaro Gehaasiva „nahenti vira maaquvano qutu vura,“ Elisaava qaiqaa qaqi vara himpimako uvara avuhainaara tiva ami vauvaro vi nahentiva avuhainaava vaiinti irareva vihairo anintora.

Anintovaro Gehaasiva vitanta noka tavero avuhainaarara tiharo, Ho tavaane. Maa vi nahentivave. Maa vira maaquve. Vira maaqu maava qutu vivaro Elisaava vira qaqi vara himpima kairave, tiro.

<sup>6</sup> Tuvaro ho avuhainaa vaiinti viva Elisaava vi haikara auturara nahenti vira irovaro nahenti viva vira tiva amura. Tiva amuvaro avuhainaava qiata vaiinti vo aarovaro anuvaro virara tiharo, Are maa nahentiva ina haikara ekaama nai amiane. Viva <sup>7</sup> ihiara vo vataini vaivaro maa vataraqaa vira naahoqi kara vairara irihara, vira koqaa amiane, tura.

### *Siria avuhainaava qutu vura*

<sup>7</sup> Vo enta Elisaava Siria vataini nora vatuwa Damasikusiqi vura. Vi entara Siria King Beni-Hadaativa rovara varomanta vokuka avuhainaa vaiinti vira tiva ami tiha, Elisaava vate Damasikusinima ani vaivo tura.

<sup>8</sup> Tuvaro avuhainaava Hasaelira aaramakero virara tiharo, Vo haika vira aminaravata varera oru Kotira kaiqa vaiinti tarura tavaane. Are vira tiva amiraro viva Nora Kotira ireharo tavaarire. Ti rovara taiqaanarove, kiae taiqaanarove, tiro.

<sup>9</sup> Minti tuvaro Hasaeliva Damasikusiqiraara, koqe haika, vo haika vo haika, 40 kamerivano ho varera raira kero kameriqaa vaari vatero varero Elisaava vaunaini vura. Viva mini oruntero Elisaarara tiharo, Nora vaiintio, ai paanaa vaiinti Beni-Hadaativa Siria avuhainaava ti are iananaini tititero mintima tivo: Oru vira irehara tavaane. Ti rovaravano taiqaanarove, kiae taiqaanarove? tiane tivo, tiro.

<sup>10</sup> Tuvaro Elisaava vira tiva amiro tiharo, Are virara tihara, Ai rovaravano taiqama vuunarove

tiane. Oho, Noravano Kotiva ti tiva timiharo viva qutuma vuanarove tivo, tiro. <sup>11</sup> Elisaava minti tivakero viva kempukaiqama kero Hasaelira aituti vauvaro Hasaeliva airi avu aato uti vauvaro viraqaahairo Elisaava iqi ratora.

<sup>12</sup> Iqi rate vauvaro Hasaeliva vira irero tiharo, Nora vaiintio, are nana kaarae iqi rate variaro? tuvaro Elisaava nai vira tiva amiro tiharo, Oho, naantiara are airi qora okara Isareri vaiinti nahenti autu nimitenarara irihama te iqi rate vauro. Are iqoka raqihara Isareri vika kempuka naavu maaqa iha quarakera, vika qaraaka vaiinti iqoka paipeqohaira arukera, vika vainti naati utu vataqaa tairi kaira qutu vivarave. Are vika nahenti vainti taiqama vika iqoka paipeqohaira auhavau *kuhia/qumpihia* kenarave, tiro.

<sup>13</sup> Elisaava minti tuvaro Hasaeliva aqao tiro, Te qaqi qumina vaiintivanoma vauro. Nantiabee te vi haikara nora haika autirarave? tuvaro Elisaava vira tiva amiro tiharo, Noravano Kotiva ti humiqeharo arema Siria avuhainaa vaiintiqama vinarave tivo, tiro.

<sup>14</sup> Elisaava minti tuvaro Hasaeliva anirantero King Beni-Hadaativa vaunaini vuvaro avuhainaava vira irero tiharo, Elisaava nana uvae ai tiva amivo? tuvaro Hasaeliva vira tiva amiro tiharo, Viva tiriara tiharo, Ai rovaravano taiqa virara are homa vainarave tivo, tiro.

<sup>15</sup> Minti tiva amirovata, vira qararaa Hasaeliva *paraanke* varero muntu namariqi quntama kero varero vuru avuhainaa vaiinti viri naavuma tovaro avuhainaa vaiintivano kia ai-hovata vararaitiro, qutu vura. Beni-Hadaativa

qutu vuvaro Hasaeliva vira vatuka varero Siria avuhainaa vaiintiqama vura.

*Jehoraamuva Iutaa avuhainaava vaura*

<sup>16</sup> Ahaapira maaqu Joraamuva 5 ihiara Isareriqaa raqiki vau entara, Jehosafaatira maaqu Jehoraamuva nai qora vatuka varero Iutaa avuhainaa vaiintiqama viro vaura. <sup>17</sup> Vi entara viva 32 ihi varakova avuhainaa vaiintiqama viro 8 ihiara Ieruharemiqi vaiharo Iutaaqaa raqiki vaura.

<sup>18</sup> Viva Isareri King Ahaapira raavura varatovara tiro, viva Ahaapira anku aanantero, Isareri avuhainaa vaiinti vokuka qora okara autuntema kero, Nora Kotira avuqaa qora okara auti vaura.

<sup>19</sup> Mintuvarovata, Noravano Kotiva nai kaiqa vaiinti Devitirarao tiro, viva kia Iutaa vehi autu taiqakaataa uvaro kia vika taiqa kora. Haaru viva nai kauqu ainqiqa aqukeharo ekaa enta Devitira ankuqihairo vaiinti vovano avuhainaa vaiinti varianarove turara iriharo kia mintura.

<sup>20</sup> Jehoraamuva Iutaaqaa raqiki vau entara Idomu vika kia Iutaa avuhainaa vaiinti vira vevaaraini vairaiti, vika vaiinti vo kaama tovaro viva vika avuhainaa vaiintivano vaura.

<sup>21</sup> Mintuvaro Jehoraamuva iqoka *kaariqi* niha raquka ekaa ntita varero, Idomu hampata raqireva Sai vatukaini oruntomanta, Idomu vika ani Jehoraamuravata vira qiata vaiintinavu iqoka *kaariqaa* raqikukavata ututumate vaura. Ututumate vauvaro Jehoraamuva entaqi himpiro Idomu ututoraqihairo ruqema kero vumanta vira iqoka vaiinti qetake iqoka qaquirake anirante maaqaini vura.

**22** Vi entara Iutaa kia Idomu naatarake iqoka qaqrake vurara ti, maa entaravata Idomu vika kia Iutaa vevaaraini vairaiti, náivano náiqaā raqiki variara. Vi entara Lipina vatukaihainaaka vikavata kia Iutaa vevaaraini vaireka auti vaura.

**23** Ho King Jehoraamuva ekaa vo kaiqa vo kaiqa varo uvara vuku vo, *Iutaa Avuhainaaka Uva Okarave* tu vukuraqi qara ntuvatora.

**24** Jehoraamuva qutu yumanta vira vaata vare nai kaivaqaukavara quntama tonaini Devitira Vatukave turaqi vuru quntama tora. Quntama tovaro vira maaqu Ahasiava vira vatuka varero avuhainaa vaiintiqama viro vaura.

### *Ahasiava Iutaa avuhainaava vaura*

**25** Ahaapira maaqu Joraamuva 12 ihiara Isareriqaa raqiki vau entara, Jehoraamura maaqu Ahasiava avuhainaa vaiintiqama viro Iutaaqaa raqiki vaura.

**26** Ahasiava 22 ihi varakova avuhainaa vaiintiqama viro Ieruharemipi vohaa ihiara raqikura. Vira nova Ataliaava Isarer King Ahaapira raavurvavano vauvaro vira naaqua Isarer King Omuriva vaura.

**27** Ahasiara nova Ahaapira ankuqhainaa na-hentivano vaurara tiro, Ahaapira anku qora okara autuntema kero, Ahasiavavata Nora Kotira avuqaa qora okara auti vaura.

**28** Vo enta King Ahasiava Isarer King Joraamukantiro Siria King Hasaelira hampata raqireka oru Ramoti vatuka aumanto Gileaatini raqi vauvaro Siria iqoka vaiinti vika Joraamura arutora.

<sup>29</sup> Vira arutovaro viva iqoka qaqlira kero vaata arutora tavanta vuarire tiro, oru Jeseririni vaura. Viva mini vauvaro Ahasiava vira tavareva mini vura.

## 9

### *Jehura kaamatora*

<sup>1</sup> King Joraamuva Jeseririni vauvaro paropeti vaiinti Elisaava paropeti vaiintiqihairo vaiinti vo aaramakero virara tiharo, Are qerama varera, orivi vahavera taqu maa varera Gileaati vataini vai vatukara Ramotini vuane.

<sup>2</sup> Mini oruntera Nimisira nainti Jehosafaatira maaqu Jehura rantakaane. Viva nai hana vaiinti hampata vainaraqihairo are vira vita varera vo rumuqi vuru kera <sup>3</sup> vahavera vira qiataqaa aqu amitehara vira mintima tiva amiane: Noravano Kotiva ariara tiharo, Te ai kaamate ariara viva Isareru avuhainaa vaiintima vaivo turo, tiane.

Are minti tivakera kia vairaitira, qenti qantua kera kantama vuane, tiro. <sup>4</sup> Elisaava minti tuvaro qaraaka paropeti viva himpiro Ramotini vura.

<sup>5</sup> Viva mini oruntero tavomanta iqoka vaiintiqaa raqiki vauka ruvaaqumavi vaiha uva ti vauvaro viva vikara tiharo, Ninavu qiata vaiinti te uva tiva amirera anuro, tuvaro Jehuva vira irero, Are takantira uva tirevave? tuvaro viva anti uva tirerave tiro.

<sup>6</sup> Minti tuvaro Jehuva himpiro vira hampata naavuqi oriagetovaro paropeti vaiinti viva *orivi* vahavera Jehura qiataqaa aqu amitero vira tiva amiro tiharo, Noravano Kotiva tinavu Isareru Variqavano mintima tivo:

Te yate ai kaama taarirara are Isareri avuhainaa vaiintiqama vira, ti vaiinti nahenti vikaqaa raqikiane.

<sup>7</sup> Are nora vaiinti Ahaapira anku vika ekaa aru taiqa kaane. Are mintiraqe te Kuini Jesebelira nai qora kaiqa kaara vira qoraiqama amitarerave. Viva ti paropetivata, ti kaiqa vaiinti vonavuvata, arukai nahentivave.

<sup>8</sup> Are Ahaapira anku ekaa vehi autu taiqa kaane. Vira anku nora vaiintive, vehi vaiintive, te ekaa vika aru taiqa karerave.

<sup>9</sup> Te haaru Nebaatira maaqu Jeroboamura ankuvata, Ahiaara maaqu Basaara ankuvata, qoraiqama nimitaunantemake, vikavata mintima nimitaari kia voqavanovata qaqi vaivarave. <sup>10</sup> Jesebeliva qutu viramanta Jeseriri vatukaihainaa vairinavu vira vaata nama taiqa kaimanta kiama ho vira vaata vare muntu quntevarave tivo, tiro.

Paropeti vaiinti viva Noravano Kotiva tu uvarta tiva taiqakero, qenti qantuakero vevantero kantama vúra.

<sup>11</sup> Kantama vuvaro Jehuva vevantero nai kana qiai vaiinti vaunaini vumanta vika vira ireha tiha, Ekaa haikavano hoe vaivo? Nantivaroe vuera vaiinti viva ai ani tavaivo? tuvaro Jehuva vika tiva nimiro tiharo, Ne mintia vaiintika tia okarara iri tavaarave, tiro.

<sup>12</sup> Tumanta vika aqao ti, Tenavu kia iri tavau-narave. Are vira uva tinavu tiva timiraqe iriare, tuvaro Jehuva vikara tiharo, Vi vaiintiva ti viri tiva timiro tiharo, Noravano Kotiva mintima tivo: Te yate ai kaama taarirara are Isareri avuhainaa vaiintiqama vinarave tivo, tiro.

<sup>13</sup> Jehuva minti tumanta vira kenauka vaakama nái vukai tavuna aqutora ravaqaake aiqu ntavaqaí vuavau vuqi amitovaro Jehuva viraqaa himpi vaumanta vika *aanumaara/noma* vuqaheha naveraitiha, Jehuva „Isarerí“ avuhainaa vaiintivano vaivo, tura.

### *Jehuva Joraamura arukora*

<sup>14</sup> Manti tuvaro Nimisira nainti Jehosafaatira maaqu Jehuva Ramotini vaiharo nai kena iqoka vaiintinavu hampata Joraamura arukerara ti vaura.

Isarerí vika Siria King Hasaelira hampata raqu entara Siria vika Joraamura arutovaro <sup>15</sup> viva iqoka qaqira kero nai vaata arutora tavanta vuarire tiro, Jeseririni oru vaura.

Mintuvaro Jehuva nai kena iqoka vaiintiara tiharo, Nenavu quqaa tiriara tiha viva Isarerí avuhainaa vaiintivano vaivo tivera, nenavu ko-qemake raqikivaro Ramotihainaa vaiinti vovano kia vi uvara varero Jeseririni tenavu autirera iaina uvara vuru tiva nimiarire, tiro. <sup>16</sup> Jehuva minti tivakero nai iqoka *kaariqi* vaarintero Ramoti kero Jeseririni vura.

King Joraamura vaatavano kia anomia tavanta vuvaro viva Jeseririni nai naavuqi taintaqaa vaitatero vauvaro Iutaa King Ahasiavavata mini otuntero vira tave vaura.

<sup>17</sup> Vira tave vauvaro vaiinti vovano Jeseriri vatuka vaantaavura qiataqaa maimaraara raqiki vauva vaiharo tavovaro Jehura iqoka vaiintinavu vira hampata ani vaura. Ani vauvaro viva naveraitiharo, Te tavauramanta iqoka vaiintima aaraini aniavo, tiro.

Minti tuvaro Joraamuva tiharo, Ne iqoka vaiinti vo tivaro viva ohiqaa kantero aaraini oruntero vika ireharo, Ne tara mantaraini variakae aniavo? tiarire, tiro.

**18** Ho minti tuvaro iqoka vaiinti vovano ohiqaa aaraini oruntero Jehurara tiharo, Avuhainaava vaiintivano are aniana okarara irirevave. Are maateraiqirevae aniaro? tuvaro Jehuva vira tiva amiro tiharo, Vira kia ai kaiqavauve. Are tinavu naanticaraini tinavu avataqira aniane, tiro.

Tuvaro maimaraara raqikuva tavovaro iqoka vaiinti viva kia orurantero anuvaro viva avuhainaava vaiintivano vaunaini uva varakero tiharo, Vika ianaini vi vaiintiva kia orurantero anivo, tiro.

**19** Tuvaro avuhainaava vaiinti vo vara kovaro vura. Vivavata oruntero Jehurara tiharo, Avuhainaava are aniana okarara irirevave. Are maateraiqirevae aniaro? tuvaro Jehuva virara tiharo, Vira kia ai kaiqavauve. Are tinavu naanticaraini tinavu avataqira aniane, tiro.

**20** Tuvaro maimaraara raqikuva tavovaro vaiinti viva kia orurantero anuvaro viva avuhainaava vaunaini uva varakero tiharo, Vaiinti vivavata vika ianaini viva kiama qaiqaa orurantero anivo. Te tavauraro avuni iqoka *kaariqi* ani vai vaiintiva, viva Nimisira maaqu Jehura voqaantema kero, kante ani vaivo. Jehuva iqoka *kaariqi* vueraiqaaavi vaiintiva kantaintema kero, kante vaivama vaivo, tiro.

**21** Minti tuvaro King Joraamuva tiharo, Ti iqoka *kaari* qerama timitaane, tumanta vika qerama

amitovaro Joraamuva nai iqoka *kaariqi* vaarintovaro Iutaa King Ahasiava iqoka *kaari* voqi vaarintora. Vitanta aaraini Jehura vitakareka vivi, Jeseririhainaai vaa inti Nabotiva u vatava vaunaini oru vira vitakora.

<sup>22</sup> Joraamuva oru Jehura tavero viva vira irero tiharo, Jehuo, are maateraiqirevae aniaro? tuvaro Jehuva nai tiva amiro tiharo, Oho, ai nova Jesebeliva una variqanavu quahama nimiteharo viva vaana kaiqa vare vairara ti, nantiakee tenavu maateraiqiha vairarave? tiro.

<sup>23</sup> Manti tuvaro Joraamuva Jehura uva iriro vaaka nai iqoka *kaari* tuqantaakero anirantero kanteharo naveraitiro, Oho, Ahasiao, are ti qoraiqama timitareva aniaro, tiro.

<sup>24</sup> Manti tivakero vuvaro Jehuva veva hinta utukero vutu Joraamura tauvaqakanta arutovaro vevavano vira muntuka raqonta kovaro viva nai iqoka *kaariqi* hiqintiro qutu vura.

<sup>25</sup> Ho qutu vuvaro Jehuva nai kahaqi vau vaiintira Bitikaarara tiharo, Joraamura vaata varakera Jeseririhainaara Nabotira vataqaa aqukaane. Haaru Noravano Kotiva Joraamura qora Ahaapira tiva amu uvvara, are qaqqie vi uvvara iritaaro? Vi entara tetanta ohiqaa oquvi vaiha Ahaapira naantiaraini vi vauraro Noravano Kotiva Ahaapirara tiharo,

<sup>26</sup> Te tavauramanta enta vaiinti vokiaka Nabotiravata vira maaqunavuvata arukaarave. Oho, te Noravano Kotika quqaama turo: Naantiara ai okara kaara te Nabotira vataqaa nina qoraiqama amitaainarave, turave. (1 King 21:21, 29)

Ho are Joraamura vaata varakera Nabotira vataqaa viavi aqu kairaro Noravano Kotiva tivatai uvava vivau variarire, tura.

### *Iutaa King Ahasiava qutu vura*

<sup>27</sup> Iutaa King Ahasiava tavovaro Joraamura arukovaro viva qetakero nai iqoka *kaariqi* ruqemake vuare tiro, Beti-Hagani vatukaini vi vau aararaqaa kantama vuvaro Jehuva nai iqoka vaiinti hampata Ahasiara avataqiro vura.

Jehuva naveraitiharo, Viravata arukaate, tumanta vira iqoka vaiinti vira avataqi vuvaro Ahasiava nai iqoka *kaariqi* viviro, Guru Aiqinaini vi vau aararaqaa Ipiremi vatuka aumanto oruntomanta vika *vevaqohai*, Ahasiara arutovaro viva viviro, Megido vatukaini oruntero qutu vura.

<sup>28</sup> Viva qutu vumanta vira kaiqa vaiintinavu iqoka *kaari* voqi vira vaata vara vaari vate, vare vuru Ieruharemini nai kaivaqara Devitira vatukave turaqi quntama tora. <sup>29</sup> (Joraamuva 11 ihiara Isareriqaa raqiki vau entara Ahasiava Iutaa avuhainaa vaiintiqama vura.)

### *Kuini Jesebelira arukora*

<sup>30</sup> Jehuva Ahasiara arukero orurantero Jeseririni anura.

Ho Jesebeliva mini vaharo Joraamuva qutu vu uvara iriro, nai avu kaukiqaa *peni* aqutero qiata kaukivata rumpa tero, oru *uintuaqaa* himpi vaharo aaraini vuavu tave vaura.

<sup>31</sup> Viva vuavu tavovaro Jehuva vaantaavura qentiqaa uriqetovaro Jesebeliva naveraitiharo, Are maateraiqirevae aniaro? Oho, are Simurira

aanantera nena nora vaiinti aru kaaravama aniaro, tiro.

(1 King 16:8-12)

<sup>32</sup> Minti tuvaro Jehuva vuruvi vira tavero naveraitiharo, Tauka taukae ti mantaraini variavo? tumanta kaiqa vaiinti taaraqantae, taaraqanta vohaiqae, kante aninte vuavu tave vauvaro <sup>33</sup> Jehuva vinavukara tiharo, Vira uintuaqihai vara vaavi aqu kaate, tumanta vinavuka Jesebelira vara vaavi aqu kovaro vira vaatavano vataqaa tairi vuvaro naarevano naavuqaavata ohitantaqaavata taatauviro vaura. Jehuva qaqi komanta vira ohitanta aiquqohai Jesebelira vaata rakavu raakavumake vatora.

<sup>34</sup> Ho Jehuva avuhainaara naavuqi oriqetero karavata namarivata nama kero viraqi vauka tiva nimiro tiharo, Ne otu Kotiva virara vaaquqama vuane ti nahentira vaata vara kaate. Viva avuhainaara raavuravano vaimantara ti, ne vira vaata vare muntu quntama taate, tiro.

<sup>35</sup> Tumanta ho vika vira vaata vare quintaare ti, vevante tavovaro vira qiata vuhaarive, aiqu kauqu kakahive viraqai <sup>36</sup> vaumanta vika vuru Jehura tiva amuvaro viva tiharo, Noravano Kotiva nai kaiqa vaiinti Tisibehainaara Elaitaara no-qihairo ti uvava vate vivauma vaivo. Noravano Kotiva mintima tivo:

Naantiara Jeseririqiraa vairi vika Jesebelira vaata nama kevarave.

<sup>37</sup> Vira vaata hini viti keva raha voqaara voqaa voqaa vaira, vaiinti vira taveha kia Jesebelira vaata viraaqamake tavevarave turave, tiro.

# 10

## *Ahaapiva kuvuarama toka aru taiqa kora*

<sup>1</sup> King Ahaapira maaqunavu Sameria vatukaini 70navu vaura. Ho Jehuva qara ntuvakero qiata vaiintive, nora vaiintive, Ahaapira vaintivarraqaa raqikukave, vika vaunaini vara kero tiharo,

<sup>2</sup> Ahaapira maaqunavu ni hampata variamanta ne iqoka *kaarive*, ohive, auvihehavaave, vate variavaro kempuka vaantaavuravano ni vatuka ututuma tero vairave.

<sup>3</sup> Ho Ahaapira maaqunavuqihai koqe vaiinti vo kaama taivaro viva *Isareris* avuhainaava vairamanta ne tiriara viva vi vaiintira vatuka varaantorave ti, ti hampata ani iqoka raquate, tiro.

<sup>4</sup> Minti tivakero qara vara komanta vika vi qarara tave, voqamake qeteha tiha, Oho, Jehuva avuhainaava vaiinti taaraqanta naatara kaivave. Nantiabee tenavu vira aatara kararave? ti.

<sup>5</sup> Minti tivake avuhainaara naavuqaa raqikuvave, vi vatukaraqaa raqiki vauvave, nora vaiinti vonavuve, Ahaapira vaintivarraqaa raqikukave, ekaa vika vika Jehuraini uva varake tiha,

Tenavu ekaa ai kaiqa vaiinti vaiha geramate, ai antuqa avatarera vauro. Tenavu kiama ho vo vaiinti kaama taariraro avuhainaava vaiintivano varianarove. Ho are nana haika autireva inara, qaqqiqai autuane, ti.

<sup>6</sup> Vika minti tivake qara vara kovaro Jehuva tavero, qaiqaa qara varakero vikara tiharo,

Ne ekaa ti vevaaraini vaiha ti hantuqa avatareka ivera, *ne ekaa Ahaapira maaqunavu aunta teqake* hura maa kuari

avuraqaa vika qiata vare te iainanaini Jeseririni viri kaate, tiro.

Vi entara Sameriaini nora vaiintinayu Ahaapira maaqu 70navuqaa raqiki vaura. <sup>7</sup> Ho nora vaiinti vika Jehura qara tave, ekaa Ahaapira vanti 70navu aruke, vika aunta teqake vika qiata rutantuto utanavuraqi ntuvake, Jeseririni Jehuva unaini vara kovaro vura.

<sup>8</sup> Mintuvaro vainti vovano Jehura tiva amiro tiharo, Vika Ahaapira maaqunavu qiata vare aniaivo, tuvaro Jehuva vika tiva nimiro tiharo, Vatuka qentiana rairake taaraqantaqaa vataivaro huru aatitaarire, tiro.

<sup>9</sup> Minti tivakero vira qararaa toqaqi Jehuva himpiro vatuka qenti vaunaini otu vumanta airi vaiinti nahenti mini ruvaaqumavi vauvaro Jehuva vikara tiharo, Te tenta nora vaiinti Joramura qoraiqama karera aato iritaunara te vira aru kauro. Kiama vi uvava niqaa vairaitiro, tintaqama vaivo. Ho taukae maanavuka arukaavo?

<sup>10</sup> Ho iriate. Haaru Noravano Kotiva Ahaapira ankuvano qoraiqama virara tivatai uvava kia voqavanovata quminaiqianarove. Haaru Noravano Kotiva nai kaiqa vaiinti Elaitaara noqaahairo te minti minti irerave tivatai uvava vate vivauma vaivo, tiro.

<sup>11</sup> Jehuva minti tivakero Ahaapira anku Jeseririqi vaukave, vira qiata vaiintive, vira tontive, Ahaapira kahaqicha *ofaa* iha quare vaukave, ekaa aru taiqa komanta kia voqavanovata qaqi vaura.

*Jehuva Ahasiara ankuvata ari kora*

**12** Ho Jehuva „nai iqoka vaiinti hampata, Je-seriri kero Sameriaini vura. Vika aaraini vivi, *Sipisipiqa Raqikiaka Ruvaaqumavi Varianainive* tu vataraqaa oruntora.

**13** Mini oruntero viva vaiinti vokuka tavero vika irero tiharo, Ne taihainaakaye? tumanta vika vira tiva ami tiha, Tenavu King Ahasiara qata vakaukavarave. Tenavu Jeseririni oru King Joraamura navunaakavata, Kuini Jesebelira navunaakavata, uva mantarera anuro, ti.

**14** Manti tuvaro Jehuva nai iqoka vaiintiara tiharo, Ekaa vika ravaaqavu kaate, tumanta vira iqoka vaiinti vi vaiintika ravaaqavu vare, *ruvu/mpumpi* vo vi mantaraini vauraqi vuru vi vaiintika 42navu ekaa aru taiqa kovaro kia voqavanovata qaqi vaura.

### *Jehuva Ahaapira anku ekaa aru taiqa kora*

**15** Jehuva qaiqaa aaraini viharo Rekaapira maaqu Jonadaapira rantakero vira uva mantero tiharo, Te ai tontivano vaurara arevata ti tontivanoe variaro? tuvaro Jonadaapiva eo tuvaro Jehuva tiharo, Are quqaa mintima vairera, kauqu timiane, tuvaro nai kauqu vira amuvaro Jehuva Jonadaapira nai iqoka *kaariqi* vara vaari kora.

**16** Vaari kero virara tiharo, Are ti hampata aniraqe te tenta Nora Kotirara kempukaiqaake iriqi vuainara ai umiqaarirara tavaane, tuvaro Jonadaapiva hove tivakero, vira hampata Same-riaini vura.

**17** Mini oruntero Jehuva Ahaapira vaintivara ekaara vitini qaqi vauka, ekaa vikavata aru taiqa kora. Noravano Kotiva nai kaiqa vaiinti Elaitaara tiva amu uvava vivauma vaura.

*Baalirara quahama amitoka aru taiqa kora*

<sup>18</sup> Jehuva Sameriaqi vaiharo ekaa vaiinti nahenti naaramakero vikara tiharo, Haaru King Ahaapiva Baalirara quaheharo vira kaiqa vara amitorave. Ho vate te voqavata Baalira kaiqa vara amitarerave, tiro.

<sup>19</sup> Minti tivakero Jehuva vikara tiharo, Ne ekaa Baalira paropeti vaiintive, vira kaiqa vara amite varia vaiintikave, vira *ofaa* iha quara amite varia vaiintikave, ekaa vika vika naarama ruvaaquma kaate. Te nora *ofaa* Baalirara iha quara amitainarara ti, kiama voqavanovata mini variate. Vovano kia anirera, ho viva qutuma vuanarove, tiro. Jehuva Baalira quahama amito vaiinti nahentika aru taiqa kareva iharo una uva minti tura.

<sup>20</sup> Jehuva minti tivakero qaiqaa tiharo, Ne enta vo kaama taimanta vi entaraqaa vaiinti nahenti ruvaaqumavi vaiha Baalira autu tuahera kaate, tumanta enta vo kaama tora. <sup>21</sup> Jehuva ekaa Isarerini uva vara komanta Baalira quahama amitoka ekaa hihai hihai ani ruvaaquma vuvaro kia voqavanovata maaqaini vaura. Vika una variqa Baalira naavuqi oriqete mpiqa kora.

<sup>22</sup> Ekaa mpiqa vuvaro Jehuva oruntero utavaaqa nonkuteha Baalira kaiqa vara amitoraqaan raqiku vaiintirara tiharo, Vi utavaaqara vara kera Baalira quahama amitareka aniaka nimiane, tuvaro viva Jehuva tunte iro nimura.

<sup>23</sup> Niumanta Jehuvavata, Rekaapira maaqu Jonadaapivavata, una variqa Baalira naavuqi

oriqetora. Jehuva vaiinti nahenti Baalira quahama amitokara tiharo, Hauri Nora Kotira autu tuahere variaka tinavu hampata vaivorave. Ne aitutumake tavaimanta Baalirara maara ti variakaqai maaqi variate, tiro. <sup>24</sup> Ho vitanta oriqete kaintu iha quara amito *oфаaravata*, vo *oфаavata* Baalira iha quara amitareka vura.

Vi entara avuni Jehuva vaiinti 80navu kaama tero vika tiva nimiru tiharo, Ne Baalira naavu vahaaqaini ani vekaiqiha variate, tivakero viva tiharo, Ne una variqa Baalira quahama amite variaka ekaama aru taiqa kaate. Ho iriate. Niqhairo vovano vo qaqi kairaro virera, ho vivama vira vatuka varero qutu vuanarove, tura.

<sup>25</sup> Ho Jehuva ekaara kaintu iha quara amito *oфаara* quara taiqakero, vevantero nai iqoka vaiintivata vika qiata vaiintivata tiva nimiru tiharo, Ne oriqete ekaama vika aru taiqa kaate. Kiama voqavata qaqi kaimanta variate, tiro.

Tumanta ho vika oriqete iqoka paipeqohai ekaa aru taiqake, vika vaata rarau vare vahaqaini muntu ke, tuvurante una variqa Baalira *rumuqi* oriqete, <sup>26</sup> „Baalira“ ara amito ori *pohira* nkaqu vare muntu vahaqqaini rukavuke, <sup>27</sup> vira *maraqura/varaha* aututoravata rukavuke, naavuvata ravantiaqa aqukora. Mintimake vi vatukara qaqi komanta vaiinti nahenti viraqi rahate vaura. Maa entaravata vi vatukava rahate varia vatukavama vairo.

<sup>28</sup> Ho Jehuva mintimakero vaiinti nahenti Isarerini una variqa Baalirara maara tura vehi autu taiqakora.

**29-31** Noravano Kotiva Jehurara tiharo, *Te tunantema kera are Ahaapira anku vehi autu taiqa kaanarara ti, te ariara koqe kaiqa varaaro turo. Te qaqi kaariraro naantiara ai maaquvanovata, viva vatatairauka taaramo navuvata Isareriqaa raqikiqi vivarave, tiro.*

Minti tuvarovata, Jehuva kia Isareri Variqa Noravano Kotiva tivato uvara koqemakero iriraitiro, viva Nebaatira maaqu Jeroboamuva qora okara autuntema kero autura. Haaru Jeroboamuva purumakau naati *maraqura/ varaha* taaraqanta *koriqohairo* autukero, vo Beteli vatukaqi vatero vo Daaniqi vatero Isareri kuntama virivi komanta vika vi haikatanta quahama nimite vaura. (1 King 12:28-39)

Jehuva kia vi okarara qaqlira karaitiro, qaqlira autuqiro vi vaura.

### *Jehuva qutu vura*

**32** Vi entara Jehuva avuhainaa vaiinti vau entara Noravano Kotiva qaqlira komanta navutaaka Isareri naatarake vika vata hini varora. Siria King Hasaeliva Isareri vata **33** Iotani Namari hini mantaraini kuari avu urinaini vaura varora. Hasaeliva vata varova vaireva, Aroe vatuka Anoni Namariqaahairo hoqarama tero viviro, Gileaati vatainivata Besani vatainivata oruntero vi vatara varora. Vi vatava Gaatira ankuve, Rubenira ankuve, Manasera ankuve, vika u vatava vaura.

**34** Ho Jehuva vo kaiqa vo kaiqa varo uvarave, viva kempuka kaiqa varo uvarave, ekaa vi uvvara vuku vo, *Isareri Avuhainaaka Uva Okarave* tu vukuraqi qara ntuvatora.

<sup>35</sup> Jehuva qutu vumanta vira Sameriaini quntama tora. Quntama tovaro vira maaqu Jehoahaasiva nai qora vatuka varero avuhainaa vaiintiqama vura.

<sup>36</sup> Jehuva Sameria vatukaqi vahiaro, 28 ihiara Isareriqaa raqiki vaura.

## 11

### *Ataliaava Iutaa ayuhainaava vaura*

<sup>1</sup> Iutaa King Ahasiava qutu vuvaro vira nova Ataliaava vi uvara iriro, „viva te avuhainaa nahentivano vairerave tivakero“, iqoka vaiinti tiva nimiro tiharo, Ne avuhainaara anku ekaama aru taiqa kaate, tiro.

<sup>2</sup> Minti tumantavata, iqoka vaiinti vika Ahasiara maaqu Joaasira kia arukora. Iqoka vaiinti vika Ahasiara maaqunavu arukovaro, Ahasiara aura Jehosebaava\* Joaasiravata arukevorave tiro, vi vaintiruravata, viraqaa raqiki vau nahentiravata, ntita varero „Kotira Naavu rumu voqi“ vaito haikara vatoraqi vitanta kukeqa tovaro Ataliaava kia Joaasira aru kora.

<sup>3</sup> Jehosebaava Nora Kotira naavuqi 6 ihiara Joaasira kukeqa tovaro vauvaro Ataliaava avuhainaa nahentivano vahiaro Iutaaqaa raqiki vaura.

<sup>4</sup> Ho 7 ihi anintovaro „Kotira kaiqa vara amite vau vaiintiva“ Jehoiadaava avuhainaa nahentiqaa raqikukavata, vira naavuqaa raqikuka qitata vaiintivata, viva unaini aniate tiro, uva vara komanta anuvaro Jehoiadaava Nora Kotira

---

\* **11:2:** Jehosebaava Isarer King Joraamura raavuravano vaura.

Naavuqi vika hampata uva vo tiva taatau kero tiharo, Ne nenta aiqiqaa kauqu aqukeha tenavu vi uvara avatarerave tiate tivakero, viraqaahairo viva Ahasiara maaqu Joasira vita varero muntu vika numiqora.

<sup>5</sup> Vira vika numiqero, Jehoiadaava vika tiva nimiro tiharo, „Tenavu maa vaintirura kaama taariraro viva avuhainaava variarire.“ Ho iqoka vaiinti ne minti minti iate. Niqihai taaramo varavano Maara Entaqaa kaiqa hoqaramate ne mintima iate:

Vo varavano avuhainaara naavuqaa maimaraara raqiki vaimanta, <sup>6</sup> vo ankuvano hohaa qenti vo Suri qentive tiaraqaa maimaraara raqiki vaimanta, vo varavano iqoka vaiinti vika tauvaqaini vaiha hohaa qenti voqaa raqikiate. Ne taaramo varavano mintimakeha avuhainaara naavuqaa maimaraara raqikiate.

<sup>7</sup> Niqihai taara varavano Maara Entaqaa kaiqa taiqake auraara variaka, ne mintima iate:

Ne Nora Kotira Naavu vainaini oru vaiha King Joasiraqaa raqikiate. <sup>8</sup> Ne vira ututumake himpi vaiha iqoka paipe kauquqi tuateha viraqaa koqemake raqiki amitaate. Viva vona vireva irera, nevata vira hampata vuate. Vo vaiintivano vira aumanto anireva irera, ne vi vaiintira aru kaate, tiro.

<sup>9</sup> Minti tumanta iqoka vaiintiqa raqikuka Jehoiadaava tunte ura. Vika iqoka vaiinti kaiqa varake Maara Entaqaa auraara vauka ntita vare, vokuka vika vatuka vare kaiqa varokavata ntita vare, Jehoiadaava vaunaini anura.

**10** Anuvaro Jehoiadaava Nora Kotira Naavuqhairo Devitiva vato haikara, vaantaara vonavu varero, kainke vonavu varero iqoka vaiintiqaarraquka nimumanta **11** vika vareoru Nora Kotira Naavu avuni himpi vaiha vi haikara nái kauquqi tuateha avuhainaaraqaa raqiki vaura. Vika Nora Kotira Naavu *sauti* mantaraihai hogaramake naiqi naiqi himpi vaiha raqikiqivi, Kotira *ofaa* tainta ori aatarake, *noti* mantaraini oruntora.

**12** Vika mintimake maimaraara raqiki vauvaro Jehoiadaava „Nora Kotira Naavuqhairo“ Joaasira vita varero vahaqaini vevantero Joaasira qiatataqaa avuhainaa tovaqa aqu amitero, vuku vo, Kotiva tivato uvvara vau vukura vira amura.

Vika *orivi* vahavera qihiake vira qiatataqaa aqute vira kaama tomanta vaianti nahenti vika kauqu ruqutiha naveraitiha, Joaasiva avuhainaavama vaivo. Viva vukai enta variqiro vuarire, tivakeha naveraiti vaura.

**13** Iqoka vaiintivata vaiinti nahentivata vika naveraitiha oi aai ti vauvaro Ataliaava uva *nontanta/otata* iriro, viva vevantero vaiinti nahenti Nora Kotira Naavuni ruvaaqumavi vau-naini vura.

**14** Viva mini oruntero tavovaro avuhainaara qaraaka kaamatova vukai *pohi* vo aratoraqaa, haaru avuhainaaka vokuka untema kero, vivavata vi *pohira* tataaqa himpiro vaura. Viva mini vaumanta iqoka vaiintiqaarraqukavata, *aanumaara/noma* vuaqe vaukavata, vika avuhainaara aumanto himpi vaumanta, vaiinti nahenti vika quahe vaumanta vikaqihai vokuka *aanumaara/noma* vuaqe vaura.

Ataliaava tavero, nai utavaaqa qunahi qaanaahima kero naveraitiharo, Oho, ne uva taatauke ti qaqira kareka auti variavo. Ne ti qaqira kareka auti variavo, tiro.

<sup>15</sup> Manti tuvaro Jehoiadaava iqoka vaiintiqaarraqi kua intika tiva nimiro tiharo, Haurine Nora Kotira Naavu aumanto vi nahentira arukevorave. Iqoka vaiinti himpi variaka ne vika avutaaqaa vira vita vare vitare vonaini vuru vira arukaate. Vokiaka vira ruaruama amitareka auti vaivera, ho ne vikavata arukaate, tumanta <sup>16</sup> vika Ataliaara ravaaqavuke vare avuhainaara naavu hohaa qenti vo, ohi oriqete vau qentiraqaa vira vuru arukora.

### *Jehoiadaava qora okara qaqira kora*

<sup>17</sup> King Joasiravata, vaiinti nahentivata, vika Nora Kotira vaiinti nahenti variate tiro, Jehoiadaava Nora Kotira avuqaa vaharo uva tiva taatau kero vatora.

Mintima kero, avuhainaavavata vaiinti nahentivata vika náivatá vohaa variate tiro, uva vo tiva taatau kero vatora.

<sup>18</sup> Mintumanta ekaa yaiinti nahenti mini ruvaaqumavuka una variqa Baalira naavu vau-naini orunte vi naavura ravantiaqa aqukora. Baalira *ofaa* taintanavu ravantiaqa aquke, una variqa *maraqura/varaha* vi haikara vi haikaravata rakavu raakavumake, Baalira kaiqa vara amite vau vaiintira Mataanira *ofaa* tainta tataaqa vira aru kora.

Vika mintuvaro Jehoiadaava iqoka vaiinti vokuka Nora Kotira Naavuqaa maimaraara raqikiate tiro, vika kaama tora.

**19** Ho Jehoiadaava iqoka vaiintiqaa raqikukavata, avuhainaas vaiintiqaa raqikukavata, avuhainaara naavuqaa raqikukavata, ntita varero vika hampata Nora Kotira Naavuqihairo avuhainaara vita varero nai avuhainaara naavuqi vuru kora. Vika vira vite vumanta vaiinti nahenti vira avataqi vuvaro Joaasiva *Maimaraara Qentive* tu qentiraqaa oriqetero viva oru avuhainaaka taintaqaa oquiviro vaura.

**20** Avuhainaara naavu vaunaini Ataliaara arukorara ti, ekaa vaiinti nahenti „Iutaini vauka“ quahe vaumanta Ieruharemiqi vaukavata koqemake qaqi manamana vaura.

**21** Ho Joaasiva 7 ihi varakova avuhainaava vaiharo Iutaqaqaa raqiki vaura.

## 12

### *Joaasiva Iutaqaqaa raqiki vaura*

**1** Jehuva 7 ihiara Isareriqaa raqiki vau entara, Joaasiva Iutaa avuhainaas vaiintiqama viro 40 ihiara Ieruharemiqi vaiharo „Iutaqaqaa“ raqiki vaura. Vira nova Sibiaava Beseba vatukai-hainaava vaura.

**2** Kotira kaiqa vara amite vauva Jehoiadaava uva maara vira tiva ami vauvaro Joaasiva Nora Kotira avuqaa koqe okara auti vaura.

**3** Mintiharovata, viva kiama vo aiqina vo aiqin-naqaa *ofaa* tainta ravantiaqa komanta vaiinti nahenti qaqqai mini mini vaiha *ofaa* iha quarake, koqe unta iaina haikara iha quare vaura.

**4** Joaasiva Kotira kaiqa vara amite vau vaiintika naaramakero vikara tiharo, Vaiinti nahenti Nora Kotira Naavuqi vira amitaa monura ne

varaate. Vika *ofaara* iriha aqukaa monurave, nái ainqaa kauqu aquke tiha, Kotira amirerave tivake amia monurave, Kotira amiataa imanta qaqi amia monurave, ne vi monura vi monura varaate. <sup>5</sup> Ne Kotira kaiqa vaiinti vohaiqa vohaiqavano vi monura vare, vi monuraqohai Nora Kotira Naavuqi vo haika vo haika qoraiqia inara avuqavu iate, tiro.

<sup>6</sup> Joaasiva minti tivakero variqiro viro 23 ihiara avuhainaava vau entara tavomanta vika Kotira Naavu qoraiqura kia avuqavu iraiti, kia vi kaiqara varora.

<sup>7</sup> Vira kaara King Joaasiva Kotira kaiqa vara amito vaiintira Jehoiadaaravata, vira kena vai-intivata naaramakero vika irero tiharo, Nantihae Kotira Naavuvano qoraiqira ne kia avuqavu iavaro qaqi vaivo? Ho vate maa entaraqaahai vaiinti nahenti ni nimi monura kiama qumina haika vareha aqu karaiti, ne vo vaiintinavu vi monura nimimanta vika naavu qoraiqia inara avuqavu iate, tiro.

<sup>8</sup> Joaasiva minti tumanta vika eo ti, Tenavu kia qaiqaavata vi monura vararerave. Kia tenavu Kotira Naavu qoraiqia inara avuqavu qirerave, ti.

<sup>9</sup> Minti tuvaro Jehoiadaava *vokise* vo varakero vira avuqaa ntoma kero no autu kero, hohaa avutaqi *ofaa* tainta tataaqa kauqu tanaraini vi *vokisera* vatora. Kotira kaiqa vara amite vauka hohaa qentiqaa raqiki vaiha, vaiinti nahenti Nora Kotira Naavuni anuka aquko monura varakeha vi *vokiseqi* vate vaura.

<sup>10</sup> Kotira kaiqa vara amite vauka tavovaro *vokiseqi* airi monu vaumanta, vika avuhainaara

qara ntuva amite vau vaiintirave, Kotira kaiqa vara amite vau vaiintika qiata vaiintive, vitanta naaromanta aninte, vi monura kaara ntuvake utaqi ntuvatora.

<sup>11</sup> Viraqaaahai vitanta Nora Kotira Naavuqi kaiqa vare vaukaqaa raqiki vauka nimumanta, vinavuka vi monura nái kaiqa vaiinti nimura. Taintave qentive auti okarara tavokave, oriqohai naavu kaqo okarara tavokave, <sup>12</sup> ori teqo okarara tavokave, vika vika nái koqaa nimura.

Vinavuka vi monuraqohai ori teqatorave, katarive, koqaamake Nora Kotira Naavuqi kaiqa vare vauka nimumanta vika vi haikaraqohai Naavu vira qaiqaa koqemake autukora. Vinavuka vi monuraqohai naavu kaqera vo haika vo haika koqaamake varora.

<sup>13</sup> Kotira Naavuara iriha amu monuraqohai vinavuka kia vi Naavura avutaqi vato haikara varoravaauve. Vika kiama vi monuraqohai *silvaaqohai* aututo tanura norave inaarave, *raamu* qimperave, aanumaarave, *koriqohai* *silvaaqohai* vo haika vo haika aututo haikara Nora Kotira Naavu avutaqi vate haikarave, vika kiama vi monura aqukeha vi haikara varoravaauve.

<sup>14</sup> Vika vi monuraqohai Kotira Naavu qaiqaa koqemake auti vauka koqaa i vaura.

<sup>15</sup> Kaiqaqaa raqiki vauka kia vi monura qumina hampiara voqaara aqu karaiti, vinavuka avuqavumake kaiqa vaiinti vika nimi vauvarora tiro, kia nora vaiinti voyano vinayuka ireharo, Nenavu vi monuraqohai nana haikae varaavo? tura.

**16** Vaiinti nahentivano nái qora kaiqa vare vau uvara Kotiva nunka timitaarire ti, *ofaa* ami vau monura, vi monura kia Nora Kotira Naavu aumanto vau *vokiseraqi* vatora. Vi monuva Kotira kaiqa vara amite vau vaiintika u monuva vau-mantara ti, vi monura vika nimi vaura. (Wok Pris 7:7)

### *Hasaeliva Iutaa hampata iqoka raqura*

**17** Vi entara Siria King Hasaeliva nai iqoka vaiinti ntita varero „Iutaa vatainî“ Geti vatukaini raqiharo vi vatukara varero, qaiqaa tuqantaa viro Ieruharemiqi vauka hampata raqireva auti vaura.

**18** Hasaeliva raqireva auti vauvaro King Joaasiva viva iqoka qaqira kero vuarire „tiro, nora koqaa vira amura.“ Nai naaqua Iutaa avuhainaaka, Jehosafaativave, Jehoraamuvave, vira qova Ahasiavave, Kotira kaama amitora Joaasiva ekaa vi haikara varero, nai Kotira kaama amito haikaravata varero, Nora Kotira Naavu avutaqi monu vato *rumuraqi* vau *koriravata* varero, avuhainaara naavuqi vau *koriravata* varero, Joaasiva ekaa vi haikara vi haikara varero Hasaeliva vaunaini vara kovaro vuvaro Hasaeliva varero iqoka qaqira kero vura.

**19** Ho King Joaasiva ekaa vo kaiqa vo kaiqa varo uvara vuku vo, *Iutaa Avuhainaaka Uva Okarave* tu vukuraqi qara ntuvatora.

**20** Vo enta Joaasira kaiqa vaiinti vonavu vira aruke uvara tiva taatau kovaro Joaasiva Silaini vi vau aararaqaa Beti-Milonini oru vaumanta vikaqihai vaiinti taaraqantavano Joaasira arukora.

<sup>21</sup> Simeatira maaqu Josabaativavata, Somera maaqu Jehosabativavata, Joasira arukora. Ho Joasiva qutu vumanta vira vaata vare vuru nai kaivaqara Devitira vatukave tunaini quntama tora.

Joasira maaqu Amasiava nai qora vatuka varero avuhainaa vaiintiqama viro „Iuttaaqaa“ raqiki vaura.

## 13

### *Jehoahaasiva Isareriqaa raqikura*

<sup>1</sup> Ahasiara maaqu Joasiva 23 ihiara Iuttaaqaa raqiki vau entara, Jehura maaqu Jehoahaasiva Isarerri avuhainaa vaiintiqama viro 17 ihiara Sameeria vatukaqi vaiharo Isareriqaa raqiki vaura.

<sup>2</sup> King Jeroboamuva qora okara autuntema kero, Jehoahaasivavata Nora Kotira avuqaa qora okara auti vaura. Haaru Nebaatira maaqu Jeroboamuva qora okara autiharo „una variqanavu maraqura/varaha quahama nimiteharo“ Isarerivata kunta virivi komanta vikavata qora okara autura. Jehoahaasiva qora okara kia qaqlira karaitiro, qaqliqai autuqiro vi vaura.

<sup>3</sup> Mintura kaara Nora Kotira Isareriera arara itovaro viva Siria King Hasaeliravata, vira maaqu Beni-Hadaatiravata, qaqlira komanta vitanta airi tataa Isarerri hampata raquqi viha vika naatara kora.

<sup>4</sup> Mintuvaro King Jehoahaasiva Nora Kotira aarovaro viva tavomanta Siria Isarerri qoraiqama nimite vauvaro vira kaara Noravano Jehoahaasira uva irura.

**5** Isareri Siria kauquqihairo ruaruama nimitaarire tiro, Noravano Kotiva vaiinti vo kaama tovaro viva Isareri ruaruama nimitomanta vika haaru nai maaqa nai maaqa koqemake vauntemake qaiqaa vaura.

**6** Vika mintimake vaihavata, haaru Jeroboamuva qora okara autiharo Isareri vika kuntama virivi komanta auti vau okarara, kia qaqira karaiti, vika qaqqiqai qora okara autuqi vi vaura. Katari voqaa una variqa nahenti Aseraara *maraqura/varaha* nkaurutova Sameria vatukaqi qaqi vaavi vaumanta vika kia vira qaqqini vara aqu kora.

**7** Vi entara Siria iqoka vaiinti vika Jehoahaasira iqoka vaiinti hampata raqihha airitahaa ari komanta vira iqoka vaiinti kia airi qaqqi vaura. Ohiqaa vaiha raqi vauka 50navuqai qaqqi vaumanta, iqoka *kaari* 10navuvata qaqqi vaumanta, 10,000 vaiintivata qaqqi vaura. Vaiintivano aiquqohairo vata rakavu konkomaiqama kaintemakero, Siria avuhainaava ekaa hini Isareri iqoka vaiinti vehi autu taiqa kora.

**8** Ho Jehoahaasiva vo kaiqa vo kaiqa varo uvarave, viva kempuka kaiqa varo uvarave, ekaa vi uvare vuku vo, *Isareri Avuhainaaka Uva Okarave* tu vukuraqi qara ntuvatora.

**9** King Jehoahaasiva qutu vumanta vira vaata Samerianini quntama tovaro vira maaqu Jehoahaasiva vira vatuka varero avuhainaa vaiintiqama viro vaura.

**10** Joaasiva 37 ihiara Iuttaaqaa raqiki vau entara, Jehoahaasira maaqu Jehoahaasiva Isareri avuhainaa

vaiintiqama viro 16 ihiara Sameria vatukaqi vaiharo Isareriqaa raqiki vaura.

<sup>11</sup> King Jeroboamuva qora okara autuntema kero, Jehoasiva Nora Kotira avuqaa qora okara auti vaura. Haaru Nebaatira maaqu Jeroboamuva qora okara autiharo *una variqa maraqura/ varaha quahama nimiteharo*, Isarerivata kunta virivi komanta vikavata qora okaraqai auti vaura. Jehoasiva qora okara kia qaqlira karaitiro, qaqliqai autuqiro vi vaura.

<sup>12</sup> Ho Jehoasiva vo kaiqa vo kaiqa varo uvarave, viva Iutaa King Amasiara hampata iqoka raqu uvarave, ekaa vi uvare vuku vo, *Isareri Avuhainaaka Uva Okarave* tu vukuraqi qara ntuvatora.

<sup>13</sup> Jehoasiva qutu vumanta vira vaata vare Isareri avuhainaaka quntama tonaini Sameriaini quntama tovaro, vira maaqu Jeroboamuva vira vatuka varero avuhainaa vaiintiqama viro vaura.

### *Elisaava qutu vura*

<sup>14</sup> Vi entara Elisaava nora rovara varero qutu vuarirava aumanto vauvaro Isareri King Jehoasiva vira tavareva oruntero vira iqqi rata amitero tiharo, Mpo, ti qo, ti qo, iqoka *kaarivata* iqoka vaiintivata viraqqi vaiha Isareri kahaqiantema kera, are kempukavano Isareri kahaqiaravave, tiro.

<sup>15</sup> Viva minti tuvaro Elisaava virara tiharo, Are oru huruvata vevanavuvata varera aniane, tuvaro Jehoasiva viva tuntema kero oru varero anuvaro <sup>16</sup> Elisaava virara tiharo, Are nena kauquqi huru totaane, tuvaro avuhainaava viva tuntema kero, ututovaro Elisaava nai kauqu

avuhainaa vaiinti kauquqaa vaari vatero tiharo,  
 17 Are kuari urinaihainaa *uintua* qantua kaane,  
 tuvaro qantua kovaro Elisaava, Ho veva aruane,  
 tuvaro viva veva ariro.

Jehoasiva Elisaava tunte iro veva vira aruvaro Elisaava vira tiva amiro tiharo, Vi vevava vaireva, Noravano Kotiva Siria aatara kaarira vevavama vaivo. Vo enta are Siria hampata raqihara Afeki vatukaini vika aru taiqa kenarave, tiro.

18 Minti tivakero Elisaava avuhainaara tiva amiro tiharo, Vevanavu qaqi vataanara varakera vata ruqutuan, tuvaro Jehoasiva viraqohairo taaramo tataa vata ruqutiro.

19 Mintuvaro Elisaara arara itovaro avuhainaara atiro tiharo, Are 5 tataave, 6 tataave vata ruqutuataarave. Are mintiaraitirio, are Siria ekaa aru taiqa keravama vaitirio. Are taaramo tataa vata ruqutuanarara tira, taaramo tataaqaima Siria aatara kenarave, tura.

20 Ho Elisaava qutu vumanta vira vaata vare ori ntomatoraqi vuru vatora. Ho vo ihi vo ihi Moapi vo vara vo varavano Isarerini orunte, vika qoraiqama nimite vaura. 21 Vo enta Isarereri vokuka qutu vu vaiintira vaata vara vuru quntarare ti, tavomanta Moapi vo varavano vika arireka anumanta vika qetake Elisaara vuhaarivano vauraqi vira vaata vaati aqukovaro vira vaatavano Elisaara vuhaariqaa hiqintuvaro vaakama vi vaiintiva qaqi himpiro nai aiquantantaqaa himpitero vaura.

22 Jehoasira qova Jehoahaasiva Isareriqaa raqiki vau entara, Siria King Hasaeliva qaiqaa

qaiqaavata Isareri hampata raqiharo nora maara vika nimi vaura.

<sup>23</sup> Vika minti vauvarovata, Noravano Kotiva haaru Eparahaamirave, Aisaakirave, Iekopirave, vinavuka hampata uva tiva taatau torara iriharora tiro, viva Isareri vika aaqurihamu nimiteharo vika koqema nimitora. Maa entaravata Noravano Kotiva kia Isareri vehi autu taiqa kaataa ivaro kia vika vehi autu taiqa karaitiro, kia nai aaqantohairo vika nititama kaira.

<sup>24</sup> Siria King Hasaeliva qutu vuvaro vira maaqu Beni-Hadaativa vira vatuka varero Siria avuhainaa vaiintiqama vura.

<sup>25</sup> Mintuvaro Isareri King Jehoasiva iqoka raqiharo Beni-Hadaatira kauquqihairo vatuka vonavu qaiqaa varora. Haaru Jehoasira qova Jehoahaasiva avuhainaaava vau entara Siria vira hampata raqihira vi vatukanavura varora.

Jehoasiva taaramo tataa Beni-Hadaatira aatara kero vi vatukanavura qaiqaa varora.

## 14

### *Amasiava Iuttaaqaa raqikura*

<sup>1</sup> Jehoahaasira maaqu Jehoasiva taara ihiara Isareriqaa raqiki vau entara, Joasira maaqu Amasiava Iuttaa avuhainaa vaiintiqama viro vaura.

<sup>2</sup> Amasiava 25 ihi varakova avuhainaa vaiintiqama viro Ieruharemipi 29 ihiara vaiharo Iuttaaqaa raqiki vaura. Vira nova Jehoadiniva Ieruharemihainaava vaura.

<sup>3</sup> Amasiava nai qova Joasiva untemakero, koqe okara Nora Kotira avuqaa autiharovata,

viva kia nai kaivaqava Devitiva koqe okara autuntema kero autura.

<sup>4</sup> Viva kiama vo aiqina vo aiqinaqaa *ofaa* tainta ravantiaqa komanta vaiinti nahenti qaqiqai mini mini vaiha *ofaa* iha quarake, koqe unta iaina haikara iha quare vaura.

<sup>5</sup> Amasiava avuhainaa vaiintiqama viro Iutaqaa kempukaiqama kero raqikiqiro vi vau entara, viva vaakama nora vaiintinavu nai qora arukoka náivata arukora.

<sup>6</sup> Amasiava vi vaiintika arukero viva kia vika vaintivara arukaraitiro, viva Mosiva qara ntuvato uvvara iriharo, vika qaqi komanta vaura. Haaru Noravano Kotiva Mosira tiva amiro mintima tiro:

Ne tavaivaro vira maaquvano qora okara autu kairera, kia vira qora arukaate.

Vira voqaantemake vira qova qora okara autu kairera, kiama vira maaqu arukaate.

Vaiintivano qora okara autina vaiintira nai viraqaima arukaate, ti tura. (Lo 24:16)

<sup>7</sup> Vo enta Amasiava „nai iqoka vaiinti ntita varero, *Hore Uqitainive* tunaini oru iqoka raqiharo Idomu iqoka vaiinti 10,000 arukero, vi-raqaahairo viva Selaa vatuka varero, vi vatukara autu nteharo Jokateline tura. Vatevata qaqima vi autura nte variara.

<sup>8</sup> Amasiava vi vatukara varero, vaiinti vonavu nititama komanta Isarer King Jehoasiva vaunaini vura. Jehoasiva Jehoahaasira maaqu, Jehura naintivano vaura. King Amasiava nititoka Jehoasiva vaunaini orunte virara tiha, King Amasiava ariara tiharo, Are „nena iqoka vaiinti ntita varera, aniqe ai hampata raquare, tivo, ti.

**9** Minti tuvaro Isareri King Jehoasiva vo haikaqaa uva tuqantaakero Amasiara tiva amiro tiharo,

Auquro Lebanonini vaiva uva vara kaivaro *sidaa* katariara tiharo, Are nena raavura ti maaqu amiraro varaarire, tirave. Viva minti tivarovata, qaakau aantauvano auquro rahiti raahitima kaivaro qoraiqama virave.

**10** Ho Amasiao, are Idomu hampata raqihara vika naatara kaanarara iriharama nena mahuta ti variaro. Ho nena maaqaini vaihara virara quahaane. Hauri are ani tinavu hampata raqihara qoraiqama viramanta Iutaavata qoraiqama vivorave, tiro.

**11** Jehoasiva minti tuvaro Amasiava kia vira uva iriraitiro vauvaro Jehoasiva nai iqoka vaiinti Isareri ntita varero Iutaa vataini Beti-Semesi vatukavano vaunaini oru Iutaa hampata iqoka raqura. **12** Ho Isareri Iutaa naatara komanta vika qetake ruqemake nai maaqa nai maaqa vura.

**13** King Jehoasiva Iutaa King Amasiara rumpa varero, Beti-Semesi vatuka kero Ieruharemini oruntero, Efaraimu Qentive turuqaahairo hoqaramatero Ieruharemi vaantaavura ravanti-aqaqiro viviro, Kaantaa Qentive turuqaa vuru kora. Ieruharemi vaantaavura 200 *mita* vaura ravantiaqa aqukora.

**14** Ravantiaqa aqukero Jehoasiva oru Nora Kotira Naavuqihairovata, avuhainaara naavuqihairovata, *koriqohai* aututo haikarave, *silvaaqohai* aututo haikarave, ekaa vi haikara vi haikara varora.

Viva Iutaa nora vaiintinavu rumpa kero ntita varero nai maaqaini vireva iharo Amasiarara

tiharo, Amasiao, are tinavu hampata qaiqaa raqirera, te ai nora vaiintinavu ntita vare vunara aruma kararave, tivakero, anirantero Sameriaini vura.

**15** Ho Jehoasiva vo kaiqa vo kaiqa varo uvarave, viva Iutaa King Amasiara hampata iqoka raqu uvarave, ekaa vi uvvara vuku vo, *Isareri Avuhainaaka Uva Okarave* tu vukuraqi qara ntuvatora.

**16** Jehoasiva qutu vumanta vira vaata vare Isareri avuhainaaka quntama tonaini Sameriaini quntama tovaro, vira maaqu Jeroboamuva vira vatuka varero avuhainaava vaiintiqama viro vaura. (13:13)

**17** Isareri King Jehoasiva qutu vu entaraqaa-hairo Iutaa King Amasiava qaqi variqiro viharo 15 ihi vara kero qutu viro.

**18** King Amasiava ekaa vo kaiqa vo kaiqa varo uvvara vuku vo, *Iutaa Avuhainaaka Uva Okarave* tu vukuraqi qara ntuvatora.

**19** King Amasiava Ieruharemipi vaumanta vai-inti vonavu vira aruke uvvara tiva taatau tovaro, Amasiava vi uvvara iriro, qetakero Lakisini vura. Viva mini vumanta vira arukareka u vaiintika vaiinti vonavu nititomanta vira avata vare orunte Lakisiqi vira arukora.

**20** Amasiara aru komanta vira vaata ohiqaa vate vare, anirannte Ieruharemini vuru komanta vira nai kaivaqaukavara quntama tonaini Devitira Vatukave turaqi quntama tora.

**21** Amasiava qutu vumanta Iutaa vika Amasiara maaqu Usiara, vira vara autu vo Asariara, kaama tovaro, viva nai qora vatuka varero avuhainaava

vaiintiqama vura. Vi entara Usiava 16 ihi varakova qaraaka vaiintivano vaura.

<sup>22</sup> Usiava „Itomu vatanaaka hampata iqoka raqiharo“ vika kauquqhairo Elaati vatuka qaiqaa varero vatukavano qoraiquravata qaiqaa avuqavuqama kora.

### *Jeroboamuva Isareriqaa raqikura*

<sup>23</sup> Joaasira maaqu Amasiava 15 ihiara Iuttaqaa raqiki vau entara, Jehoasira maaqu Jeroboamuva Isareri avuhainaa vaiintiqama viro 41 ihiara Sameria vatukaqi vaiharo Isareriqaa raqiki vaura.

<sup>24</sup> Haaru nai qamaqova King Jeroboamuva qora okara autuntema kero, Jeroboamuva vira qamaqova Nora Kotira avuqaa qora okara auti vaura. Haaru Nebaatira maaqu Jeroboamuva qora okara autiharo „una variqanavu maraqura/varaha quahama nimiteharo“ Isareri kunta virivi komanta vikavata qora okara autura.

<sup>25</sup> Ho navutaaka haaru Isareri vata varora Jeroboamuva iqoka raqikiharo vi vatara qaiqaa varora. Vi vatava vaireva, *noti* mantaraini Hamaati vatukaini vi vau aararaqaahairo hogarama tero viviro, *sauti* mantaraini Qutuviv-Varuvava vaunaini vuru taiqora.

Jeroboamuva vi vatara qaiqaa varovaro Isareri Variqa Noravano Kotiva Amitaira maaqu Ionaara noqihairo tu uvava vivauma vaura. Paropeti vaiinti Ionaava Gati-Hefe vatukaihainaava vaura.

<sup>26</sup> Vi entara Noravano Kotiva tavomanta navutaaka Isareri nora vaiintive inaara vaiintive qoraiqama nimite vauvaro kia vaiinti vovanovata Isareri kahaqiarirava vaura.

<sup>27</sup> Noravano Kotiva kiama tiharo, Te Isarerri aru taiqa kaariraro vika nutuvanovata ekaara taiqa vuarire turavauve. Viva Jehoasira maaqu Jeroboamura kempukaqohairo Isarerri ruaruama nimitora.

<sup>28</sup> Ho Jeroboamuva vo kaiqa vo kaiqa varo uvarave, viva navutaaka hampata iqoka raqu uvarave, viva raqiharo Isarerri vata varaare tiro, Damasikusivata Hamaativata qaiqaa nai varo uvarave, ekaa vi uvara vuku vo, *Isarerri Avuhainaaka Uva Okarave* tu vukuraqi qara ntuvatora.

<sup>29</sup> Jeroboamuva qutu vumanta Isarerri avuhainaaka quntama tonaini viravata quntama tovaro, vira maaqu Sekaraiaava nai qora vatuka varero avuhainaa vaiintiqama viro vaura.

## 15

### *Usiava Iuttaaqaa raqiki vaura*

<sup>1</sup> Jeroboamuva 27 ihiara Isareriqaa raqiki vau entara, Amasiara maaqu Usiava Iuttaa avuhainaa vaiintiqama viro vaura. Usiara autu vo Asariara.

<sup>2</sup> Viva 16 ihi varakova avuhainaa vaiintiqama viro, 52 ihiara Ieruharemiqi vaiharo Iuttaaqaa raqiki vaura. Vira nova Jekoliava Ieruharemi-hainaava vaura.

<sup>3</sup> Usiara qova Amasiava Nora Kotira avuqaa koqe okara autuntema kero, Usiavavata koqe okara auti vaura.

<sup>4</sup> Viva mintiharovata, viva kiama vo aiqina vo aiqinaqaa *ofaa* tainta ravantiaqa komanta vaiinti nahenti qaqiqai mini mini vaiha *ofaa* iha quarake, koqe unta iaina haikara iha quare vaura.

**5** Noravano Kotiva qaqi kovaro vaata ne vau numuarava Usiara vaataqaa vaura. Usiava qaqi vau entara vi numuarava vira ari vaura kaara viva oru nariaraa vo naavuqi variqiro vuvaro, vira maaqu Jotamuva avuhainaara naavuqi vaiharo Iutaaqaa raqiki vaura.

**6** King Usiava ekaa vo kaiqa vo kaiqa varo uvvara vuku vo, *Iutaa Avuhainaaka Uva Okarave* tu vukuraqi qara ntuvatora.

**7** Usiava qutu vumanta vira vaata vare nai kaivaqara Devitira Vatukave turraqi vuru quntama tovaro vira maaqu Jotamuva vira vatuqa varero avuhainaa vaiintiqama viro vaura.

**8** Usiava Iutaaqaa 38 ihiara raqiki vau entara, Jeroboamura maaqu Sekaraiaava Isareri avuhainaa vaiintiqama viro, Sameria vatuqaqi vaiharo 6 toraraqai Isareriqaa raqiki vaura.

**9** Sekaraiaava nai naaqukavara Nora Kotira avuqaa qora okara autuntema kero autura. Haaru Nebaatira maaqu Jeroboamuva qora okara autiharo *una variqa maraqura/varaha quahama nimiteharo*, Isarerivata kunta virivi komanta vikavata qora okara autura.

**10** Ho Sekaraiaava Isareri avuhainaava vauvaro Jabelsira maaqu Salumuva vaiinti vokuka hampata Sekaraiaara arukerara uativa taatautero, Salumuva oru vaiinti nahenti nivuqaa Sekaraiaara arukero nai vira vatuqa varero avuhainaa vaiintiqama vura.

**11-12** Haaru Noravano Kotiva Jehurara tu uvava vivau vaura. Viva mintima tiro: *Te qaqi kaariraro naantiara ai maaquvanovata, viva vatatairauka*

*taaramonavuvata Isareriqaa raqikiqi vivarave, tivo tura. (10:30)*

Ho Sekaraiaava vo kaiqa vo kaiqa varo uvvara, ekaa vi uvvara vuku vo, *Isareri Avuhainaaka Uva Okarave* tu vukuraqi qara ntuvatora.

<sup>13</sup> Usiava 39 ihiara Iuttaaqaa raqiki vau entara, Jabelsira maaqu Salumuva Isareri avuhainaa vaiintiqama viro Sameria vatukaqi vaharo vohaa toraqai Isareriqaa raqiki vaura. <sup>14</sup> Viva Sameria vatukaqi vauvaro Gadira maaqu Menahemuva Tirisa vatukaihairo Sameriani oruntero Salumura arukero viva nai vira vatuka varero avuhainaa vaiintiqama viro vaura.

<sup>15</sup> Ho Salumuva ekaa vo kaiqa vo kaiqa varo uvarave, viva vonavu hampata avuhainaa vaiinti arukerara uva tiva taatau torave, ekaa vi uvvara vuku vo, *Isareri Avuhainaaka Uva Okarave* tu vukuraqi qara ntuvatora.

<sup>16</sup> Menahemuva Tirisa vatuka kero „nai navunaa vaiinti ntita varero,“ Tipisa vatukaini oruntomanta vihainaaka kia vaantaavura qenti qantua amitovaro vira kaara Menahemura arara itovaro viva raqiharo vi vatukara vehi autu kora. Tipisaqi vau vaiinti nahentikavata, vi vatukara aumanto vau vaiinti nahentikavata, viva aru taiqa kero, nahenti vainti taiqama vuka viva vika auhavau iqoka paipEQohairo *kuhia/qumpihia* kora. <sup>17</sup> Usiava 39 ihiara Iuttaaqaa raqiki vau entara, Gadira maaqu Menahemuva Isareri avuhainaa vaiintiqama viro Sameria vatukaqi vaharo 10 ihiara Isareriqaa raqiki vaura.

<sup>18</sup> Menahemuva Nora Kotira avuqaa qora okara autura. Haaru Nebaatira maaqu Jeroboamuva qora okara autiharo „una variqa maraqura/

*varaha quahama nimiteharo, Isarerivata kunta virivi komanta vikavata qora okara autura.* Ho Menahemuva Isareriqaa raqiku entara viva qaqqai vi okarara auti vaura.

<sup>19</sup> Menahemuva avuhainaava vau entara Asiria King Tikilati-Pileseva, vira autu vo Puluva, viva *nai iqoka vaiinti ntita varero, Isareri vataini anuvaro* Menahemuva virara viva kia ti ham-pata iqoka raqiraitiro, ti kahaqirage te voqavata kempukaiqamake Isareriqaa raqikiare tiro, viva 1,000 *silvaa* monu Tikilati-Pilesera amura.

<sup>20</sup> Menahemuva vi monura varareva airi airaira vataakaqihairo *takisi* naaruma keharo varora. Viva vohaa vaiinti vohaa vaiintiqihairo 50 *silvaa* monu naaruma kero King Tikilati-Pilesera amuvaro ho Tikilati-Pileseva Isareri kero nai maaqaini vurama.

<sup>21</sup> Ho Menahemuva ekaa vo kaiqa vo kaiqa varo uvvara vuku vo, *Isareri Avuhainaaka Uva Okarave* tu vukuraqi qara ntuvatora.

<sup>22</sup> Menahemuva qutu vumanta quntama tovaro vira maaqu Pekahiava nai qora vatuka varero avuhainaa vaiintiqama vura.

<sup>23</sup> Usiava 50 ihiara Iuttaaqaa raqiki vau entara, Menahemura maaqu Pekahiava Isareri avuhainaa vaiintiqama viro Sameria vatukaqi vaiharo taara ihiara Isareriqaa raqiki vaura.

<sup>24</sup> Pekahiava Nora Kotira avuqaa qora okara autura. Haaru Nebaatira maaqu Jeroboamuva qora okara autiharo *una variqa maraqura/ varaha quahama nimiteharo, Isarerivata kunta virivi komanta vikavata qora okara autura.*

**25** Pekahiara iqoka vaiintiqaa raqikukaqihairo Remaliara maaqu Pekaava vo vaiinti hampata Pekahiara arukerara uva tiva taatau tero, viva Gileati vatahainaa vaiinti 50navu ntita varero oru Sameria vatukaqi avuhainaara naavu kempukaiqamake aututo *rumuraqi* oriqetero Pekahiara arukero, vaiinti taaraqanta Akopika Arieckavata arukora. Mintimakero Pekaava Pekahiara vatuka varero avuhainaara vaiintiqama viro vaura.

**26** Ho Pekahiava ekaa vo kaiqa vo kaiqa varo uvara vuku vo, *Isareri Avuhainaaka Uva Okarave* tu vukuraqi qara ntuvatora.

**27** Usiava 52 ihiara Iuttaaqaa raqiki vau entara, Remaliara maaqu Pekaava Isareri avuhainaara vaiintiqama viro, Sameriaqi vaharo 20 ihiara Isareriqaa raqiki vaura.

**28** Pekaava Nora Kotira avuqaa qora okara autura. Haaru Nebaatira maaqu Jeroboamuva qora okara autiharo *una variqa maraqura/ varaha quahama nimiteharo*, Isarerivata kunta virivi komanta vikavata qora okara autura.  
**29** Pekaava Isareri avuhainaava vau entara Asiria King Tikilati-Pileseva Isareri hampata raqiharo Isoni vatukave, Abeli-Beti-Maka vatukave, Janoa vatukave, Kedesi vatukave, Haso vatukave, Gileati vatave, Kariri vatave, Napataarira ankuvano u vatara ekaa vi vataravata varora.

Viva vi vatukaravata vi vataravata varero, viraqaahairo ekaa vaiinti nahenti rumpa kero ntita varero Asiriaini vuru kora.

**30** Usiara maaqu Jotamuva 20 ihiara Iuttaaqaa raqiki vau entara, Elaara maaqu Hosiava vonavu hampata Pekaara oru aru kerara uva tiva taatau

kerō, oru vira arukero, Hosiava nai avuhainaa vaiintiqama viro vaura.

<sup>31</sup> Ho Pekaava ekaa vo kaiqa vo kaiqa varo uvara vuku vo, *Isareri Avuhainaaka Uva Okarave* tu vukuraqi qara ntuvatora.

<sup>32</sup> Remaliara maaqu Pekaava taara ihiara Isareriqaa raqiki vau entara, Usiara maaqu Jotamuva Iutaa avuhainaa vaiintiqama viro vaura.

<sup>33</sup> Jotamuva 25 ihi varakova avuhainaa vaiintiqama viro, 16 ihiara Ieruharemiqi vahilo Iuttaqaa raqiki vaura. Vira nova Sadokira raavura Jerusaava vaura.

<sup>34</sup> Vira qova Usiava Nora Kotira avuqaa koqe okara autuntema kero, Jotamuvavata koqe okara auti vaura.

<sup>35</sup> Mintiharovata, viva kiama vo aiqina vo aiqinajqaa *ofaa* tainta ravantiaqa komanta vaiinti nahenti qaqiqai mini mini vaiha *ofaa* iha quarake, koqe unta iaina haikara iha quare vaura. Jotamuva Nora Kotira Naavu vaunaini hohaa virini vau qentira qaiqaa autukora.

<sup>36</sup> King Jotamuva ekaa vo kaiqa vo kaiqa varo uvara vuku vo, *Iutaa Avuhainaaka Uva Okarave* tu vukuraqi qara ntuvatora.

<sup>37</sup> Jotamuva avuhainaava vau entara Noravano Kotiva Siria King Resiniravata, Isareri King Pekaaravata, vitanta qaqi komanta oru Iutaa hampata iqoka hoqaramate raqura.

<sup>38</sup> Jotamuva qutu vumanta vira vaata vare nai kaivaqaukavara quntama tonaini Devitira Vatukave turaqi vuru quntama tovaro vira maaqu Ahaasiva nai qora vatuka varero avuhainaa vaiintiqama viro vaura.

# 16

## *Ahaasiva Iutaa avuhainaava vaura*

<sup>1</sup> Pekaava 17 ihiara Isareriqaa raqiki vau entara, Jotamura maaqu Ahaasiva Iutaa avuhainaava vaiintiqama viro vaura.

<sup>2</sup> Ahaasiva 20 ihi varakova avuhainaava vaiintiqama viro Ieruharemiqi vaiharo 16 ihiara Iuttaaqaa raqiki vaura. Viva Iutaaqaa raqikiharo viva Nora Kotira avuqaa kia avuqavu okara autiraitiro, viva kia nai kaivaqava Devitiva koqe okara autintema kero autura.

<sup>3</sup> Viva Isareri avuhainaaka qora okara autuntema kero, qora okara autuqiro viharo, nai anoma kero qora okara voqavata autiharo, una variqa quahama nimitareva nai maaqu arukero iha quara nimitora. Haaru Isarerini vau vaiinti nahentika qora okara autura viva vika avataqiro vi vaura. Noravano Kotiva haaru Isareri vataini vauka vara qaqlini kero, vika u vatara tinavu kaivaqaukavara Isareri nimura.

<sup>4</sup> Ahaasiva una variqanavu quahama nimitareva, vo vatuka vo vatukaqaave, vo aiqina vo aiqinaqaave, ekaa aumaqaara vau katarira okarainive, viva mini mini vaiharo *ofaa* iha quara kero, koqe unta iaina haikaravata iha quare vaura.

<sup>5</sup> Ho Siria King Resinivavata, Isareri King Pekaavavata, vitanta náitanta iqoka vaiinti ntita vare oru Ieruharemi ututumate iqoka raqihha vitanta kia ho Ahaasira aatara kora.

<sup>6</sup> (Vi entara Siria King Resiniva oru Elaati vatukaini iqoka raqiharo Elaatiqihairo Iutaa vatanaaka viraqi vauka vara qaqlini kero qaqlaa

vi vatukara varomanta Idomu vatanaaka vi vatukaraqi oru variqi vi vaura. Vate maa entaravata Idomu vika Elaatiqi qaqi variara.) (14:22)

<sup>7</sup> Resinika Pekaaka Ieruharemi vatuka ututumate vauvaro, Ahaasiva uva vara kero Asiria King Tikilati-Pileserara tiharo, Mpo, te ai kaiqa vaiintivano ai vevaarainima vauro. Siria avuhainaavavata Isareri avuhainaavavata ti hampata raqi variavo. Mpo, are ani ti ruaruama timitaane, tiro.

<sup>8</sup> Minti tivakero Ahaasiva *korivata silvaavata* Nora Kotira Naavuqi vauravata, avuhainaara naavu monu vate vau *rumuraqi* vauravata, varakero Asiria avuhainaava vira quahama amitaarire tiro, viva unaini vara kora.

<sup>9</sup> Mintuvaro King Tikilati-Pileseva Ahaasira kahaqireva viva nai iqoka vaiinti ntita varero Damasikusi vatukaini otu raqiharo vi vatukara varero King Resinira arukero Damasikusiqi vauka rumpa kero ntita varero vuru Asiriaini Kiri vatukaini kora.

<sup>10</sup> Mintuvaro King Ahaasiva Tikilati-Pilesera tavareva Damasikusini oruntero *ofaa* tainta vi-raqiraaka autu tora tavero, Kotira kaiqa vara amito vaiintiva Uriaava vi taintara voqaara autuarire tiro, vira *maraqura/varaha* autu kero, *ofaa* tainta mintima kera autuane tu uvara qara ntuvakero, qara vira vara kovaro Uriaava Ieruharemiqi vaunaini vura.

<sup>11</sup> Uriaava qara tavero, viva Damasikusiqi aututo *ofaa* taintara voqaara tainta vo autuqi vi-haro, Ahaasiva kia Ieruharemini orurantero anu entara Uriaava *ofaa* tainta vira autu taiqa kora.

<sup>12</sup> Ho Ahaasiva Damasikusiqihairo anirantero oru tainta vira tavero, vira tataaqa vaiharo „naivano, ofaa iha quare vaura.

<sup>13</sup> Viva ekaara ita vuaina ofaarave, *uiti ofaave, uaini qiharaaina ofaarave*, Kotikantiro vohaa variaina ofaarave, iha quara kero, naare varakero ofaa tainta viraqaa rintatima kora.

<sup>14</sup> Haaru *baraasiqohai* aututo ofaa taintava Nora Kotira Naavu avuqaa vauvaro ofaa tainta qaraaka aututova vira tataaqa qumina tauvaqaini vauvarora tiro, Ahaasiva qaraaka ofaa tainta viva Kotira Naavu avuqaa variarire tiro, viva tumanta *baraasi* tainta vira qaqini vara vuruvi *noti* mantaraini vatora.

<sup>15</sup> Mini vuruvi vatovaro King Ahaasiva Uri-aara tiva amiro tiharo, Are ekaa enta ofaa iha quarareva ihara, qaraaka ofaa taintaqaqai iha quaraane. Ekaa enta toqaqi ekaara ita vuaina ofaara iha quaratera, erainaini *uiti ofaa* iha quaraane.

Are avuhainaarara irihara ekaara ita vuaina ofaara iha quara amitera, vaiinti nahentiaravata irihara iha quara nimitaane. Vikara irihara *uitivata ofaa* iha quara taane. Are vaiinti nahentiara irihara *uainivata ofaa* taintaqaqai qiharaane. Are ekaa naare kaqakera qaraaka ofaa tainta viraqaaqaima aqu aqu iane.

*Baraasi* tainta vira qaqi kairae te naantiara vira tataaqa vaiha nana nana kaiqa varaainarara Kotira ireha tavarerave, tiro. <sup>16</sup> King Ahaasiva minti tuvaro Uriavaa viva tunte ura.

<sup>17</sup> „Asiria avuhainaarara iriharo,“ King Ahaasiva tumanta vika *uiri kaarinavu* Kotira Naavu

vahaqaqaini vauraqihai *baraasi* tanuqama tora qaqini varake, namari tanuvata *uiri kaariqaa* vatora qaqini varakora. (1 King 7:28)

*Varuva Namarive* tu tavera *baraasi* purumakauqaa vatora, Ahaasiva tumanta vika viraqaahai qaqini varake, ori ntavatoraqaa vira vaari vatora. (1 King 7:25)

<sup>18</sup> Aumaqaara variate ti kaqato naavuva Nora Kotira Naavu aumanto vaumanta Maara Entaqaan avuhainaava viraqi vaura, Ahaasiva tumanta vika vira rampaike, avuhainaava Nora Kotira Naavuqiara vu hohaa qentiravata tinta tora. Asiria avuhainaarara iriharo, King Ahaasiva tumanta, vika vi haikara mintimake vatora.

<sup>19</sup> King Ahaasiva ekaa vo kaiqa vo kaiqa varo uvara vuku vo, *Iutaa Avuhainaaka Uva Okarave* tu vukuraqi qara ntuvatora.

<sup>20</sup> Ahaasiva qutu vumanta vira vaata vare nai kaivaqaukavara quntama tonaini Devitira Vatukave turaqi vuru quntama tovaro, vira maaqu Hesekiaava nai qora vatuka varero avuhainaava vaiintiqama viro vaura.

## 17

### *Hosiava Isareri avuhainaava vaura*

<sup>1</sup> Ahaasiva 12 ihiara Iutaaqaa raqiki vau entara Elaara maaqu Hosiava Isareri avuhainaava vaiintiqama viro 9 ihiara Sameria vatukaqi vaiharo Isareriqaa raqiki vaura.

<sup>2</sup> Viva raqikiharo Nora Kotira avuqaa qora okara autiharovata, kia anomakero Isareri avuhainaaka autuntema kero autura.

**3** Vi entara Asiria King Samaneseva ani Isareri hampata iqoka raqiharo vika naatara kovaro, Hosiava Samanesera vevaarainiqama viro, vo ihi vo ihiara *takisi* vira ami vaura.

**4** Isipi King Sova vira kahaqiarire tiro, Hosiava voku vaiintika viva unaini nititama kero, vi ihira Hosiava kia vo ihi vo ihi untema kero, *takisi* Samanesera amiraitiro vaura. Mintuvaro vira kaara Samaneseva iqoka vaiinti nititomanta vika oru Hosiara ravaaqavu vare viri karapuhiqi kora.

### *Asiria iqoka raqihha Sameria vatuka varora*

**5** Asiria King Samaneseva nai iqoka vaiinti ntita varero oru Isareri vataini iqoka raqiharo, Sameria vatuka taaramo ihiara ututumate yaumanta vatukaqi vauka aaqaini vaatinte vi aniva kia ho vaura.

**6** Mintuvaro Hosiava 9 ihiara Isareriqaa raqiki vau entara Asiria avuhainaava Sameria vatukaqi vauka naatara kero vi vatukara varero, Isareri vika rumpa varero vuru Asiriaini kora. Viva vika rairakero maa vatukanavuraqi komanta vaura: Hala vatukave, Habo Namari aumanto Gosani vatukainive, Midia vataini vatukanavu vauraqive, komanta vaura.

**7** Ho Isareri nái Variqa Nora Kotira qora okara autu amite vaura kaara vi maarava vikaqaa qovaraiqura. Haaru Noravano Kotiva vika kaivaqaukavara Isipi avuhainaara kauquqihairo kuvantukero ntita varorara kia iriraiti, una variqa quahama nimite vaura. **8** Haaru Noravano Kotiva Isareri vataini vauka vara qaqini kero, vika u vataru tinavu Isareri kaivaqaukavara nimumanta Isareri hoqare vauka qora okara

autura avataqi viha, Isarerि avuhainaaka qora okara auturavata avataqi vi vaura.

<sup>9</sup> Noravano Kotiva kia antuqa ari okarara, vo okara vo okara Isarerि kukeqavi vaiha auti vaura. Vika una variqa quahama nimitareka ekaa vatuka, inaara vatukaqive nora vatukaqive, *ofaa* tainta aututora.

<sup>10</sup> Vika una variqa *ori*, vo ori teqake, una variqa nahenti Aseraara *maraqura/varaha* vo katari vo katariqaa nkauruke, vi haikara vi haikaravata vare, ekaa aiqinaqaave, aumaqaara vau katarira okarainive vuru arate, „vi haikarara tinavu variqave tivakeha quahama nimite vaura..»

<sup>11</sup> Noravano Kotiva maa vataraqaaahairo vara qaqlini koka autuntemake, vikavata una variqara iriha vo aiqina vo aiqinaqaa vaiha koqe unta iaina haikara iha quare vaura. Isarerि vo okara vo okara mintima keha auti vauvaro Nora Kotira voqamakero arara itora.

<sup>12</sup> Haaru Noravano Kotiva vikara tiharo, Kiama una variqara tinavu variqave tivakeha vika quahama nimitaate, tumanta vika vira uva kia iriraiti, vi haikara quahama nimite vaura.

<sup>13</sup> Vika qora okara autivorave tiro, Noravano Kotiva paropeti vaiinti Isarerinivata Iutainivata varakero vika noqihairo tiva nimiro tiharo, *Ne qora okara auti variara qaqrake, ekaa te tiva tauna uvara iriqi vuate. Te vi uvara ni kaivaqaukavara tiva nimunara, vi uvara tenta kaiqa vaiinti paropeti noqhai ni tiva nimuro, tura.*

<sup>14</sup> Minti tumantavata, vika kaivaqaukavara avu aato kempukaiqama vumanta kia nái Variqa

Nora Kotira uva iruntemake, vikavata kia vira uva irura.

<sup>15</sup> Noravano Kotiva vika kaivaqaukavara ham-pata uva tiva taatauto uvarave, viva uva maara turave, vikara ne rauriha variate tu uvarave, Isareri vika vi uvvara vi uvvara qorrima kora. Vika vira uva kia iriraiti, qumina variqanavuara noraiqaake iriqi vivi, vikavata qumina haikaiqama vuara.

Haaru Noravano Kotiva vika tiva nimo tiharo, Ne kiama vo vatanaaka ni aumanto variaka auti varia okarara avataate, tumanta Isareri vika qaqi vi okarara avataqi viha, Noravano Kotiva qio-qamato uvvara kia irireka auti vaura.

<sup>16</sup> Vika nái Variqa Noravano Kotiva tivato uvara ekaa raqa kora. Vika *koriqohai* purumakau naati qora taaraqanta autuke vitantara tinauvu variqave tura. Vika una variqa nahenti Aseraara *maraqura/varaha* autuke viravata quahama amitora. Vika opu makaura variqave tivakeha quahama nimite, una variqa Baaliravata quahama amitora.

<sup>17</sup> Vika una variqara iriha, nái maaquev raavuvare arukeha *ofaa* iha quare vaura.

Vika naantiara qovaraiqaina okarara irireka, varante varia nahentikave, vaana kaiqa vare variakave, unaini orunte vika ire vaura. Vika *vure/quaha* vaiintiara uhiakaa autu timitaate ti, vika naare vaura. Noravano Kotiva vi okarara qora okarave tura vika vira autura kaara vira voqama kero arara itovaro vaura.

<sup>18</sup> Nora Kotira voqama kero arara itovaro viva Isareriera ne kia ti aaqanto variate tivakero navutaaka qaqi komanta vika ani vika rumpa

vare vo vataini vuru komanta Iutaaqai nái vata mini qaqi vaura.

<sup>19</sup> Ho Iutaa vika kia nái Variqa Noravano Kotiva tivato uvara iriraiti, vikavata vira uva raqake vaura. Isareri qora okara autuntemake, Iutaa vikavata vi okarara auti vaura.

<sup>20</sup> Ho Noravano Kotiva ekaa Isareri qoririma kero navutaaka vika qoraiqama nimiteha vika u haikara varaate tiro, vika kauquqi ke vaura. Mintumanta Isareri kia qora okara qaqira karaiti, qaqiqai auti vauvaro ekaara vitini Nora Kotira popohovaro nai aaqantohairo vika qaqini vara kora.

<sup>21</sup> Haaru Devitira ankuvano ekaa Isareri vaiinti nahentiqaa raqiki vauvaro, viraqaaahairo Noravano Kotiva Isareri vika raira komanta Isareri anku 10navu Nebaatira maaqu Jeroboamura kaama tovaro viva vika avuhainaa vaiinti vaura.

(1 King 11:11, 31)

Ho Jeroboamuva Isareri kuntama virivi komanta vika Nora Kotira qoririmake, qora okara anomake autura. (1 King 12:28-29)

<sup>22</sup> Jeroboamuva ekaa qora okara autuntemake, Isareri vika kia vi okarara qaqira karaiti, qaqiqai autuqi vi vauvaro <sup>23</sup> vira kaara Nora Kotira popohovaro nai aaqantohairo vika nititama kora.

Noravano Kotiva ekaa nai kaiqa vaiinti paropeti noqihairo Isareri tiva nimiyo tiharo, Oho, ne kia vi aarara qaqira kaivera, te ni tenta aaqantohai qaqini vara karerave tuntema kero, viva qaqi komanta navutaaka Isareri rumpa vare vuru Asiria vataini kora. Vate maa entara vika qaqi mini variara.

***Vo vatanaaka ani Isareri vataini vaura***

**24** Asiria avuhainaava vaiinti nahenti vonaihainaauka, Babironive, Kuta vatukave, Iva vatukave, Hamaati vatukave, Sefavaimi vatukave, mini minihainaaka ntita varero Sameria vataini Isareri vika vatukaqi vuru komanta vaura.

**25** Ho vi vatanaaka katu vare Sameria vataini oru vaiha, vika avuni kia Nora Kotirara tinavu Variqave tiraiti, kia vira quahama amitaraiti vauvaro, vira kaara Noravano Kotiva *raioni* vonavu vara komanta vika vi aniha vaiinti nahenti vokuka aru kora.

**26** Mintumanta vaiinti vokuka Asiria avuhainaava unaini orunte virara tiha, Are ntita varera Sameria vataini vuru kaarauka, vika kiama vi vataihinaa variqa uva okara kankomake iriavaro vira kaara vi variqava *raioni* vonavu vara kaimanta vika vi aniha vaiinti nahenti aruke variavo, ti.

**27** Manti tuvaro Asiria avuhainaava qiata vaiinti vo tiva amiro tiharo, Tenavu Sameriaqihai ntita vare anuraukaqihaira are oru Isareri variqa kaiqa vara amite vai vaiintira vo attairaro viva qaiqaa Sameria vataini oru vaiharo vi vataihinaa variqa vira okara vaiinti nahenti numiqaarire, tiro.

**28** Manti tuvaro viva Isareri vaiinti vo, Kotira kaiqa vara amite vau vaiintira vara kovaro viva anirantero Sameriaini oruntero, Beteli vatukaini vaiharo vi vaiinti nahentika Nora Kotira quahama amite okarara vika tiva nimi vaura.

**29** Viva tiva nimi vaumontavata, vihainaaka vo vatuka vo vatukaqi ani vauka, vika nái okaravata qaqi tuataqi viha, nái una variqa *maraqura/*

*varaha* autuke haaru Isarerि *ofaa* tainta viri kanta aututora viraqaa viraqaa vika nái una variqa *maraqura/varaha* vaaviarama tovaro vaura.

**30** Babironihainaaka vika nái una variqa Sukoti-Benotira *maraqura/ varaha* autuke vatomanta, Kutaihainaaka vika nái una variqa Negaalira *maraqura/ varaha* autuke vatomanta, Hamaatihainaaka vika nái una variqa Asimaara *maraqura/ varaha* autuke vatomanta, **31** Ivaihainaaka vika nái una variqatanta Nipahaasika Tataakika autuke vatora.

Sefavaimihainaaka vika nái una variqatanta Adramelekika Anamelekika quahama nimitareka iha, vika nái vanti arukeha vitanta *ofaa* iha quara nimite vaura.

**32** Vi vatanaaka Nora Kotira quahama amiteha, nái vikaqjhai vaiinti vonavu kaama tomanta vika *ofaa* tainta viri kanta aututova mini mini vauraqaa vaiha *ofaa* iha quare vaura.

**33** Vi vatanaaka Nora Kotira quahama amiteha, vika haaru nái maaqaini vaiha autu okarara kia qaqira karaiti, qaqi tuateha, nái una variqaravata kaiqa vara nimite vaura.

**34** Vate maa entaravata vi vatanaaka nái mintia okarara qaqi tuataqi vi variara. Vika kia Nora Kotira autu quqaaqamake tuahera karaiti, Noravano Iekopira ankuara tivato uvarave, minti minti iate tu uvarave, kia avataqi vi variara. (Noravano Kotiva Iekopira vo autu ntava amiteharo Isarerirave tura.)

**35** Haaru Noravano Kotiva Isarerri hampata kempukaiqama kero uva tiva taatautero, vikara mintima tiro:

Ne kia una variqa nutu tuaheraate. Kia vika nivuqaa vaiha kankakaavi variate. Kia vika kaiqa vara nimitaraiti, kia ofaa iha quara nimitaate.

**36** Te Noravano Kotika tenta kempukaqohai ni Isipihai ntita vare maini viri kaunarara ti, ne ti hutuqai tuahera kaate. Ne tiriaraqai tori kauru aravi vaiha ti vohaiqaqai ofaa iha quara timitaate.

**37** Te ekaa niara iriha uva tiva taunarave, uva maara tiva nimunarave, ekaa vi uvvara vi uvvara qara ntuva taunara ne koqemake iriqi vuate. Kia una variqa nutu tuahera kaate.

**38** Te ni hampata uva tiva taatau tauna uvvara kia tauru karaiti, kia una variqa nutu tuahera kaate.

**39** Ne kia mintiraiti, ti nenta Variqa Nora Kotika hutuqai tuahera kaate. Ne mintiqe te navutaaka kauquqihai ni ruaruama nimitararave, tiro.

Noravano Kotiva minti tura.

**40** Noravano Kotiva minti tumantavata, vika kia vira uva iriraiti, nái haarua okara qaqqiqai autuqi vi vaura.

**41** Vi vatanaaka Nora Kotira autu tuahe-reha, nái una variqa nutuvata tuahere vaura. Vate maa entaravata vika vaintivarave, naintivarave, nái naaqua taatoka untemake, hampi okaraqai autuqi vi variara.

*Hesekiaava Iutaaqaa raqiki vaura*

<sup>1</sup> Elaara maaqu Hosiava taaramo ihiara Isareriqaa raqiki vau entara, Ahaasira maaqu Hesekiaava Iutaa avuhainaa vaiintiqama viro vaura.

<sup>2</sup> Hesekiaava 25 ihi varakova avuhainaa vaiintiqama viro Ieruharemiqi vaharo 29 ihiara Iutaaqaa raqiki vaura. Vira nova Abiaava Sekaraiaara raavura vaura.

<sup>3</sup> Hesekiaava nai kaivaqava Devitiva Nora Kotira avuqaa koqe okara autuntema kero, koqe okara auti vaura.

<sup>4</sup> Viva *ofaa* taintanavu vo ainqina vo ainqinaqaa vaura qaqini vara aqukero, oriqohai una variqa *maraqura/varaha* aututora voqi voqi vaaviarama tora ravantiaqa aqukero, una variqa nahenti Aseraara *maraqura/varaha* katariqaa nkaurutora voqi voqi aratora tuqu taaquma kero, haaru Mosiva *baraasiqohairo* memaru *maraqura/varaha* aututora, viravata kinta kaantama aqukora. Mosiva memaru *maraqura/varaha* aututora, haaruvata vatevata vainti nahenti virara *Nehusitaani-rave* tivake vi haikara quahama amiteha, koqe unta iaina haikara vira iha quara amite vaura.

<sup>5</sup> Hesekiaava Isarerি Variqa Nora Kotirara quqaama viva ti kahaqiarirava vaivo tivakeharo virara noraiqaakero iriqi vi vaurara ti, Iutaa avuhainaka haaru avuni vaukavata Hesekiaara naantiara qovaraiqukavata kia vira voqauka vaura.

<sup>6</sup> Hesekiaava Nora Kotirara noraiqaakero iriqiro viharo kia vira uva raqa karaitiro, viva Mosirara tivato uvvara koqema kero iriqiro vi vaura.

**7** Mintuvaro Noravano Kotiva Hesekiaakantiro vaiharo vira kahaqi vauvaro viva ekaa kaiqa varova koqe iro vaura.

Hesekiaava kia Asiria avuhainaara vevaaraini vaireva iharo kia vira kaiqa vara amite vaura.

**8** Hesekiaava nai iqoka vaiinti ntita varero Pirisia vataini oruntero vi vatanaaka hampata raqiharo nora vatukave inaara vatukave aatara kero, oru viviro, Gaasa vatukaqi vaukavata vi vatukara tataaqaa vaukavata naatara kora.

**9** King Hesekiaava 4 ihiara Iuttaaqaa raqiki vau entara King Hosiava 7 ihiara Isareriqaa raqiki vauvaro vi ihiraqi Asiria King Samaneseva nai iqoka vaiinti ntita varero Isarerri hampata raqireva oru Sameria vatuka ututumate vau-manta vatukaqi vauka aaqaini vaatinte vi aniva kia vaura.

**10** Ho Asiria vika taaramo ihiara Sameria vatuka ututumate variqi vi, viraqaaahai vi vatukara varora. Vi entara Hesekiaava 6 ihiara Iuttaaqaa raqiki vauvaro Hosiavavata 9 ihiara Isareriqaa raqiki vau entara Asiria vi vatukara varora.

**11** Sameria vatuka varovaro Asiria avuhainaava Isarerri vika rumpa varero vuru Asirianini kora. Viva vika rairakeri maa vatukanavuraqi komanta vaura: Hala vatukave, Habo Namari aumanto Gosani vatukainive, Midia vataini vatukanavu vauraqive, komanta vaura.

**12** Isareri nái Variqa Nora Kotira uva kia irura kaara vi maarava vikaqaa qovaraiqura. Noravano uva tiva taatau tero nai kaiqa vaiinti Mosira tiva amu uvvara vika ekaa vi uvvara raqake vaura.

Vika vi uvvara kia iriataa umanta kia avataqi vi vaura.

<sup>13</sup> Hesekiaava 14 ihiara Iutaaqaa raqiki vau entara Asiria King Senakeripiva nai iqoka vaiinti ntita varero ani Iutaa hampata raqiharo vika naatara kero, vo vatuka vo vatuka vaantaavuravano ututumatora vare, „Ieruharemiqai kia varora.„

<sup>14</sup> King Senakeripiva Lakisi vatukaqi vauvaro Hesekiaava viraini uva vara kero tiharo, Oho, „te ai vevaaraini variataara vaimanta te kia mintiraiti,„ qora okara autu kauro. Are iqoka qaqlira kera viraqe te nana nana haikarae are ti naarinara ai amiare, tuvaro Senakeripiva vira naariro tiharo, *Silvaa 10,000 kilovata, kori 1,000 kilovata timiane, tiro.*

<sup>15</sup> Minti tuvaro Hesekiaava Nora Kotira Naavuqihairove, avuhainaara naavu monu vate vau *rumuraqihairove*, ekaa *silvaa* viraqi vaura varakero Senakeripira amitora.

<sup>16</sup> Hesekiaava Nora Kotira Naavu qentinavuqaave, qenti *pohinavuqaave*, *kori ruqutukero* naavumatora ravaqaakero King Senakeripiva vaunaini vara kora.

<sup>17</sup> Asiria avuhainaava „*korivata silvaavata* varero „viva kia iqoka qaqlira karaitiro,„ viva nai iqoka vaiintiqaa raqikuka taaramonavu, Tataanirave, Rabi-Sarisirave, Rabi-Sakerave, nititomanta vinavuka iqoka vaiinti airitahaa vataake Lakisiqihai Ieruharemini vura.

Ieruharemi „*vaantaavura aaqaini*“ vaiintiナ henti tavuna hiqe vaunaini vika orunte mini himpi vaura. Varuva namari veraraqaa vau-raqaahairo oraqi tuvi vaura.

**18** Ho Asiria vika mini orunte King Hesekiaara aarovaro viva nai nora vaiinti taaramonavu Asiria vaunaini nititora. Viva Hikiara maaqu Eliakimira avuhainaara naavuqaa raqiki vaurave, vira qara ntuva amite vaura Sepinaarave, viva varo kaiqarave, vo uvave, vukuqi qara nti vaura Asapira maaqu Joaarave, vinavuka nititomanta vurâ.

**19** Oru ntomanta Rabi-Sakeva vinavukara tiharo, Ne Hesekiaara maa uvara muntu tiva amiate: Asiria avuhainaava nora vaiintivano ariara mintima tivo: Hesekiaao, are nana haikaqaa muntuvi vahiharae, kia ti vevaaraini vaireva, auti variaro? **20** Are ti variara uvava qumina uvama vaivo. Vi uvava kia ho ti iqoka vaiinti kem-pukave, iqoka okara iri taverave, aatara kaanarove. Are taraqaa muntuvi vahiharae kia ti vevaaraini vaireva, auti variaro?

**21** Oho, te iri tavauro. Are Isipiqa muntuvi vahihara vika ti kahaqivarave tivakehara variaro. Vaiintivano anu aaharaqaa muntuvi vaivaro vira kauqu teqa kaintemake, Isipi avuhainaa vaiintiqaa muntuvi vaika qoraiqama vivarave.

**22** Are tiriara tihara, Tenavu tentanavu Variqa Nora Kotiraqaa muntuvi vauro, tirera, vi uvavata kia ho varianarove. Hesekiaao, are kiae iritaaro? Arema Nora Kotira *ofaa* tainta vo aiqina vo aiqinaqaa vaira ravantiaqa kaaro. Arema Iutaavata Ieruharemini variakavata tiva nimira tihara, Ne Ieruharemiqiqai oru vaiha *ofaa* tainta vohaiqaqaa *ofaa* iha quaraate, tianarave.

**23** Ho Hesekiaao, tenta avuhainaa vaiinti au-tuqaa te ariara tiha, Are minti minti irera, te mintima irarave. Are 2,000 iqoka vaiinti ohiqaa

raqika ranta kairera, te 2,000 ohi ai amirerave. Te tavaurara are kia ho mintinarave.

**24** Ti avuhainaara iqoka vaiinti inaara autu vataaka are kia ho vika naatara kenarave. Isipi iqoka vaiinti iqoka *kaariqi* vaiha raquaka kia ho ani ai kahaqivarave. Are qumina vika veka vainarave.

**25** Noravano Kotiva kia ti tititaimantae te ni hampata iqoka raqiha ni vehi autu karera anuro? Are mintimae iriaro? Aqao, Noravano Kotiva viva ti tiva timivera, te ai hampata raqiha ai vatavata vehi autu taiqa karera anuro, tiro.

**26** Asiria iqoka vaiintiqaa raqiki vauva Rabi-Sakeva minti tumanta Eliakimivavata Sepinaavavata Joaavavata virara tiha, Mpo, tenavu Asiria uva irunarave. Kia Hiparu uvaqihaira uva tiraitira, Asiria uvaqihaira tiane. Hauri virira vatuka vaantaavuraqaa variaka are tina uvara irivorave, ti.

**27** Vinavuka minti tuvaro Rabi-Sakeva aqao tiro, Ti avuhainaava kiama ninavuvata ninavu avuhainaaravataqai tiva amiate tiraitiro, ti tititairavauve. Te virira vaantaavuraqaa variakavata maa uvara tiva nimirerave. Naantiara ne kara neva kia variaina entara, vika ninavu aanante nái raha viara nevarave, tiro.

**28** Minto tivakero Asiria vaiinti viva himpiro vaantaavuraqaa vauka taveharo Hiparu uvaqihairo naveratiharo, Asiria avuhainaava nora vaiintivano ti uvara ne iriate. **29** Viva mintima tivo: Ne kiama qaqi kaivaro Hesekiaava ni unaqaraiqama nimitaarire. Viva kiama ho ti kauquqihairo ni ruaruama nimitaanarove.

**30** Hesekiaava tiharo, Noravano Kotiva tinavu ruaruama timitaanarove. Maa vatukava kiama Asiria avuhainaara kauquqi varianarove, ti vai uvvara kia iriate. Ne kiama Hesekiaara uquerara uva iriha Nora Kotiraqaa muntuvi variate.

**31** Ne kia Hesekiaara uva iriraiti, Asiria avuhainaara uva iriate. Viva niara mintima tivo: Ne iqoka raqira qaquirake, aaqaini vevante ani ti vevaaraini variate. Ne mintivera, ne homa nenta naahoqiraara, *uaini* tavave *fiki* tavave varake neha, nenta vata quvitaaraqihairo urina namarira nevarave.

**32** Ne mintiaqi viha ti veka vaiqe te ani ni ntita vare vo vataini vuru kaari ne nenta vataini variantemake variate. Vi vataraqaa *uaini* naaho airi vaimanta ne homa *uaini* tatike nevarave. *Uiti* naaho airi vaimanta ne viraqohai homa mpareti untake nevarave. *Orivivata hanivata* airima mini vaivo.

Ni muntukavano nana haikarae vaivo? Ne ti uva irivera, ne kia qutu viraiti, qaqi vaivarave. Ne Hesekiaara uva irivera, ne qutu vivarave. Viva ni una tiharo, Noravano Kotiva tinavu ruaruama timitaanarove, ti uvvara ne kia iriate.

**33** Ho iriate. Te Asiria avuhainaaka vo vatanaa vo vatanaaka hampata raquqi vuramanta, kia vika variqa vovano ti kauquqihairo vika ruaruama nimitairave.

**34** Te vo vataini vatuka vonavu Hamaative, Apaative, Sefavaimive, Henaave, Ivaave, vika hampata raquna entara vika variqanavu tainie variamanta „te vi vatukaranavu naatara kuanarave“? Te Sameria vatukaqi variaka naatara kauna entara vika variqavano ti kauquqihairo vika ruaruamae nimitairave? Aqao, kiavuve.

<sup>35</sup> Ekaa vi vatara vi vataraqi varia variqaukaqihairo kia variqa vovano vo vatavata ti kauquqihairo qaqini vara kairara ti, nantihae ne Ieruharemiqi variaka tiriara tiha, Noravano Kotiva vi vaiintira kauquqihairo tinavu ruaruama timitaanarove, ti variavo? Tinavu Asiria avuhainaava niara mintima tivo, tiro.

<sup>36</sup> Asiria iqoka vaiintiqa raqiki vauva ekaa nai uva tiva taiqa kovaro Hesekiaava kia vo uvavata virara tiate turara ti, vaantaavuraqaa vauka kia uva voqavata tiraiti, qaqi evaara vaura.

<sup>37</sup> Eliakimivavata Sepinaavavata Joaavavata vinavuka muntuka qoraiquvaro nai utavaaqa qunahi qaanahimake, Rabi-Sakeva tu uvara vuru Hesekiaara tiva amura.

## 19

### *Hesekiaava Aisaiaara irora*

<sup>1</sup> Hesekiaava Asiria vatanaaka tu uvara iruvaro vira muntuka qoraiquvaro nai utavaaqa qunahi qaanahima kero kovaara utavaaqa nonku varero Nora Kotira Naavuqi oru vaura.

<sup>2</sup> Viva avuhainaara naavuqaa raqiki vau vaiintira Eliakimirave, avuhainaara qara ntuva amite vau vaiintira Sepinaarave, Kotira kaiqa vara amito vaiintika noranavuve, naaramakero nititomanta vikavata kovaara utavaaqa nonkute paropeti vaiinti Emosira maaqu Aisaiaava unaini vura.

<sup>3</sup> Vika orunte vira tiva ami tiha, Hesekiaava mintima tivo: Mpo, vate tinavuqaa nora maara qovaraiqi entarave. „Asiria“ tinavu tauvaqavauraa uva tiavarо tinavu voqama kero kaurivo. Nahenti kempukavano kia vaivaro viva kia ho

vainti vatataintema kero, tinavu kempukavano kia vaivo.

<sup>4</sup> Asiria avuhainaaya Rabi-Sakera atitaivaro viva anintero qaqi variqiro vi vai Variqarara qora uva tiva amitaivo. Mpo, vika qora uva tiara ai Variqa Noravano Kotiva iriro, vika qoraiqama nimitairera, te hove tiataarave. Are Kotira aarairaro viva tenavu taaraiqa qaqi vaurauka kahaqiarire tivo, ti.

<sup>5</sup> Hesekiaava nititoka vira uva Aisaiaara tiva amuvaro viva vikara tiharo, <sup>6</sup> Ne anirante nenta nora vaiinti vuru mintima tiva amiate: Noravano Kotiva tiharo,

Asiria avuhainaara paanaa kaiqa vare variaka ti Kotikara qora uva tiara are kia vira aatu getehara variane.

<sup>7</sup> Te „Asiria avuhainaara“ avu aato hampiqama kaariraro viva aaranahairo uva vo iriro, anirantero nai maaqaini vuarire. Viva nai maaqaini oru vairaqe te qaqi kaari vo vaiintinavu iqoka paiseqohai vira aru kaate tivo, tiro.

Aisaiaava Kotiva mintima tivo tura.

<sup>8</sup> Ho Rabi-Sakeva vaiharo iruvaro King Senakeripiva Lakisi vatuka kero vonaini vuvaro viva nai iqoka vaiinti ntita varero Ieruharemi kero oru tavovaro Asiria avuhainaava Lipina vatukaqi vauka hampata raqi vaura.

<sup>9</sup> Asiria King Senakeripiva iqoka raqi vaumanta vokuka ani vira tiva ami tiha, Itiopia King Ti-haakiva Isipi ntita varero ani ai hampata iqoka raqirevave, tuvaro Senakeripiva vi uvara iriro vaiintinavu nititomanta vira qara vare vuru Hesekiaara amura. Senakeripiva mintima tiro:

**10** Are Variqa voqaa muntuvi variarava viva ariara unahaa tiharo, Te kia Asiria avuhainaara qaqi kaariraro viva Ieruharemi vatuka ho varaanarove tivo. Hauri are vira uvara quqaa uvave tirorave.

**11** Asiria avuhainaaka ti avuni vauka raqua okararavata te raquna okararavata are irira tavaanarave. Tenavu oru vo vataini vo vataini vo vatanaa vo vatanaaka hampata raqihha vika vehi autu taiqa kaunarave. Hauri are tihara, Tinavu Variqavano tinavu ruaruama timitaanarove tirorave.

**12** Haaru ti kaivaqaukavara Gosani vatukaqi vaukave, Haraani vatukaqi vaukave, Resepi vatukaqi vaukave, vehi autu taiqake, Beti-Edeni vatanaaka Telasaa vatukaqi vaukavata aru taiqa korave. Ti kaivaqaukavara vi vatanaaka vi vatanaaka hampata iqoka raqi vaumanta vika variqanavu kia vika ruaruama nimitorave.

**13** Hamaati avuhainaavave, Apaati avuhainaavave, Sefavaimi avuhainaavave, Henaa avuhainaavave, Ivaa avuhainaavave, vika vate qaqie variavo? Kiavuve. Tenavu vika ekaa aru kaunarave, tiro.

Senakeripiva mintima qara ntuvatora.

**14** Senakeripiva nititoka vi qarara vare vuru Hesekiaara amuvaro viva vira tavero, Nora Kotira Naavuqi oriqetero vira aaqanto vaiharo vi qarara raira kero vatero **15** Nora Kotira aarero tiharo,

Mpo, Noravauvu, are tinavu Isareris Variqavano vaihara are nena avuhainaa taintaqaai oquvi variaramanta aroka vataa *enselinavu ai*

hini hini mantaraini variavara variaro. Are-qai Variqavano vaiharara tira, are ekaa maa vataraqaa raqiki variaravama variaro. Are vatavata naaruvavata autu kera vataaravama variaro.

<sup>16</sup> Mpo, Noravaauvo, are nena aato ti timihara ti uva iriane. Mpo, Noravaauvo, nena avu ram-paikera tavaane. Are qaqi variana Variqarara Senakeripiva qora uva tira iriane.

<sup>17</sup> Noravaauvo, tenavu iri tavauramanta Asiria avuhainaaka vo vatanaa vo vatanaaka vehi autu taiqake vika vatavata qoraiqama kaarave.

<sup>18</sup> Asiria avuhainaaka vi vatanaaka una variqavata varake ekaa iha quara kaarave. Ho vi haikauka kia quqaa variqa variamanta vai-intivano katarive orive varake nái kauquqohai vi haikara autuke vataarave.

<sup>19</sup> Noravaauvo, are tinavu Variqavano variaro. Mpo, vate are Asiria King Senakeripira kauquqihira tinavu tivita varaane. Are mintiramanta ekaa maa vataraqaa variaka tave ariara tiha, Noravano Kotiva vivaqaima Variqavano vaivo tivarave, tura.

### *Aisaiaava Hesekiaara tiva amu uvara*

<sup>20</sup> Hesekiaava Kotira aarovaro Aisaiaava viva unaini uva varakeharo mintima tiro: Tinavu Isarerি Variqa Noravano Kotiva ariara mintima tivo:

Are ti aarehara King Senakeripirara tiana uvara te iruro.

<sup>21</sup> Ho te Noravano Kotika maa uvara Senakeripirara turo: Senakeripio, Ieruharemipi variaka ai vehiqama amiteha ai naaraihama amite variavo.

Are Ieruharemi kera aiqu aututera kante vi variaramanta vika nái anu tukiarima keha, vehi vaiintivanoma vivo ti variavo.

<sup>22</sup> Senakeripio, are tauvaqavauraa uvave qora uvave tihara, tararae vi uvara tiaro? Are tiriarama vi uvara tiaro.

Are nena mahuta tihara, noraiqaakera uva tihara, are tararae vi uvara tiaro? Are te Isarerি Variqa takuquvi vauraukarama vi uvara ti vari- aro.

<sup>23</sup> Ti Nora Kotikara qora uva tiate tira, are vaiinti vonavu nititera, vinavuka noqihaira are tihara,

Te tenta iqoka *kaari* airitahaa hampata iqoka raquqi viha Lebanoni ainqina, vo ainqina vo ainqina noraqaa vaarintauro, tiaro.

Te Lebanoni nanta noraqi origete vi vatanaaka *sidaa* vukaivata, toqukera koqueravata, tuqu taaquma keha vika nanta nora avutaqi vunarave.

<sup>24</sup> Te vo vata vo vataini niha tenta namariara quvitaunaraqihai namari kaqake ne vaunar- ave.

Te Isipini vo namari vo namariqaa aiqu ntava tauraro ekaa vi namariva aaharaiqama virave, tiaro.

<sup>25</sup> Are vi uvara vi uvara tiharama nena mahuta ti variaro.

Ho Senakeripio, kiae irianarave? Nai haaru te vi haikara vi haikara maa entara mintimakero qovaraiqiarire ti, ai kaama taunarave. Te tenta aatoqi iritaunantemake, te ai kem- pukaiqama kaurara are kempuka vatuka, vo vatuka vo vatuka ravantiaqa raavantiaqama kaararo orivano kirikairiro vaivo.

**26** Vi vatukaraqi varia vatanaaka voqamake qete variavaro vika avu aatovanovata hampiqimanta variavaro vika kempukavata kia vaivo. Naaho qaraaka ututairave, naavu qiataqaa qampiqatai ukaurave, nora kuarivano tatoqa kaivaro kia qampiqaintemake, vi vatanaaka variavo.

**27** Ho are oquvi varianarave, himpi varianarave, aaraini vi anianarave, te ekaa vira vira kankomake iri tavaunarave. Ai voqama kero tiriara arara itairavata te iri tavaunarave.

**28** Ai voqama kero tiriara arara itairavate, nena mahuta tianarave, te virara iri, vira kaara te qiqora ai aqiana ruqiake, ohi noqi vate varia ainira varake ai noqi vate, ai rara vuruvi kaarirara are vohaa vi aararaqaa anirantera vinarave, tivo.

Kotiva Senakeripirara mintima tivo, tiro.

**29** Aisaiaava vi uvvara minti tivakero viva Hesekiaarara tiharo,

Maa ihiravata, hora ihivata, ne kia ho kara utiraiti, ne qaakau karavano qampiqairaqaaima nevarave. Vi ihitanta taiqairaro vo ihi anintairamanta, ne vi ihiraqi *uitive uainive* utukeha nevarave. Te tunantema kero, vi haikava qovaraiqirara are tavera, te Senakeripirara tiva tauna uvararavata quqaa uvave tinarave.

**30** Ho naantiara Iutaa vokiaka navutaaka kia qoraiqama nimitaamanta qaqi variaka, kara naahoqi ututaavaro qampiqero airi tava iraintemake, vika koqemake vaiha airitaha vaivarave.

**31** Ieruharemiqihaiive, Saioni Aiqinaihaiive vaiinti nahenti taaraiqavano ruqemake

vuaka vika qaiqaa anivarave. Noravano Kotiva ekaa kempuka vataava vi haikava qovaraiqiainarara noraiqaakero iriqiro viharora tiro, viva vi haikara qovaraiqama kaanarove. <sup>32</sup> Noravano Kotiva Asiria avuhainaarara mintima tiro:

Viva nai iqoka vaiinti hampata kiama ho Ieruharemiqi uriqetero veva voqavata viraqi aruanarove. Viva kiama kainke hiri varero vatuka aumanto anianarove. Vika kiama vaantaavura tataaqa vata ntavate viraqaa vaarinte vaiha raqivarave.

<sup>33</sup> Viva kiama Ieruharemiqi uriqetaraitiro, viva nai ani aararaqaa anirantero vuanarove. Te Noravano Kotika vi uvara turo. <sup>34</sup> Te tenta nora autuaravata, tenta kaiqa vaiinti Devitiraravata irihama mintirerave tivo, tura.

<sup>35</sup> Ho vi entara entaqi Noravano Kotiva atito *enseliva* Asiria naavu maaqa kaqatoraqi otuntero 185,000 vaiinti aru kora. Vira qararaa toqaqi Asiria iqoka vaiinti qaqi vauka himpi tavomanta vaiinti vaata airitahaa vona vona vaura.

<sup>36</sup> Mintuvaro Senakeripiva nai iqoka vaiinti qaqi vauka hampata nai anu aararaqaa anirantero Asiriaini viro Ninive vatukaini oru vaura.

<sup>37</sup> Viva mini vaharo vo enta nai una variqa Nisirokira naavuqi oriqetero vira quahama amite vaumanta vira maaqtanta Adramelekika Sarseeka iqoka paipeqohai vira aruke, vitanta ruqemake Araraata vataini oru vaura.

Senakeripira arukovaro vira maaqu vo Esahadoniva nai qora vatuka varero Asiria avuhainaa vaiintiqama viro vaura.

## 20

### *King Hesekiaava rovara varora*

<sup>1</sup> Vi entara King Hesekiaava rovara varero aumakaa qutuarirava vauvaro paropeti vaiinti Emosira maaqu Aisaiaava oru vira tavero virara tiharo, Noravano Kotiva ariara mintima tivo:

Ai rovaravano kia taiqairara are qutu vinarara tira, are vaiinti nahenti ai naavuqi variaka tiramanta vika ekaa are iana haikara tumaara maaramake vataate, tivo, tiro.

<sup>2</sup> Aisaiaava minti tuvaro Hesekiaava vi uvara iriro tuqantaaviro nai viri porovaini vatero Nora Kotira aarero tiharo, <sup>3</sup> Mpo, Noravauvu, te kia ai qaqla karaiti, ai aaraqaa koqemake niha, ariaraqai iriha, ai avuqaa koqe kaiqaqai varaqi vunarave, tivakero noraiqaakero iqil ratora.

<sup>4</sup> Iqi rate vauvaro Aisaiaava avuhainaara naavuqihairo vevantero naanteqaraini ni vauvaro Noravano Kotiva vira tiva amiro tiharo, <sup>5</sup> *Are anirantera oru maa uvara ti vaiinti nahentiqaa raqiki vaira tiva amiane:*

Te Noravano Kotika ai kaivaqara Devitira Variqavano ariara mintima turo: Are ti aaraana uvara iri, ai auquru ntairavata tavauro. Te virara irihama ai rovara taiqa amitarerave. Hura vira qararaa are ti Nora Kotika Naavuqi oru vainerave.

<sup>6</sup> Te ai qaqla kaarirara are kia vaaka qutu viraitira, <sup>15</sup> ihi voqavata variqira vinarave. Te Asiria avuhainaara kauquqihai aivata Ieruharemi vatukavata ruaruama nimitarerave.

Te tenta nora autuaravata, tenta kaiqa vaiinti Devitiraravata iriha, maa vatukara antua taari navutaaka kia ho varevarave tivo, tiro.

<sup>7</sup> „Aisaiaava vuru vi uvara avuhainaara tiva amiro,„ vira kaiqa vaiintiara tiharo, Oru *fiki* tava vare, Hesekiaara *meqaqaa/veqaqaa* aqu ami-taivaro tavanta vuarire, tiro.

<sup>8</sup> Manti tuvaro Hesekiaava Aisaiaara irero tiharo, Te nana haika tavehae tiha, Quqaama Noravano Kotiva ti koqema timitaivo tivake, hora vira qararaa Nora Kotira Naavuqi vuainarave? tiro.

<sup>9</sup> Tuvaro Aisaiaava nai tiva amiro tiharo, Ho maa haikara are tavera quqaama Noravano ti koqema timitaivo tinarave. Are tenavu kuari avuara iriha kairiqa kaara ntuainara tavaane. Ho erairaro vira maraquravano vukaiqiharo vutunie vuanarove, mainie anianarove? tiro.

<sup>10</sup> Aisaiaava minti tuvaro Hesekiaava tiharo, Erairaro vira maraquravano maini aniariravama vaivo. Ho qaqi kairaro vira maraquravano kia maini aniraitiro, tuqantaaviro vutuni vuarire. „Kairiqa maraquravano mintirera, te tiha, Quqaama Kotiva ti rovara taiqa kaivo tiare,„ tiro.

<sup>11</sup> Manti tuvaro paropeti vaiinti Aisaiaava Nora Kotira aarovaro Noravano qaqi kovaro erovaro maraquravano kia aniraitiro, tuqantaaviro vutuniqai vukaiqaakero vaura. (Haaru King Ahaasiva vi *kirokira* kuari avuara iriharo autu tora.)

### *Babironihainaaka Ieruharemini vura*

<sup>12</sup> Vi entara Babironi King Baladaatira maaqu Merodaki-Baladaaniva Hesekiaava nora rovara varo uvara iriro, viva virara mpo ike tivakero qara vo ntuva kero koqe haika vovata qerama

kerovoku vaiintika nimumanta vika Hesekiaara amireka viva unaini vare vura.

<sup>13</sup> Vare oruntovaro Hesekiaava vika quahama nimitero, ntita varero ekaa haika vatora vika numiqora. Viva nai *kori* orive *silvaa* orive, karaqaa aatake nerave, vahavera koqe munta iainarave, auvihehavaave, numiqora. Viva kia vo haikavata kukeqa taraitiro, viva ekaa nai avuhainaara naavuqive, vo naavuqive nai raqiki vau vataraqaa vau haikarave, ekaa vi haikara vi haikara vika numiqomanta tavora.

<sup>14</sup> Ho vika tave anirante vuvaro paropeti vaiinti Aisaiaava King Hesekiaava unaini anintero vira irero tiharo, Vi vaiintika taihainaakave? Vika nana uvae ai tiva amiavo? tuvaro Hesekiaava vira tiva amiro tiharo, Vika Babironi niaraihai aniakave, tuvaro <sup>15</sup> Aisaiaava virara tiharo, Vika nana nana haikae avuhainaara naavuqi tavaavo? tuvaro Hesekiaava tiharo, Te tenta una haikara ekaama numiqake, kiama voqavata kukeqa tauro, tiro.

<sup>16</sup> Tuvaro Aisaiaava Hesekiaarara tiharo, Oho, te Noravano Kotiva ti uvara ai tiva amiarirara iriane. Viva mintima tivo:

<sup>17</sup> Vo enta anintairamanta Babironi vika ani ekaa haika avuhainaara naavuqi vainara vare, ai kaivaqaukavara ruvaaqumake vataa haikaravata vare, kia vo haikavata qaqi karaiti, vika ekaa haika vare Babironini vuru kevarave, tivo.

<sup>18</sup> Vi entara vika are kuvuarama terauka qorainti vaiinti vokika ravaaqavuke vare Babironini vuru ke, vika tava toqa kaimanta vika nai avuhainaara naavuqi vira paanaa kaiqa varevarave, tivo.

Noravano Kotiva mintima tivo tiro.

<sup>19</sup> Aisaiavaa minti tuvaro Hesekiaava nai aa-toqi mintimama iriro, Te qaqi variqi vuaina entara vi haikava kia ho qovaraiqiraro iqokavanovata kia vairage te koqemake variqi virarave, tivakero viva tiharo, Are Nora Kotira uva ti tiva timiarava koqe uvama vaivo, tura.

### *Hesekiaava qutu vura*

<sup>20</sup> King Hesekiaava ekaa vo kaiqa vo kaiqa varo uvarave, viva kempukaiqama kero iqoka raqu uvarave, viva varuva namarivano vari-are tiro vata quvikero, namarivano viraqihairo Ieruharemini otu vuarire tiro, viva ora maavira vataqi quvito uvarave, ekaa vi uvvara vuku vo, *Iutaa Avuhainaaka Uva Okarave* tu vukuraqi qara ntuvatora.

<sup>21</sup> King Hesekiaava qutu vuvaro vira maaqu Manaseva vira vatuka varero avuhainaa vaiinti vaura.

## 21

### *Manaseva Iutaa avuhainaava vaura*

<sup>1</sup> Manaseva 12 ihi varako entara, viva avuhainaa vaiintiqama viro Ieruharemiqi vaiharo 55 ihiara Iutaaqaa raqiki vaura. Vira nova Hepsibaava vaura.

<sup>2</sup> Manaseva Nora Kotira avuqaa qora okara autuqiro vi vaiharo haaru vauka qora okara auturavata avataqiro vi vaura. Noravano Kotiva vi vatanaaka vara qaqlini kero vika vata tinavu Isarer kaivaqaukavara nimura.

<sup>3</sup> Vira qova Hesekiaava *ofaa* tainta vo aiqina vo aiqinaqaa aututora ravantiaqa kora, Manaseva

qaiqaa autukero, una variqa Baalirara iriharo *ofaa* tainta, vo tainta vo taintavata autukero, haaru Isarerri King Ahaapiva autuntema kero, viva una variqa nahenti Aseraara *maraqura/varaha* katari nkauru kero aratero, viva naaruvaini opu makaura variqa haikave tivakeharo kankakaaviro vi haikara quahama nimitaate vaura.

<sup>4</sup> Haaru Noravano Kotiva tiharo, Vaiinti nahenti Ieruharemiqi vaiha ti hutu tuahera kaate, tu Naavuva vauvaro, Manaseva una variqanavuara iriharo Nora Kotira Naavuqi *ofaa* tainta vonavu autu kero vatora.

<sup>5</sup> Nora Kotira Naavu naanteqaraini vatuka taaraqanta vauvaro Manaseva vaiinti nahenti opu makau quahama nimitaate tiro, viva *ofaa* tainta vonavu mini autu kero vatora.

<sup>6</sup> Manaseva una variqa *ofaa* iha quara nimittareva nai maaqu arukero iha quaratero, vaana kaiqave hepi kaiqave varaqiro vura. Viva *vure/quaha* vaiintive, vara nte vaukave, naaramakero vikara ti koqe avu aato timiate ti vaura. Manaseva mintima kero qora okara noraiqaakero Nora Kotira avuqaa auti vaura kaara Kotira voqama kero arara itovaro vaura.

<sup>7</sup> Manaseva una variqa nahenti Aseraara *maraqura/varaha* nkauruto katarira varero vuru Nora Kotira Naavuqi vatora.

Haaru Noravano Kotiva Devitiravata vira maaqu Soromonuravata tiva nimiro tiharo,

Vaiinti nahenti maa Naavuraqi ekaa enta ti hutu tuahera kaate ti, te ekaa Isarerri ankuvano varia vataraqihai Ieruharemi kaama taunarave.

**8** Ne ti vaiinti nahenti ti uva koqemake iriqi viha, ti kaiqa vaiinti Mosiva ekaa ni tiva nimi uvara iriqi vivera, te ni kaivaqaukavara nimuna vataraqaa hai kiama ni nititama kararave, tiro.

**9** Nora Kotira uvavano mintima vaumanta vika kia vira uva irura. Manaseva vika kuntama virivi komanta vika voqamake qora okara auti vaura. Vika qora okara autuva haaru vo vatanaaka vi vataraqaa vauka qora okara auturavata aatara kora. Noravano Kotiva haaru vi entara vauka vehi autu komanta Isareri vika vata varora.

**10** Noravano Kotiva nai kaiqa vaiinti paropetinavu noqihairo maantima tiro:

**11** Haaru Amo vatanaaka avuni vi vataraqaa vaiha vika qora okara auti vaurave. Ho maa entara Iutaa King Manaseva vika auturavata aatarakero nai voqavata qora okara auti vaiharo una variqa maraqura/varaha autu kero vatero, Iutaavata kuntama vuruvi kaimanta vikavata qora okara auti variarave.

**12** Mintiara kaarama te Noravano Kotika ni Isareri Variqavano mintima turo: Te vo enta Ieruharemiqi vaikavata Iutaini vaikavata anomake qoraiqama nimitaari vo vatanaaka vi uvara iri, virara mpo ike tivarave.

**13** Te Sameria vatukaqi variakavata, Isareri King Ahaapiravata vira ankuvata ntaihe kaunantemake, Ieruharemiqi variakavata ntaiharerave. Vaiintivano namari ataara nunka kero tanu tuqantaakero vataintemake, te Ieruharemi vatukaqi variaka nunka kaari kia vaivarave.

**14-15** Haaru vika kaivaqaukavara Isipi ke anu entaraqaahai vika qora okaraqai ti tivuqaa autuqi anisha, ti arara itai haikara timiqi ani, vate maa entaravata vi okarara qaqqiqai autuqi vi variara kaara te ti vaiinti nahenti qaqi variaka navutaaka kauquqi kaari, navutaaka vika qoraiqama nimiteha vika ia haikara raqiake varevarave, tiro.

Noravano Kotiva nai kaiqa vaiinti paropeti noqihairo minti tura.

**16** Manaseva Iutaa kuntama virivi komanta vikavata Nora Kotira avuqaa qora okara autihama una variqa *maraqura/ varaha* quahama nimitora. Kia vo uvavanovata vikaqaa vau vaiinti nahentika Manaseva qumina arikovaro vika naarevano Ieruharemi vatuka mpiqa vurave.

**17** King Manaseva ekaa vo kaiqa vo kaiqa varo uvarave, viva qora kaiqa varo uvarave, ekaa vi uvava vuku vo, *Iutaa Avuhainaaka Uva Okarave* tu vukuraqi qara ntuvatora.

**18** Manaseva qutu vumanta vira vaata vare vuru avuhainaara naavu kaqava, *Usaara Kaqavave* turaqi quntama tovaro vira maaqu Emoniva nai qora vatuka varero avuhainaava vaiintiqama vura.

### *Emoniva Iutaa avuhainaava vaura*

**19** Emoniva 22 ihi varakova avuhainaava vaiintiqama viro Ieruharemiqi vaiharo taara ihiara Iutaaqaa raqiki vaura. Vira nova Mesulemetiva Harusira raavuravano Jotaba vatukaihainaava vaura.

**20** Emoniva nai qova Manaseva autuntema kero, Nora Kotira avuqaa qora okara autura.

**21** Nai qova qora aaraqaa nuntema kero, vivavata qora aaraqaa ni vaura. Nai qova una variqa *maraqura/varaha* quahama nimitontema kero, vivavata vi haikara vi haikara nivuqaa kankakaaviro vaiharo quahama nimite vaura.

**22** Viva nai kaivaqaukavara Variqa Nora Kotira tauvaqa utu amitero, kia Nora Kotira aaraqaa ni vaura.

**23** Ho vo enta Emonira qiata vaiintinavu ruvaaqumavi vira aruke uvvara tiva taataute, avuhainaara naavuqi vira arukora.

**24** Vira arukomanta Iutaini vauka Emonira arukoka náivata aruke, viraqaahai vika Emonira maaqu Josaiara kaama tovaro viva nai qora vatuka varero avuhainaa vaiintiqama vura.

**25** King Emoniva ekaa vo kaiqa vo kaiqa varo uvvara vuku vo, *Iutaa Avuhainaaka Uva Okarave* tu vukuraqi qara ntuvatora.

**26** Emoniva qutu vumanta vira vaata vare Usaara Kaqavave turaqi vuru quntama tovaro vira maaqu Josaiava nai qora vatuka varero avuhainaa vaiintiqama vura.

## 22

### *Josaiava Iutaa avuhainaava vaura*

**1** Josaiava 8 ihi varakova avuhainaa vaiintiqama viro Ieruharemipi vaiharo 31 ihiara Iutaqaqa raqiki vaura. Vira nova Jedidaava Bosikata vatukaihainaara Adaiaara raavuravano vaura.

**2** Josaiava Nora Kotira avuqaa koqe okara autura. Haaru vira kaivaqava Devitiva koqe aaraqaa nuntemakero, viva kia qora aara, vo

aara vo aaraqaa niraitiro, avuqavu qama kero  
Kotira aaraqaaqai ni vaura.

*Kotira vuku ranta varora*

<sup>3</sup> Ho viva 18 ihiara Iutaaqaa raqiki vau entara Josaiava nai qara ntuvu amite vau vaiintira Safaanira atitovaro vira uva varero Nora Kotira Naavuqi vura. Safaanira qova Asaliava vauvaro Mesulaamiva Asaliara qova vaura.

Josaiava Safaanirara tiharo, <sup>4</sup> Are oru Kotira kaiqa vara amite variaka qiata vaiinti Hilikiarara tiraro viva vaiinti nahenti Nora Kotira Naavu qentiqaa raqikiaka nimia monura kaara ntuarire.

<sup>5</sup> Viva monu vira kaara ntuvu kero vi monura varakero Nora Kotira Naavu kaiqaqaa raqikiaka nimiramanta vika vi monuraqohai naavu kaiqa vare variaka koqaa iate. <sup>6</sup> Vika naavu kaqe okarara tave variakavata, tainta auti variakavata, oriqohai naavu kaqe okarara tave variakavata koqaa iate. Vi monura hiniqohai katarive orive koqaamake vi haikaraqohai Nora Kotira Naavu qaiqaa avuqavu iate ti, vataarave.

<sup>7</sup> Te irunarave. Kaiqaqaa raqiki varia vaiintika vika kia vi monura hampiara voqaara aqu karaiti, vika avuqavuqamake vi monura aqukevarave. Mintiarara tiro, vovano vika ireharo, Ne-nasu vi monuraqohai nana nana haika varehae aqukaavo tiarirava kia varianarove, tiro.

<sup>8</sup> Ho Josaiava tuntema kero Safaaniva oru Hilikiara tiva amuvaro viva Safaanira tiva amiro tiharo, Te vuku vo Nora Kotira Naavuqihai ranta kauro. Vi vukuraqi Kotiva uva tivatora Mosisiva qara ntuvatova vaivo, tivakero Hilikiava vi

vukura Safaanira amuvaro Safaaniva vuku vira kaara ntura.

<sup>9</sup> Viva vuku vira kaara ntuva taiqa kero vi-raqaahairo viva vuku viravata varero King Josaiava vaunaini oruntero vira tiva amiro tiharo, Ai kaiqa vaiintinavu monu Nora Kotira Naavuqi vaira varake naavu kaiqaqaa raqikiaka nimiavo, tiro.

<sup>10</sup> Safaaniva minti tivakero viva avuhainaara uva vo tiva amiro tiharo, Hilikiava ti maa vukura timivo, tivakero ho viva vuku vira rairakero avuhainaara kaara ntuva amitora.

<sup>11</sup> Vi vukura kaara ntuva amitovaro avuhainaava Kotiva uva tivatora Mosiva qara ntuvatora iruvaro vira muntuka qoraiquvaro viva nai utavaaqa qunahi qaannahima kero, <sup>12</sup> vaiinti vonavu naarama komanta anura. Kotira kaiqa vara amitora Hilikiarave, Safaanira maaqu Ahikaamirave, Mikaiaara maaqu Akaborave, Josaiara qara ntuva amite vaura Safaanirave, Josaiara koqe avu aato ami vaura Asaiaarave, Josaiava vi vaiintika naarama kero vika tiva nimiro tiharo, <sup>13</sup> Ne tiriaravata, vaiinti nahentiaravata, ekaa Iutaini variakaravata iriha, oru Nora Kotira iraivaro viva vate maa vukura rantakero timira viraqi vai uvvara tinavu tiva timiarire. Oho, tinavu kaivaqaukavara maa vukuraqi vai uvvara kia iriha ni variara kaara Nora Kotira voqama kero tinavuara arara ite vaivarovaivo, tiro.

<sup>14</sup> Minti tumanta vika paropeti nahenti vo, Huldaara tavareka vura. Huldaava Ieruharemi hini mantaraini qaraaka vatuka autu tonaini vauvaro vira vaativano Tikivaara maaqu Salumuva vauvaro Tikivaava Hahaasira maaquvano vauvaro

Hahaasiva Kotira kaiqa vara amito vaiintika vika utavaaqaqaa raqikuva vaura.

Ho vika Huldaara tavareka vuvaro <sup>15</sup> viva vikara tiharo, Tinavu Isareri Variqa Noravano Kotiva mintima tivo:

Ne anirante oru avuhainaara maantima tiva amiate:

<sup>16</sup> Iutaa avuhainaava vukuqihairo uva kaara ntuva kaintemake, te Noravano Kotika Ieruharemivata vi vatukaraqi variakavata anomake qoraiqama nimitarerave.

<sup>17</sup> Vika ti qoririmake, una variqanavuara ofaa iha quara nomite, vika nái kauquqohai vo variqa vo variqa una variqa, aututaarave. Vira kaara ti vikara voqamakero arara itaimantama vauro. Ti Ieruharemiara arara itaarirava kiama vaahaanarove turo. <sup>18</sup> Te Noravano Kotika ni Iutaa avuhainaarara mintima turo:

Are vukuqi qara ntuvato uvvara irianarara irihama, te Noravano Kotika Isareri Variqavano ariara maantima turo:

<sup>19</sup> Te Ieruharemivata, viraqi variakavata, qoraiqama kaariraro vi vatava qumina vataiqama viramanta Ieruharemiqi variaka anomake vaaquqama vuate, tunarave. Te mintirera una uvvara are irihara ti Nora Kotika avuqaa nena vara muntuviqama kera, nena utavaaqavata qunahi qaannahima kera, ti haarehara iqi rataanarave. Are mintianarara ti, te are ti haarana uvvara iruro.

<sup>20</sup> Te kiama ai qaqi kaarirara are te Ieruharemi qoraiqama kaainara tavenarave. Are maateraiqihara variqira vira vuru qutu viramanta ai quntama taiqe vira naantiara te

Ieruharemi qoraiqama karerave.

Noravano Kotiva avuhainaarara mintima tivo. Paropeti nahenti Huldaava vi uvvara vika tiva nimumanta vika anirante avuhainaara vi uvvara vuru tiva amura.

## 23

### *Josaiava Kotira uva vaiinti nahenti kaara ntuva nimitora*

<sup>1</sup> King Josaiava ekaa qiata vaiinti Iutaini vaukavata, Ieruharemiqi vaukavata naarama kero, <sup>2</sup> vika hampata Nora Kotira Naavu vaunaini vumanta Iutaa nora vaiintive, Kotira kaiqa vara amite vaukave, paropeti vaiintive, nora autu vataakave kia nora autu vataakave, ekaa vika avuhainaara hampata mini ruvaaquamavi vauvaro Josaiava Nora Kotira Naavuqihairo rantato vukura rairakero Kotiva tivato uvvara vukuqi qara ntuvatora, ekaa vi uvvara vika kaara ntuva nimitora.

<sup>3</sup> Viva vukai *pohivano* Kotira Naavu avuni vaura aumanto himpi vaiharo Nora Kotira avuqaa nai kauqu ainqiqaa aqukero tiharo, Te Nora Kotira viraqai avataqi viha te ekaa viva tivato uvarave, viva minti mintiate tu uvarave, viva ekaa uva maara turave, te tenta muntuka maraquraqihai vi uvvara iriqi vireravema turo. Vukuqi qara ntuva taantemake, te vira uva iriqi virerave, tiro. Minti tumanta ekaa vaiinti nahentivata nái kauqu ainqiqaa aqukeha tiha, Tenavuvata vohaa qaramake Kotiva tiva taatauto uvvara iriqi virerave, tura.

<sup>4</sup> Vika minti tuvaro King Josaiava Kotira kaiqa vara amito vaiintika qiata vaiinti Hilikiaravata,

Hilikiara vira vevaaraini vaiha Kotira kaiqa vara amite vaukavata, Kotira Naavu qentiqaa raqiki vaukavata, naarama kero vika tiya nimo tiharo, Ne ekaa Nora Kotira Naavuqi oriqete una variqa Baaliravata, una variqa nahenti Aseraaravata, opu makaura iriha aututaa haikara, ekaa vi haikara vara veva vahaaqaini kaate, tiro.

Viva tuntema kovaro, viraqaaahairo Josaiava vi haikara vi haikara varero Ieruharemi aaqaini Kidaroni Uqitaini muntu ekaa vi haikara iha quara kovaro hantaiqama vuvaro hanta vira vaqita varero Beteli vatukaini vuru aqukora.

<sup>5</sup> Haaru Iutaa avuhainaaka una variqanavuara *ofaa* iha quaraate ti, vaiinti vokuka noraiqama komanta vika Iutaini vo vatuka vo vatukaqive, Ieruharemi aumantove, vaiha una variqarave, kuariarave, torarave, opu makaurave, iriha *ofaa* iha quara nimite vaura. Ho Josaiava vika kaiqa taiqakero vika nititama kora.

<sup>6</sup> Viva una variqa nahenti Aseraara katari vivarata Nora Kotira Naavuqihairo vara veva kero varero Ieruharemi aaqaini Kidaroni Uqitaini muntu iha quara kovaro hantaiqama vuvaro hanta vira vauqita kero ruqutu ruqutuma kovaro konkomaiqama vuvaro varero Ieruharemini qaqi vaiinti nahenti quntama toraqaa rauru raaruma kora.

<sup>7</sup> Nora Kotira Naavuqi vaiha vika nái una variqara iriha nái hana qorainti hampata nu vaiintika naavuvata ravantiaqa kora. (Vika naavuvano vaunaini nahenti vonavu Aseraara kaiqa vara amite vaukara iriha, vika utavaaqa autu nimitora.)

<sup>8</sup> Kotira kaiqa vara amite vau vaiintika Iutaini vo vatuka vo vatukaqi vauka Josaiava ekaa vika ntita vuru Ieruharemini kero, vika kia ho qaiqaa mini mini vaiha *ofaa* kaiqa varaate tiro, viva Iutaa vataini vi aniharo vika *ofaa* iha quare vau vatukara qoraiqama keharo, Geba vatuka *notihairo* qoraiqama nimitaqiro viviro, Beseba vatuka *sautini* vuru taiqakora.

Mintiakero viva una variqa quahama amito vatukara vo, Iosuaara Qentive tunaini aumanto vaura, viravata qoraiqama kora. (Iosuaava Ieruharemiqi vauka *kansoru* qiata vaiintivano vauvaro Iosuaara Qentivano vaantaavura nora qenti kaanaaqaini vaura.)

<sup>9</sup> Avuhainaava Kotira kaiqa vara amito vaiintika vo vatuka vo vatukaihai Ieruharemini ntita viri komanta vauvaro viva vika qioqama tomanta Nora Kotira Naavu vaunaini vau taintaraqaa *ofaa* iha quareva kia vaura. Kia vauvaro viva qaqi komanta vika nái hana kaiqa vaiinti hampata vaiha, mpareti kia noqavura varake ne vaura.

<sup>10</sup> Hinomu Uqitaini *ofaa* tainta vo Tofetini auttova vaumanta viraqaa vaiinti nahenti una variqa Molekira quahama amitareka vika nái maaquve, raavurave, arukeha *ofaa* iha quara amite vaura. Ho King Josaiava kia qaiqaa mintiate tiro, viva Tofeti vatuka anomakero qoraiqama kora.

<sup>11</sup> Haaru Iutaa avuhainaaka kuariara variqave tivakeha, vika ohi vonavu varake vikara kuari-vano i ohikave tivakeha kuari kaama amite, ohi vika Nora Kotira Naavu qenti aumanto vuru kora. Hohaa avuta viva Natani-Melekira naavu tataaqa

vaura. Ho Josaiava ohi vika qaqini varakero, vika iqoka *kaarinavu* iha quara kora.

**12** Avuhainaara naavu veraraqaa *rumu* vo Ahaasira *rumuve* tuva vaumanta tanu vira qitataqaa Iutaa avuhainaaka *ofaa* tainta vonavu autuke vatora. Ho Josaiava vi taintanavura ravantiaqa aqukero, viraqaahairo viva haaru Manaseva Nora Kotira Naavu vaunaini avuta taaraqantaqi *ofaa* tainta autukero vatoravata qaqini varakero, ekaa vi taintara ravantiaqa aqu aquma kero varero, muntu Kidaroni Uqitaini aqukora.

**13** Haaru King Soromonuva una variqanavu vaaqu haikara iriharo Ieruharemini kuari avu uruntonaini, Orivi Aiqina *sauti* mantaraini *ofaa* tainta vonavu autukero vatora. Saidonihainaaka una variqa nahenti Astaaterave, Moapihainaaka una variqa Kemosirave, Amonihainaaka una variqa Molekirave, Soromonuva vinavukara iriharo *ofaa* tainta vonavu autukero vatora, Josaiava ekaa vi taintaravata qoraiqama kora.

**14** Soromonuva una variqara iriharo kaamato orira, Josaiava vi orira vi orira rakavu raakavuma kero, una variqa nahenti Aseraara *maraqura/varaha* katari, voqi voqi vaura teqa taaqama kero, vaiinti nahenti vi vatukara qora vatukave tiate tiro, viva vaiinti vuhaantaari vatukavau aqu aquma kora.

**15** Haaru Nebaatira maaqu Jeroboamuva Betelini *ofaa* tainta autukero vatero qora okara autiharo Isarerivata kuntama virivi komanta vikavata qora okara autura. Ho Josaiava *ofaa* tainta vira rakikiaqa kero, vi orira tairi

taarima kero, una variqa nahenti Aseraara katari aratoravata iha quara kora.

**16** Ho Josaiava mini vaiharo tuqantaaviro tavavarro vutuni inaara aiqinaqaa matipa vonavu vauvaro tavero, viva *ofaa* tainta anomakero qoraiqama vuare tiro, nai kaiqa vaiinti nititomanta vika oru matipaqhahai vaiinti vuhan-taari mpaqi vare vuru *ofaa* taintaqua iha quara kora. Josaiava mintuvaro haaru Noravano Kotiva paropeti noqihairo tu uvava vivauma vaura. (1 King 13:2)

**17** King Josaiava mintima kero, qaiqaa matipa vo tavero vaiinti vihainaaka irero tiharo, Vira tara quntama taa matipavae vaivo? tumanta vika tiha, Iutaihainaa paropeti vaiinti matipave. Vi vaiintiva haaru anintero tiharo, Naantiara vo enta maa *ofaa* taintara minti mintima keharo qoraiqama kaanarove tu uvara, are vate mintiararo viva tu uvava quqaa vivauma vaivo, ti.

**18** Vika minti tuvaro Josaiava tiharo, Ho kia vira vuhaari qaqlini vara kaate. Vira qaqla kaivaro nai matipa viraqi variarire, tumanta vika vira vuhaarivata, Sameria paropeti vaiinti vuhaarivata, kia varora.

(1 King 13:31-32)

**19** Haaru Isarerl avuhainaaka una variqara iriha *ofaa* tainta vo aiqina vo aiqinaqaa autuke vatora kaara Nora Kotira voqama kero arara itora. Ho Josaiava Beteli vatukaini *ofaa* tainta qoraiqama kontema kero, viva Sameria vatainivata vi aniharo ekaa *ofaa* tainta rakikiaqa kero qoraiqama kora.

**20** Viva una variqanavu kaiqa vara nimitoka ntita varero nái *ofaa* taintaqaa vara vaari vatero arikora. Viva vika arikero vaiinti vuhanthaarivata varakero *ofaa* taintaqaa iha quara kora. Viva minti mintima kero, anirantero Ieruharemini vura.

### *Josaiava vehakuma nimito karara nora*

**21** King Josaiava vaiinti nahenti tiva nimirotiharo, Kotiva tiva taatauto uvara vukuqi qara ntuvu tontemake, ne Vehakuma Nimito Entarara iriha, vi karara naivaro Nora Kotira ni Variqa autuvano noraiqiarire, tura.

**22** Qiata vaiintinavu Isareriqaa raqiki vau entarave, Isareriqaa avuhainaakavata Iutaa avuhainaakavata raqiki vau entarave, Isareriqaa vaiha kia vehakuma nimito karara mintimakeha nora.

**23** Mintumantavata, King Josaiava 18 ihiara Iutaaqaa raqiki vau entara, vika vukuqi vau uvara iriha, Vehakuma Nimito Entarara iriha, Ieruharemiqi vi karara naitaramake neha, Nora Kotira autu noraiqama kora.

### *Josaiava qora okara, vo okara vo okara taiqa kora*

**24** Kotira kaiqa vara amitova Hilikiava Nora Kotira Naavuqihairo rantato vukuraqihainaa uva avataqiro viharo, Josaiava vara nte vau nahentikave, vaana kaiqa vare vaukave, vika nititama kero, vaiinti nahenti una variqa *maraqura/ varaha* nái naavuqirainti vatorave, ekaa variqave tu haikarave, nana nana vaaqu haika quahama nimite vaura Ieruharemiqvata Iutaaqivata vatora, viva ekaa vi haikara vehi autu taiqa kora.

**25** Haaru avuhainaaka Josaiara avuni vaukave, vira naantiaraini avuhainaaka qovaraiqukave, kia vikaqihairo vovano Josaiara voqaantema kero Nora Kotira avataqiro vi vaura. Josaiava ekaa Kotiva tiva taatauto uvara Mosiva qara ntuvatora iriqiro viharo, ekaa nai muntukaqihairove, avu aatoqihairove, ekaa nai kem-pukaqohairove, vi uvara iriqiro vi vaura.

**26** Viva mintiaqiro vi vauvarovata, King Manganeseva qora okara autura kaara, Nora Kotira Iutaara voqama kero arara itovaro vikara arara itova kia vaaharaitiro, qaqi arara ite vaura.

**27** Noravano Kotiva tiharo,

Te haaru Isareri tenta aaqantohai qaqlini vara kaunantemake, te Iutaavata qaqlini vara kaari kia ti aaqanto variate.

Te tenta kaama tauna vatukara Ieruharemi qoririmake, te variqi virerave tuna Naavuravata qorrima karerave, tiro.

Noravano Kotiva minti tura.

### *Josaiava qutu vura*

**28** King Josaiava ekaa vo kaiqa vo kaiqa varo uvara vuku vo, *Iutaa Avuhainaaka Uva Okarave* tu vukuraqi qara ntuvatora.

**29** Josaiava avuhainaava vau entara Isipi King Nekova nai iqoka vaiinti ntita varero Iufaretisi Namari vaunaini oru Asiria avuhainaara hampata iqoka raqireva vuvaro, Josaiavavata nai iqoka vaiinti ntita varero Isipi hampata raqireva Megido vatukaini oruntovaro Nekova iqoka raqiharo Josaiara arukora.

**30** Arukomanta vira kaiqa vaiinti vira vaata iqoka *kaariqi* vaari vate, anirante vuru

Ieruharemini Iutaa avuhainaaka quntama to matiparaqi quntama tora. Vira quntama tomanta Iutaa vika Josaiara maaqu Joahaasira vitake vira qiataqaa vhahera aqu amitovaro viva nai qora vatuka varero avuhainaa vaiintivano vaura.

*Joahaasiva Iutaa avuhainaava vaura*

<sup>31</sup> Joahaasiva 23 ihi varakova avuhainaa vaiintiqama viro Ieruharemiqi vaharo taaramo torara Iuttaaqaa raqiki vaura. Vira nova Hamataliva Jeremaiaara raavuravano Lipina vatukaihainaava vaura.

<sup>32</sup> Joahaasiva nai kaivaqaukavara autuntema kero, Nora Kotira avuqaa qora okara autura.

<sup>33</sup> Joahaasiva kia Ieruharemiqi vaharo Iuttaaqaa raqikiarire tiro, Isipi King Nekova Hamati vataini Ripila vatukaqji Joahaasira rumpa tero, Iutaa vaiinti nahentiara nora *takisi* 3,400 kilo silvaavata, 34 kilo korivata timiate tiro naaruma tora.

<sup>34</sup> Mintuvaro Isipi King Nekova Josaiara maaqu vo Elikamira noraiqama kovaro Elikamiva nai qora Josaiara vatuka varero Iutaa avuhainaa vaiintiqama viro vaura. Nekova Elikamira vo autu ntavateharo Jehoiakimirave tivakero viraqahairo Joahaasira vita varero vuru Isipini kovaro viva mini vaharo qutu vura.

<sup>35</sup> King Nekova nora monu naaruma torara iriharо, Jehoiakimiva ekaa Iutaa vatanaa vaiinti nahentiara *takisi* aqukeha, *silvaave korive* ti timiate tiro. Airi airaira vataaka noraiqaake timiate, kia airi airaira vataaka inaaraiqama timiate, tiro. Ho Jehoiakimiva minti tumanta amuvaro varakero Nekova unaini varakora.

## *Jehoiakimiva Iutaa avuhainaava vaura*

<sup>36</sup> Jehoiakimiva 25 ihi varakova avuhainaa vai-  
intiqama viro Ieruharemipi vaiharo 11 ihiara  
Iutaaqaa raqiki vaura. Vira nora Sebidaava Ru-  
maihaainaava Pedaiaara raavuravano vaura.

<sup>37</sup> Jehoiakimiva nai kaivaqaukavara qora okara autuntema kero, Nora Kotira avuqaa qora okara autura.

24

<sup>1</sup> Jehoiakimiva avuhainaa vaiinti vau entara Babironi vika King Nebukanesaava nai iqoka vaiinti ntita varero ani Iutaa hampata iqoka raqiharo iqoka aatara kovaro Jehoiakimiva vira vevaaraini vaiharo *takisi* vira ami vaura. Ho taaramo ihi aitarovaro Jehoiakimiva kia qaiqaa vira vevaaraini yaireva auti vaura.

**2** Mintuvaro vi entara Noravano Kotiva nai kaiqa vaiinti paropetinavu noqihairo tu uvava vivau variarire tiro, viva vaiinti vokuka Babironi-haive, Siriaihaiive, Moapihaiive, Amonihaiive, vika Iutaa vata qoraiqama kaate tiro, vara komanta oru Jehoiakimira hampata raqiha Iutaa vata qoraiqama kora.

<sup>3</sup> King Manaseva qora okara, vo okara vo okara auti vaura kaara Noravano Kotiva Iutaa vika kia ti aaqanto variate tiro, vi vatanaaka vara komanta vika ani Iutaa vata qoraiqama kora.

<sup>4</sup> Kia vo uvavanovata vikaqaa vau vaiinti na-hentika Manaseva qumina arukovaro vika naare-vano Ieruharemi vatuka mpiqa kora kaara, Nora-vano Kotiva kia vira qora okara qaqlira karaitiro, qaqlira iritora.

<sup>5</sup> King Jehoiakimiva ekaa vo kaiqa vo kaiqa varo uvvara vuku vo, *Iutaa Avuhai naaka Uva Okarave* tu vukuraqi qara ntuvatora.

<sup>6</sup> Jehoiakimiva qutu vuvaro vira maaqu Jehoiakiniva nai qora vatuka varero avuhainaava vaiintiqama viro vaura.

<sup>7</sup> Babironi avuhainaava Isipi avuhainaara hampata iqoka raqiharo Isipi avuhainaava u vatara, vo vata vo vata nai varorara tiro, Isipi avuhainaava kia qaiqaavata iqoka raqireva viraitiro, qaqira kero Isipini vaura. Babironi avuhainaava raqiki vau vatava vaireva, Iufaretisi Namari vaunaihairo viviro, muntu Isipi vata auvahianta taiqora.

### *Jehoiakiniva Iutaa avuhainaava vaura*

<sup>8</sup> Jehoiakiniva 18 ihi varakova avuhainaava vaiintiqama viro Ieruharemiqi vaharo taaramo torara Iutaaqaa raqiki vaura. Vira nova Nehutaava Ieruharemihainaava Elinataanira raavuravano vaura.

<sup>9</sup> Jehoiakiniva nai qova qora okara autuntema kero, Nora Kotira avuqaa qora okara autura.

<sup>10</sup> Vi entara Babironi King Nebukanesaara qiata vaiintinavu iqoka vaiintivata ntita vare oru Ieruharemi vatuka varareka vira ututumate vaura.

<sup>11</sup> Ieruharemi ututumate vauvaro Nebukanesaava naivata Ieruharemini oru yaumanta

<sup>12</sup> King Jehoiakiniva, nai norave, nai kaiqaqaa raqiku vaiintikave, nai qiata vaiintinavuve, avuhainaara naavuqaa raqiku vaiintikave, ntita varero iqoka qaqrakero Nebukanesaava vaunaini vuvaro Nebukanesaava Jehoiakinira

rumpa tora. Vi entara Nebukanesaava 8 ihiara Babironiqa raqiki vau entava vaura.

**13** Nebukanesaava Nora Kotira Naavuqhairovata avuhainaara naavuqhairovata ekaa koqe haika qaqlini varakero, King Soromonuva Nora Kotira Naavuara iriharo *koriqohairo* autukero vato haikara, ekaa vi haikara varero Babironini vuru vatovaro haaru Noravano Kotiva tu uvava vivau vaura.

**14** Nebukanesaava ekaa Ieruharemihainaa vaiinti nahentivata, ekaa iqoka vaiintivata vika qita vaiintivata, ekaa vo kaiqa vo kaiqa tave vaukavata, vika ekaa rumpa varero Babironini vuru kora. Viva 10,000 vaiinti nahenti rumpa varero viharo, anomia vehi vaiinti nahentiqai Iutaa vataini qaqlini komanta vaura.

**15** Nebukanesaava Jehoiakiniravata, vira noravata, vira naatavaravata, vira kaiqa qaa raqikukavata, Iutaa qita vaiintivata, rumpa varero Babironiqi vuru kora.

**16** Nebukanesaava „Iutaa“ iqoka vaiinti 7,000 rumpa varero Babironini vuru kero, viva vo kaiqa vo kaiqa tavo vaiintika 1,000 navu *aini* auti okarara tavokave, „auvihehavaa“ auti okarara tavo vaiintikave, viva vika vika rumpa varero Babironini vuru kora. Ekaa vi vaiintika kempuka vaiinti ho iqoka raqi vauka vaura.

**17** Ho Nebukanesaava Jehoiakinira vira qora qata Mataniara kaama tovaro viva Jehoiakinira vatuka varero avuhainaava vaiinti vaura. Nebukanesaava Mataniara vo autu ntava teharo Sedekaiarave tura.

*Sedekaiava Iutaa avuhainaava vaura*

<sup>18</sup> Sedekaiava 21 ihi varakova Iutaq avuhainaa vaiintiqama viro vaharo Ieruharemiqi 11 ihiara „Iuttaaqaa“ raqiki vaura. Vira nova Hamutal-iva Lipina vatukaihainaava Jeremaiaara raavuravano vaura.

<sup>19</sup> Jehoiakimiva qora okara autuntema kero, Sedekaiavavata Nora Kotira avuqaa qora okara autura.

<sup>20</sup> Iutaavata Ieruharemiqi vaukavata qora okara auti vaura kaara, Nora Kotira voqama kero arara itovaro viva ekaara vitini vi vaiinti nahentikara popohovaro vika nai aaqantohairo qaqlini vara kora.

## 25

### *Navutaaka Ieruharemi varora*

<sup>1</sup> Sedekaiava kia Babironi avuhainaa vaiinti vevaaraini vaireva auti vaura kaara Sedekaiava 9 ihi 10 tora Iuttaaqaa raqiki vau entaraqaa Babironi King Nebukanesaava nai iqoka vaiinti ekaa ntita varero ani raqireva Ieruharemi vatuka ututumatero aaqaini vaharo nai seri naavu maaqa kaqatero vaura. Vika Ieruharemi vatuka ututumate viraqaa vaarinte raquare tivake vata quvike vuru vaantaavura tataaqqa nte vaura.

<sup>2</sup> Vika vohaa ihi 6 torara Ieruharemi ututumate vauvaro vi entara Sedekaiava 11 ihiara Iuttaaqaa raqiki vau entava vauvaro <sup>3</sup> vi ihira 4 tora 9 entaqaa Ieruharemiqi karavano ekaa taiqa vuvaro vika kara neva kia vaura.

<sup>4</sup> Vi entara Babironi vika vaantaavura hini mantaraini ravantiaqake vatukaqi oriqtora.

Mintumanta King Sedekaiavavata, Ieruharemiqi vau iqoka vaiintikavata, vika

qetake entaqi ekaa ruqemake vura. Babironi vika Ieruharemi vatuka ututumate vaumanta avuhainaara kaqava tataaqqa vaantaavura taaraqanta vaunaini qenti voqihai vika ruqiare vevante, Ieruharemi ke Iotani Uqitaini vireka vura.

<sup>5</sup> Mini vireka vumanta Babironi iqoka vaiinti vika King Sedekaiara avataqi vuvaro viva Ieriko Uqitaini otu vumanta Sedekaiara iqoka vaiinti vika vira qaqrake ruqemake vona vona vura.

<sup>6</sup> Vika vumanta Babironi iqoka vaiinti Sedekaiara ravaaqavu vare Nebukanesaava Ripila vatukaqi vaunaini vuru kovaro Nebukanesaava viraqaa uva vatero *ko* tiva taiqa komanta <sup>7</sup> vika Sedekaiara maaqunavu ntita vare Sedekaiara avuqaa aruke, vika Sedekaiara avutantavata vauru kora. Vika vira avutanta vauruke *baraasi seniqohai* vira aiqu kauqu rumpake vare Babironiqi vuru kora.

<sup>8</sup> King Nebukanesaava 7 enta 5 tora 19 ihiara Babironiqaa raqiki vau entara, vaiinti vo Nebusaradaaniva Ieruharemini anura. Vi vaiintiva Nebukanesaraqaa maimaraara raqiki vau vaiintika qiata vaiintivano vaura.

<sup>9</sup> Viva Ieruharemini anintero, Nora Kotira Naavuvata avuhainaara naavuvata qumpiarama kero, ekaa Ieruharemiqi nora vaiintinavu naavuvata qumpiarama kero, <sup>10</sup> viraqaahairo viva tumanta nai Babironi iqoka vaiinti vika Ieruharemi ori vaantaavura aututora ekaa ravantiaqa raavantiaqama aqukora.

<sup>11</sup> Vika mintima kovaro Nebusaradaaniva Ieruharemiqi qaqi vaukavata, voku vaiinti nahentikavata ntita varero vuru Babironiqi kora.

Ragu entara Iutaa iqoka vaiinti iqoka qaqirake Babironi mantaraini vauka, Nebusaradaaniva vilkavata ntita varero vuru Babironiqi kora.

<sup>12</sup> Viva ekaa vika Babironini vuru keharovata, Iutaa vokuka anoma vehiqamavi vauka vikaqai *uaini* naahoqaavata ekaa vo naahoqaavata raqikiate tiro, qaqi mini kora.

<sup>13</sup> Babironi vika Nora Kotira Naavu avuni *baraasiqohai* aututo *pohitanta* aratora ravantiaqake rakavu raakavumake, Naavu naanteqaraini *uiri kaarinavuvata* rakavu raakavumake, nora tave Varuva Namariive tu taverava *baraasiqohai* autu tora, viravata rakavu raakavumake, *baraasi* vira vare Babironini vuru kora.

<sup>14</sup> Kotira Naavuqi vira kaiqa vara amito haikara *baraasiqohai* aututora, kureve, havoreve, ova qimperave, tanuve, ekaa vo haika vo haikave, Babironi vika ekaa vi haikara vi haikara varora.

<sup>15</sup> Korivata *silvaavataqohai* aututo haikara, ihauri vaqita tanurave, vo tanu vo tanuve, ekaa vi haikara Nebusaradaaniva varora.

<sup>16</sup> Haaru Soromonuva Nora Kotira Naavuvara iriharo aututo haikara, *baraasiqohai* aututo *pohitantavata*, *Varuva Namariive* tu taveravata, *uiri kaarivata*, „vika vi haikara rakavu raakavumake varora.“ *Baraasi* ori vira maaravano voqamakero maara ntomantara ti, vika kia ho vira maara rairake tavora.

<sup>17</sup> Kotira Naavu avuni *baraasiqohai* aututo *pohitanta* vauvaro vi *pohitanta* vukaivano vaireva, 8 mita vaura. Pohi vitantaqaa *baraasiqohai* qiatatantavata aututova vauvaro qiata vukaivano vaireva, 1 mita 30 sentimita

vaura. *Baraasiqohairo airi pomigraneti* tava *maraqura/varaha naiqi naiqi vi pohira ututumate vahehema/ vaataiqama* tova vauvaro, hini *pohivata* vohaa qaramake vaura.

<sup>18</sup> Nebusaradaaniva „Ieruharemiqi vaiharo“ Kotira kaiqa vara amite vauka qiata vaiinti Seraiaara rumpakero, Seraiaara vevaaraini vau vaiintira Sefanaiara rumpakero, Kotira Naavu qentiqa raqikuka taaramonavu rumpakero, <sup>19</sup> Ieruharemiqi Iutaa iqoka vaiintiqaa raqiku vaiintira vo rumpakero, Iutaa avuhainaara koqe avu aato ami vauka 5navu rumpakero, Iutaa iqoka vaiinti naarama keharo vika nutu qara nti vau vaiintira rumpakero, Ieruharemiqi nora vaiinti 60navuvata rumpakora.

<sup>20</sup> Nebusaradaaniva vi vaiintika vi vaiintika rumpakero ntita varero Babironi avuhainaava vaunaini Ripila vatukaqi <sup>21</sup> Hamaati vataini vuru kovaro Babironi avuhainaava tumanta ekaa vika arukora.

Ho Babironi mintimake „Iutaa vokuka aruke,“ vokuka rumpa vare vika nái vataihai vonaini vuru kora.

*Iutaqaqa raqikiarire tiro Gedaliaara noraiqama kora*

<sup>22</sup> Ho Iutaini qaqi vau vaiinti nahentikaqaa raqikiarire tiro, Babironi King Nebukanesaava Gedaliaara kaama tora, Gedaliaava Ahikaamira maaqu Safaanira naintivano vaura.

<sup>23</sup> Gedaliaava Iutaqaqa raqikiarire tiro, Babironi avuhainaava vira noraiqama komanta Iutaa qiata vaiinti vonavuvata nái iqoka vaiintivata vi uvara iri, „nái kukeqavi vaunaihai,

oru Misipaini Gedaliaara tavareka vura. Qiata vaiinti vika nutu vaireva, Netaaniara maaqu Isamairiva, Kareaara maaqu Johanaaniva, Netofuhainaara Tanihumetira maaqu Seraiava, Makaa vataihainaava Jesaaniava.

**24** Vika Gedaliaava vaunaini oruntovaro viva nai kauqu ainqiqaq aqukero tiharo, Ne kia Babironi naatu qetaraiti, ne maa vataraqaa vaiha, Babironi avuhainaara vevaaraini vaivera, ne koqemake vaivarave, tiro.

**25** Gedaliaava minti tuvarovata, vi ihira 7 toraqaa Netaaniara maaqu Elisamaara nainti Isamairiva, viva Iutaa avuhainaara ankuqihainaava vaiinti 10 navu ntita varero ani Misipaini vaiharo Gedaliaara arukora. Vika vira aruke, Iutaa vaiinti Gedaliaara hampata vaukavata, Babironi iqoka vaiinti Misipaa vatukaqi vaukavata, arukora.

**26** Mintumanta Iutaa nora vaiinti nahentive, qaqi vaiinti nahentive, Babironi naatu qetake, iqoka vaiintiqaa raqikuka hampata ruqemake Isipini oru vaura.

### *Jehoiakinira kuvantu kora*

**27** Ho Iutaa King Jehoiakiniva Babironiqi 37 ihира karapuhiqama viro vau entara, Evili-Merodaakiva Babironi avuhainaa vaiintiqama viro, vi ihira 12 tora 27 entaqaa viva Jehoiakinira koqema amiteharo vira karapuhiqhairo ku-vantu kora.

**28** Evili-Merodaakiva Jehoiakinikantiro koqe uva tivakeharo, vira koqe autu amuvaro Babironiqi ekaa avuhainaaka vira hampata

rumpatokaqihairo Jehoiakinira autuvano avuni vaura.

<sup>29</sup> Jehoiakiniva qaqlini kuvantuviro vau entaraqaahairo viva kia qaiqaa karapuhi utavaaqana nonkutero, koqemakero vaiharo viva qaqlini vau entara Babironi avuhainaara naavuqi kara ne vaura.

<sup>30</sup> Jehoiakiniva koqema kero variarire tiro, Babironi avuhainaava tumanta ekaa Jehoiakiniva qaqlini vau entara vika vira monuve airairave ami vaura.

**Kotira Uva  
The New Testament and portions of the Old  
Testament in the North Tairora Language of Papua  
New Guinea**

**Nupela Testamen na sampela hap Olpela Testamen  
long tokples Tairora long Niugini**

copyright © 1979, 1994, 2005, 2008, 2009, 2012 Wycliffe Bible Translators,  
Inc.

Language: Tairora

Dialect: North Tairora

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-05-26

---

PDF generated using Haiola and XeLaTeX on 11 Nov 2022 from source files  
dated 30 Nov 2021

909b265f-c886-56ae-b943-fdc12fe46c5e